



Bodleian Libraries

UNIVERSITY OF OXFORD


This book is part of the collection held by the Bodleian Libraries and scanned by Google, Inc. for the Google Books Library Project.

For more information see:

<http://www.bodleian.ox.ac.uk/dbooks>



This work is licensed under a Creative Commons Attribution-NonCommercial-ShareAlike 2.0 UK: England & Wales (CC BY-NC-SA 2.0) licence.





J. 33. a. 15
Presented to




The Taylor Institution by
The Rev. Dr. Wellesley
Principal of New Inn Hall









LA LEGENDE
DE MAISTRE
PIERRE
FAIFEU,

Mise en Vers par CHARLES BOURDIGNE.




33 a 15

A PARIS,

De l'Imprimerie d'ANTOINE-URBAIN COUSTELIER,
Imprimeur-Libraire de S. A. R. Monseigneur
le Duc d'Orleans.

M. DCC. XXIII.



LETTRE
A MONSIEUR
LANCELOT,

SECRET AIRE DU ROY
& de l'Académie Royale des
Belles Lettres.

MONSIEUR,

Charles de BORDIGNE' ou BOURDIGNE' natif d'Anjou, Auteur de la Légende de Maître Pierre Faifeu, *florif-
soit à Angers en 1531.* selon la CROIX
DU MAINE. Il y a un Jehan BOUR-
DIGNE', Auteur des Chroniques d'An-
jou, qu'il ne faut pas confondre avec

celui-ci. Je ne ſçai ſi nôtre Auteur a
compoſé d'autres Ouvrages que la
Legende dont il eſt ici queſtion : c'eſt
un Livre extrêmement rare , & dont
je n'ai vû d'autre exemplaire que ce-
lui qui a ſervi à cette nouvelle Edi-
tion. J'eſpere que vous ſerez content
de l'attention que l'on a apporté à
la rendre conforme à l'original , & à
en conſerver l'orthographe. Ceux qui
ont recherché nos Antiquitez avec
autant de ſuccès & d'aſſiduité que
vous , Monsieur , ſçavent le prix de
cès monumens des différentes Diale-
ctes & des prononciations de nos Pro-
vinces , qui ſervent infiniment à faire
remarquer les changemens que le tems
& l'uſage ont introduit dans nôtre Lan-
gue. A la ſuite de la Legende de Mai-
ſtre Pierre Faifeu , on a fait imprimer
quelques Pieces choiſies de Jehan
MOLINET Chanoine de Valenciennes,
qui vivoit dans le quinzième ſiècle,
& qui eſt mort fort âgé en 1507. C'eſt
le même Jehan MOLINET qui nous a
donné une Paraphraſe en proſe du
ROMAN DE LA ROSE. Vous ſçavez que
l'on en prépare une Edition nouvelle :

on a déjà conféré le Texte avec plusieurs M S S. très anciens. Il y a lieu de se flatter que ceux qui aiment nôtre Langue & nôtre Poësie , seront satisfaits de l'ordre & de la critique qui regneront dans cette Edition , d'autant plus qu'on ne prendra aucun parti sur la disposition de l'Ouvrage , que de concert avec plusieurs personnes versées dans ce genre d'Erudition. L'obligation où le choix de Monseigneur le Garde des Sceaux vous a mis de revoir l'Ouvrage , pour y donner vôtre Approbation , est un nouveau motif pour vous engager à ne pas refuser vos lumieres à ceux qui travaillent à cette Edition.

Je suis , Monsieur , &c.

T A B L E

De ce qui est contenu en ce Volume.

B ALLADE aux lysans ,	pag. 1.
Epistre de Maistre Pierre Faifeu envoyée aux Angevins ,	2.
Epistre aux Lecteurs ,	11.
Epistre à Maistre Jehan Alain ,	13.
Prologue de l'Acteur ,	14.
Comment Maistre Pierre Faifeu commença aller à l'Escolle ,	21.
Comment quelquefois qu'il estoit à l'Escolle son Maistre luy baillant la fessée il effoira ,	22.
Comment il avoit subtillement argent de sa mere ,	24.
Comment il avalla du lamprion tout vif ,	26.
Comment il deroboit les Oayes à sa mere ,	Ibid.
Comment il trompoit sa mere pour aller desjeuner quel ne fust en la maison ,	28.
Comment sa mere luy ferma la cave, & comment il s'en vengea ,	29.
Comment il se vengea de Seur Macée la devotte , qui le faisoit tenser à sa mere ,	31.
Comment il joua publicquement ung Boullanger qui avoit faict ung enfant à sa Chamberiere ,	33.
Comment ung jour qu'il estoit à Paris il joua aux detz avec les Clercs de la Cour , qui le piperent ,	34.
Comment il donna à desjeuner à des Dames d'Angers ,	36.
Comment à ung aultre bancquet il beut de l'ypocras ,	37.
Comment ung soir luy & ses compaignons n'avoient que souper ,	38.

- Comment Pierre Faifeu fist le Bastleur à Baugé ;** 39.
- Comment à son retour de Baugé , voullut acheter ung Poulain qu'on ne luy voullut vendre , qu'il heust subtilement ,** 41.
- Comment le jour des licences publiques d'Angers , il voullut faire licencier son cheval ,** 44.
- Comment Faifeu alla en Poictou , où en une hostellerie fist monter son cheval au grenier à l'avoine ,** 46.
- Comment il alla en Bretagne , où il contrefist le Triacleur ,** 49.
- Comment il alla à Nantes , où il garrentit ung Criminel de estre pendu , & fist le Divin ,** 50.
- Comment à Rennes il contrefist le Medicin ,** 54.
- Comment à la Flefche il eut des housseaulx subtilement ,** 56.
- Comment la Dame de une grosse maison où il hantoit , perdit ung Dyamant en sa maison , qu'il luy fist subtilement recouvrer ,** 58.
- Comment il fist une finesse pour coucher en la chambre de sa mere avecques sa Chamberiere ,** 61.
- Comment quelquefois il se trouva seul avecques de ses compaignons chez sa mere , & pour desjeuner tyra la viande du pot , & y mist une pierre ,** 63.
- Comment en la compaignie de aucuns de ses amys , il fut question que l'un de la bende payast une chopine de ypocras : pour laquelle avoir , fallut faire cedule , qu'il escripvoit ,** 64.
- Comment ung jour s'en venant de Orleans par la riviere de Loyre , il fit tayer les Lavandieres de buée à Bloys ,** 65.
- Comment il cuyda à Angers estre surpris avecque quelque fille dont estoit amoureux , & comment il se sauva ,** 67.
- Comment au Mans il fist gageure avecques les Clercs de pratique , à qui feroit la plus belle Lettre ,** 69.

- Comment à Chasteaulx en Anjou il fist le Marchant de
pourceaulx ,** 71.
- Comment il dansa une morisque en une chemise glacée ,**
72.
- Comment derechef fut amoureux de quelque Dame ; à
qui , pour ce faire , donna trois aulnes de escarlatte ,**
73.
- Comment chez une de ses tantes trouva ung coffre ouvert ,
où avoit argent ; qu'il print , & y enferma ung re-
gnard tout vif ,** 75.
- Comment pour quelque follietterie , ne se osoit trouver
chez sa mere , & comment à ung soupper il se y trou-
va ,** 76.
- Comment ung jour vint à ung sien amy luy prier qu'il
luy donna à bancquetter ; lequel luy respondit qu'il
n'avoit que ung pain de bien la valler de cinq sols ,
qu'il luy donnoit s'il le pouvoit manger ; & comment il
en fist , & de la reponce qu'il fist après ,** 77.
- Comment il vendit du vin sur les champs , qui estoit à sa
mere ,** 79.
- Comment il devoit argent à ung creditteur , qui le mist
en Justice ,** 80.
- Comment pour quelque cas à Tour fut prins par plusieurs
Sergeans pour le mener en prison , dont en porta ung
en une Eglise , & gaigna franchise ,** 82.
- Comment à Angers il jona avecques les Egyptiens qu'il
affina ,** 84.
- Comment l'an 1518 que le Roy François fut à Angers ;
devant des Seigneurs de la Court il mengea des mouf-
ches ,** 86.
- Comment à Angers une certaine nuyt il jona avecques ung
jeune Prothenoitte Abbé , qui gaigna son argent , &
le gaudist ; mais il emporta subtillement sa robbe ;**
88.
- Comment il avoit une garce chez luy , de laquelle , quant**

il en fut ennuyé, s'en depescha subtilement,	91.
Comment à Saulmur il se trouva en certaine compagnie, où fut faicte une follye, dont il fut prins, & mis en prison; & comment il demanda estre renvoyé à Angers; & comment à saint Eburoüil il se saulva,	93.
Comment Faiseu entretenoit certaine fille, à qui il fist une aultre fille,	97.
Comment ses parens le pathelinerent & redarguerent tant qu'il fust de opinion estre marié,	98.
Comment la conclusion des nopces prinse, pour faire cher, & festyer les parens de sa femme, alla à Paris faire acoustrer sa veze la sepmaine qu'il devoit espouser,	101.
Comment en allant à Paris faire acoustrer sa veze, il logea à la Ferté chez Gillet le Prince, qu'il trompa avecques son cheval,	104.
Comment il s'en retourna de Paris à Angers, avecques aucuns de sa congnuë, & relogea chez ledit Prince, qu'il trompa de rechef, & ne fut point congnu,	106.
Comment, après tous ses tours, il espousa sa femme en l'Eglise saint Julien à Angers,	108.
Comment, après avoir esté certain temps en mesnage avec sa femme, il mourut de merencolye,	109.
Epitaphe de Maistre Pierre Faiseu,	112.
Envoy en maniere de Ballade du Compillateur aux Le- cteurs,	114.

Poësies diverses de Jehan Mollinet.

Le siege d'Amours,	119.
L' A. B. C. Sawvaige,	132.
Recollection des merueilleuses advenuës en nostre temps,	148.

<i>Le Dictionnaire que Vertjus presenta à Maître Nicolle Rem- berc ,</i>	183.
<i>Le Testament de la Guerre,</i>	189.
<i>Le Calendrier ,</i>	194.

Fin de la Table.



BALLADE

BALLADE

AUX LYSANS.



NOBLES Espritz, arduz, scientificques,

Que songez-vous, où avez vous esté ?
Renger vous fault ainsi que magnifiques,

A escouter une joyeuseté ;
Songears maulditz plains de melancolye ,
Qui n'appetez jamais chose jolye ,
Recullez vous , allez dormir en l'astre ,
Bons compagnons qui appetez le jeu ,
Si vous n'avez la teste acariastre ,
Voyez les faits Maistre *Pierre Faifew.*

De *Pathelin* n'oyez plus les canticques ;
De *Jehan de Meun* la grant jolyveté ,
Ne de *Villon* les subtiles trafficques ,
Car pour tout vray ils n'ont que nacquetté.
Robert le Dyable a la teste abolye ,
Bachus s'endort & ronfle sur la lye ,
Laissez ester *Caillette* le folastre ,
Les quatre Filz *Aymon* vestuz de bleu ,
Gargantua qui a chepveulx de plastre ,
Voyez les faits Maistre *Pierre Faifew.*

Voz motz dorez garderont les Bouticques ;
Et *Peregrin* qui tant a muguetté ,
Les douze *Pers* sont devenus ethicques ,

2

*Artus est mort , & Lancelot gasté ;
Merlin , Tristan , Fierabras de Hongrye ,
Avec Ponthus sont allez en fairye ,
Et Valentin , Orson l'oppiniastre ,
Matheolus a perdu son aveu ,
A brief parler il fault que l'on les chastre ,
Voyez les faitz Maistre Pierre Faifeu.*

E N V O Y.

*Le Prince Ovide a dechifré Baratre
Du Roy Pluton tout l'enorme theatre ,
Ce n'est rien dit, mettez tout dans le feu ;
Mesme Virgile en plaignant sa marastre,
Voyez les faitz Maistre Pierre Faifeu.*

*L'Epistre de Maitre Pierre Faifeu en-
voyée à Messieurs les Angevins , par
Mercure, Herault & Truchement des
Dieux.*



D E P U Y S dix ans que je party d'An-
gers ,
En delaissant du monde les dangers ,
Je n'ay eu soing ou vouloir vous es-
cripre
Jusque à present , & n'en ferez que rire ;
Ce neaumoins sachez que par deça
Depuis long-temps personne ne passa ,
Dont sçeusse avoir tant admirable joye
Que maintenant , combien que tousjours je oye ;
La raisonnance & dulcifiant son ,
Des instrumens & celeste chanson ;
Car nous avons espinettes & orgues ,
(Ayans passé les tenebreuses morgues
Le feu purgeant la tache des delictz)
Miculx que n'avez plus doux & plus jolys :

3

Le temps me rit, mon plaisir renouvelle ;
Oyant de vous tant certaine nouvelle,
Par deux Espritz qui ne sont pas menteurs ;
L'un a esté la fleur de vos Docteurs,
Prédicateur, & de si sainte vie,
Que de l'avoir avions tous grand' envie,
C'est vostre plainct Maistre *Pierre Bourreau* ;
Il n'a rien craint le stigial thoreau ;
Ne sa clameur horrible & vehemente :
Car tout soubdain Minos & Rhadamante
Avec Cacus, vroyz Juges deleguez
Ont sceu de luy tant de biens alleguez,
Tant de vertus, jûnes, & abstinences,
Qu'il est bien peu de telles continences,
Aussi est-il lauré & couronné
Du plaisant cueur aux Docteurs ordonné,
Presque aux Martyrs ; car on a veu les picques ;
Et puiffans dards contre les Hereticques,
Que en son vivant tant vertueusement
Il a jectez impetueusement,
Par chascun jour en sermons & lectures,
En exposant les saintes Escriptions,
De aer paresseux ne fut onc vulneré,
Dieu a voulu qu'il fut remuneré,
Et l'a tirez sans plus estre en ruyne,
Au puant monde où erreur trop chemine.
Vous le souffrez & voyez bien les maux,
Que vous avez tant longz & anormaux,
Depuis le temps de leur meschante secte,
Que l'aer en put & la terre se infecte,
Et plus auront au monde auctorité,
Et plus aurez longue sterilité,
Guerre craintifve & horrible famine,
Qui tant vous runge, abbat, & examine.
Vous avez bien les cœurs adamantins,
De soustenir ces boucs puants mastins,

4

Luteriens & doctes en paincture ;
Faulx monnoyeurs de la saincte Escripiture ;
Qui par tous pointz ont quis & ramassé ,
Toutes erreurs mises du temps passé ;
Ce sont meschans apostatz attifez ,
Ceditieux , poignans , mal baptifez ,
Vroys macqueraux de leurs pere le Dyable ;
Et l'on ne mept le cas remedyable
Pour amortir leur infaicte poëson ,
Tout temps sera contraire à sa saison ,
Comme avez veu ces ans qui sont passez ,
Et entre nous qui suymes trespassez .
Crions à Dieu sur ces meschans vengeance ,
Qui chascun jour ostent nostre allegeance ,
En remonstrant que c'est trop sotte guise ,
De prier Dieu pour les mors en l'Eglise ;
Ce que j'en dis c'est pour vous advertir ,
Que meptez peine à iceulx divertir ,
Que vous voyez plonger en l'heresyse ,
Dont vous avez grant playe & punaisie .
Heureux me tiens estre deseparé
Du mocqueur monde, où j'estoye emparé,
Et ne voir point ceste mortelle playe ,
Que Dieu sur vous tres justement desploye .
Le defunct Maistre a prins ces jours plaisir ,
A me compter vostre grant desplaisir ,
Comme la terre a esté corumpuë ,
Dont plusieurs ont perdu mainte repeuë ;
Et qui plus est par faulte d'avoir bledz ,
De toutes pars sont pauvres assemblez ,
Crians , plorans par carrefours & ruës ,
Mesgressie fait ainsi ses escouruës ;
La mort aussi s'en vient d'autre cousté ,
Qui a rendu maint homme desgouté ,
Recongnoissez les dictz de nostre maistre ;
Et vous gencez pour lon remede y mettre ;

5
Ou autrement par la Mere de Dieu ;
Y fera mis remede en chascun lieu ;
La seule Mere est de Jesus commise ,
Pour interir telz puans de l'Esglise ;
Et cependant que cil plain de bonté ,
Ce que dessus m'a dit & racompté ,
S'en est venu ung Esprit Angelicque ,
Estant conduit de Mercure celicque ,
Que j'ay connu , c'est *Hardouyn Brahier*
Des nostres mis & tel le nombra hier
Dont ma grant joye est au double triplée ;
Sathan confus , & sa bende riblée.
Celuy venu m'a dit & declairé
Que l'on vouloit de moy faire ung narré ;
Si que jamais ne fusse mort au monde ;
Et sur ce poinct seullement je me fonde
A vous escripre, ainsi comme joyeux,
Pour vous donner confort à faire mieulx ,
J'ay agencé moy-mesme le pulpitre
Pour vous bastir & dresser ceste Espitre ,
Par ung esprit qui n'est point babouyn :
La divise est de Maistre Hardouyn ,
Vostre deffunct , duquel l'ame est puysee
Avecques nous en ce champ Helisée ;
A ma priere il a obtemperé ,
En ce lieu sainct , amene , & temperé ,
Vous supplians avoir de luy memoire.
Par plusieurs ans il print son escriptoire,
Pour vous dicter, en composition ,
Maintz haulx propos par bonne invention.
La nation d'Anjou a decorée,
Autant que nul qui soit en la contrée ;
Et vostre cueur sera désanobly ,
Si vous mettez sa memoire en oubly ,
Veu qu'il estoit tant armé de science ,
Et que en ces maulx il a eu pascience.

Ne doubtez pas qu'il ne me ayt recité ,
 Comme il estoit traicté & visité ,
 Des gros Seigneurs & d'autre populaire ,
 Et bien sçavoit en propos leur complaire ,
 D'avant mourir en faisant ses regretz ,
 Atteindre fist tous ses papiers secretz ,
 Livres plusieurs , pour les faire apparestre
 En feu flambant , & le tout par le Prebstre ,
 Qui luy bailla ses derniers Sacremens .
 De ce cas cy il m'a fait les sermens ,
 Que ce n'estoit sinon pour cause sainte :
 Car plusieurs sont qui ont la face sainte ,
 Qui en lysant de quelque joyeux cas ,
 Eussent poysé non point comme ducas ,
 Mais aucuns motz de sentence secrette
 Eussent donné quelque faulce interprete ,
 En en faisant sans plus leur mal profit ;
 Ce qu'il a fait est bien fait il suffit .
 Chascun congnoist ung ouvrier par ses œuvres ;
 Les serpentins plus infaitz que couleuvres ,
 Jugent tousjours à leur intention ,
 Des mots exquis , & ont contention ,
 Et qui plus est mouschent par les Provinces ,
 Pour mieux ouyr & rapporter aux Princes ,
 Ce qu'on n'a pas en ce point entendu :
 En ce faisant plusieurs ont pretendu
 Soy hault monter , par dangereux langaige ;
 Cil qui le fait le corps & l'ame engage ,
 Au Roy d'Enfer , & à ses chiens umbreux ,
 Et ont leur part au manoir tenebreux .
 Entre autres faitz il avoit fait ung Livre ,
 Lequel n'estoit de hault stille delivre ,
 Le bon *Cretin* eut esté empesché ,
 Touchant ce cas , de l'avoir mieulx couché ;
 Mais il congneust que flareuses louenges
 Ne plaisent pas ne à Dieu ne aux Anges ;

Plusieurs mondains, quant tout est debatū ;
Le plus souvent font de vice vertu :
Il le brusla ayant tres juste cause.
Cretin & luy , sans faire quelque pause ,
 Joyeusement ensemble ce divisent ,
 Et en ces champs les belles fleurs eslisent ,
 En decorant noz arbres si tres beaulx ,
 De haultz dictons & de riches Rondeaux ,
 Tant richement sentans leur Rhetorique ,
 Dont cil *Cretin* a eu la Theoricque ,
 Plus mellifluë entre les biens Sçavans ,
 Que n'ont pas eu tous aultres escrivans.
 Que voudra voir & lire sa Cronicque
 Des Roys François, sans sillabe erronicque ;
 Il trouvera de tant riches couleurs ,
 Que on ne sçauroit en dire les valleurs.
 Aussi avons le grant indictaire
 Que vous nommez feu *Maistre Jehan le Maire* ,
 Qui bravement fait ses narrations ,
 Et le recit des illustrations ;
 Par ces deux-là toute la Monarchie
 Des Gaulles est dorée & enrichie.
 Nous en avons tant d'autres avec eulx'
 Qui ont vescu espritz ingenieux ,
 Que qui voudroit leurs noms mettre & escripre ;
 Il vous faudroit plus d'un moys à les lire :
Alain Chartier qui haulte besonne ha ,
 Qui en son temps hardyment besongna ,
 Dont il acquist par œuvre meritoire ,
 Entre les Roys (sans grant proffit) grant gloire.
 Reconnoeffez que tant nobles espritz
 Ne sont jamais effacez ne peritz ,
 Vous en aurez à jamais rithme & prose.
Jehan de Meun tient son Rommant de la Rose
 Fort estimé en substance & en sens.
 Avecques luy dechiffre ses accens

Feu *Jehan Marot* plain de haultz *Leonines*;
 Le Chevalier *Philippe de Commines*
 Qui escripvit familièrement ;
 Et appetons tres singulierement
 Veoir *Meschinot* avecques ses lunettes,
 Il n'y a eu vivant soubz les planettes,
 Qui en son temps ait mieulx couché que luy.
George Tesmoing qui descript son ennuy,
Du Moulinet en *Sinonimes* passe.
 Brief nous n'avons en ce beau lieu espace,
 Que de bien dire en singularité,
 Sans desirer particularité :
 Mais une paix & volonté unye,
 Tranquilité & concorde infinie,
 Non comme vous vivans en corps mortel ;
 Car nostre amour & bien est immortel.
 Vous endurez froict, fain, challeur & peine,
 Labeur, douleur, & passion humaine,
 Tousjours querans substancialité,
 Avec l'ennuy de parcialité ;
 Et ne pavez estre long-temps en vie,
 Que vous n'ayez l'ung par sur l'autre envye.]
 Tous ces desirs & sensitifs humains,
 Font deshonneur & grant dommaige à maints.
 Quant tout est dict, ce n'est que une folye
 Que vostre monde, abus melencolye,
 Tousjours taschans avoir honneur mondain.
 Rien ne vous est en voir mourir soubdain,
 Sans dire mot ne avoir Clerc ou Prebtre,
 Dieu ne vous mept, ce semble, que pour estre,
 Deuz grans au monde, & les aultres passer,
 Et ne pensez qu'il vous fault trespasser,
 Maulgré voz dens & de vostre pecune.
 Tant plus avez & plus est de rancune,]
 Et de misere à vostre partement.
 De riches estre avez esbatement,

Et rappinez par une estrange forte ,
Et le plus foible à son col le fort porte ;
Et battissez tant de belles maisons ,
Mais à un cop vous fauldront les faisons :
Là trouverez que c'est bien pauvre chose ,
De ce que au monde en travail on dispose.
Si Dieu eust fait les hommes immortelz ,
La Terre fust toute plaine d'Hostelz.
Or faictes fort , mais vous mauldirez l'heure
Cent mille fois , de tant faire demeure
A vous congnoistre & descongnoistre Dieu.
Ne doubtez point que en cest immortal lieu
Puissons narrer chose qui ne soyt vraye ;
De nostre estat plus fort vous escriproye ,
Mais je cognois que de peu vous faschez ,
Et de sçavoir de moy plus ne taschez ,
Si non mes faictz pour gaudir & pour lire.
Je vous deffends pour tant mon nom descriptre
Ne deglosez rien aultrement que appoint.
Si je me sens deshonoré ou poinct ,
Par vostre escript que si bien on libelle ,
Je vous prometz que je yray en orbelle ,
Par voz maisons menant tant de luyttons ;
Et donneray tant de coups de bastons
Dessus voz litz, à l'heure qu'on sommeille,
Que n'oserez tirer pied ne aureille.
Ne pensez pas pourtant si je suys mort ,
Que vous n'ayez de moy quelque remort :
Il n'y aura Varlet ny Chambriere
Qui n'ayt grant peur en oyant la maniere
De ma tempeste, & nocturne tourment,
Si vous parlez rien en mon détrimet.
J'euz nom *Faisfeu* ; mais g'iray par les porches ;
Et porteray souches , boys , rondins , torches
En voz foyers , & feré feu ardant ,
Que aulchun de vous ne sera regardant ,

Et n'oserez remuer cul ne teste ,
 Quant sur voz litz vous orrez ma tempeste.
 J'ay bien voullu vous escrire en ce point
 Pour inserer ces motz tres bien appoint ,
 Devant que escrire aucuns cas de mes Actes.
 Les motz sont bons pour servir de stigmates
 Dedans voz cœurs , & n'est rien seulement ,
 Fors vous donner ung advertissement
 Qu'il faut mourir, rendre devant Dieu compte;
 Et notez bien ce que je vous raconte ,
 Car ce sera plutoit que n'esperez :
 Parquoy convient voz œuvres temperer.
 Si j'ay le loy plus avant vous escrire ,
 Le Dieu Mercure yfra pour le vous dire.
 Faictes grant chere , & priez Dieu pour moy ,
 Qui m'a osté de tout mondain esmoy ;
 Par *Hardouyn* qui fut de grant valluë.
 Faisant la fin en ce point vous saluë
 Priant celuy qui fist Ciel, Terre & Mer,
 Vous preserver de tout tourment amer ,
 Et vous doint grace en ce peregrinage ,
 De Paradis acquerir l'heritage.
 Le moys de May aux champs Helysiens ,
 Où sont fluans tous fruietz Ambrosiens ,
 Là où challeur aucun de nous n'estuë ,
 Et où le froit jamais ne s'esvertuë ,
 Où fain & soif n'ont aucune puiffance ,
 Mais toute joye & parfaicte plaisirance.

Grace & amour.

Fin de l'Espistre dudit Faisen.

Io, Da, Org.

S'ensuyvent les gestes dudit Maistre
Pierre Faifeu, composez par Mai-
stre Charles de Bordigné Prebtre,
le tout au long comme ilz s'ensuy-
vent.

*A tous nobles Lecteurs ayans voulloir & affection de
veoir choses nouvelles, plaisantes, & facescienses,
pour passetemps & recreation tant seulement, non pour
detracler & par envye mal dire especiallement de ce
présent petit œuvre (toutefois mal & rudement com-
pillé & ordonné) intitulé les faictz & dictz jo-
yeulx de feu Maistre Pierre Faifeu Escollier natif
d'Angers; aussi & pareillement à toutes honnestes cor-
rections & reveuës, le compillateur d'iceluy humble
recommandation & amyable salut.*

E P I S T R E.



NO BLES Lecteurs qui fort dele-
ctez veoir,
Ne vous faschez de mon petit sçavoir
Qu'ay applicqué, en faisant collecture
De ce libvret, dont vous orrez lecture.
Ce sont les faictz de feu *Pierre Faifeu*,
(Natif d'Angers) quelz au mieulx que j'ay sçeu,
Ay retiré de maintz Seigneur & Dame,
Qui bien l'aymoient, voire de corps & de ame.
Non présumant d'aucun l'honneur bleiser
Ne oppresser, ou en rien rabaisser;
Mais augmenter de toute ma puissance,
(Aidant mon Dieu, car rien je ne puy sans ce.)
Si je y metz rien qui ne soit à plaisir,

Je vous supply' ne prendre en desplaisir;
 Mais l'excuser; quar ainsi qu'on le conte;
 Je l'ay escript & icy mis en compte:
 Je ne l'ay veu, dont n'en sçauroys parler
 Que par ouir; mes son renom par l'aer
 Court & bruiet fort, par quoy prens adventure
 Les rediger & en faire ouverture,
 En protestant ne voulloir abuser,
 Ne de mesdire aulcunement user.
 Sy je le faictz, pour Dieu ne soit admys,
 Mais pardonnez, si rien je y obmys,
 Ou bien trop mis, à la faulte on pardonne.
 Pour supplier cette Espistre à part donne
 A vous Lecteurs, si que facez pardon,
 A mes déffaultz joyeusement pardon;
 Car mainteffois on voit bien par donner,
 Les grands déffaultz & erreurs pardonner.
 Priant à Dieu qu'il vous vueille resduyre,
 Les lire & veoir & gentement desduyre,
 Bien les goulster; puis par faictz & par ditz,
 Vous translater en son hault Paradis.

Amen.



*Au troncq de tout honneur, surgeon, branche ou jetton;
 produyt du tige de vertu, source mellifluant tres ame-
 nes, delectables, savoureuses & dulcisonantes musique;
 Rbetoricque, & trop suave eloquence, sublevateur,
 vray support, soustien, & tres ferme consonne, lan-
 ce, armes, & invincible escu des Chevalliers Errans,
 soubz le credit & à la poursuytte d'icelles, tres vene-
 rable & discret mon tres cher Seigneur, Monsieur
 Maistre Jehan Alain Prebstre, Bachelier ès droictz,
 Abbé Commendatoire du Cenobe ou Abbaye du Perray-
 neuf, de l'Ordre de Premonstré au Diocese d'Anjou,
 & Chanoine en l'Eglise Royal & Collegial Monsieur
 Sainct Lo, lez la Ville d'Angers, Vostre tres-humble
 serf, petit disciple, & obeysant Chappelain, Char-
 les de Bordigné, Salut avec tres-humble obeysance.*



M ON tres-cher Sieur pour à vous me
 allier,
 Ung jour estoys comme familier,
 Avecques vous, où de la vostre grace
 Benignement, dont pas je ne me
 Me teniez plusieurs joyeux propos, [esgace,
 Y alleguant maintz gayz & gens suppostz;
 Entre lesquelz mistes en apparence,
 Pierre Faisen, ayant en esperance,
 Que j'en diroys quelque bon conte ou faictz:
 Quar disiez que plusieurs en a faictz,
 Mais pour le temps je n'en sçavoys nulz faire.
 Or congnoissant de vostre estat l'affaire,
 Et que sur tous cas joyeux vous amez,
 J'ay tant cherché & ferré les rametz,
 En plusieurs lieux, que selon ma puissance,
 Petit sçavoir, & infime science,
 En ay trouvé grant portion & part,
 Que ay bien voulu mettre & escrire à part;

En esperant de vous faire service ;
 Et regardant que c'est à ung Serf vice ;
 Ne mettre peine à complaire à son Maistre ,
 Je m'y suys mys & bien voulu soubzmettre.
 Auffy l'ay fait & ainsy je l'entends ,
 Que plusieurs gens y prendront passetemps ,
 Mais j'ay voulu sous vostre adveu le faire ,
 Quar soubz meilleur je ne le scauroys faire.
 Pour ce Monsieur qu'il me soit advoué ,
 Et que par vous ne soys desadvoué ,
 Aultre guerdon de vous je ne demande ,
 Si non que soys par vous tins en commande.

Adieu.

L' A C T E U R.



TOUT endormy , songeard , melan-
 colique ,
 Ung jour de Apuril, comme ung vroy
 Catholicque,
 Que les oyseaulx commencent jar-
 gonner ,
 Au temps Pasqual que don Apostolicque ,
 Sayges & foulz de bon voulloir , colique
 A saint Trotter ung chascun va gaigner ,
 En plusieurs lieux sans argent desgainer ,
 Me transporte faire mes stations :
 Qui doibt argent craint les citations.

Me pourmenant , ung Rouffignol s'esveille ;
 De son doux chant tresfort je me esmerveille ,
 Quar il disoit en son chant , fy , fy , fy ,
 Fy, de dormir , fy d'Homme qui sommeille ,
 Fy de songeard , fy d'Homme qui ne veille

A son honneur; alors je vous affy ;
 Que j'heu bien peur & ung tres grant deffy
 De perdre honneur, par ma grant nonchallance ;
 Veu qu'on ne acquiert sans bien grant pourchatz
 [lance.

Je l'escoutte , lors commença à dire,
 Tournant son chant mieulx que une harpe ou lire,
 En chant bien doux , & playfant ; suy , suy , suy ;
 A l'escouter je ne peuz contredire ,
 Mais suis faché quasi rencontre de ire
 Que ne le voy , & il semble estre icy ;
 Car il disoit , vien tost , aussy , aussy ,
 Ne sois lassé ; le gaing est à poursuyvre :
 Tel va bien tost , qu'on aconsuyt pour suyvre.

Le poursuyvir je me mis en la chasse ,
 Tant me plaisoit ; sans batton ou eschasse ,
 Je le suivy , par montz , par vaulx , par plains ,
 Autre desduyt d'avecques moy je chasse ,
 Car nul plaisir , fors le veoir , ne pourchasse ;
 Mais je ne puis , dont tres fort je me plains ,
 Et nul ne voy à qui en face plaincts :
 Lors je pensoys estre cheut en feyerye ;
 Qui joyeux est , bien il fault que en faitz rye.

En ce penser me metz à l'aventure
 De plus en plus , pour veoir quelle aventure
 Pourroys trouver , suyvant ce bel oyseau ;
 Car de l'ouyr c'est chose oultre nature ;
 Nul plus doux chant par B mol ou nature
 Oncques ne ouyt Dame ne Damoyseau.
 En ce desert , où avoit maint roseau ,
 Vase arrester , là me metz à l'escoutte ;
 Escot donné , vault mieulx que cil qui couste.

A escouter , son chant m'a endormy ,

Non pas du tout , mais quasi à demy ;
 Lors fuz tombé resvant en tremblerie ;
 Plus n'avois soing ne de fa ne de my ,
 Ne de parents , parentes , ne de amy ,
 Oncques ne fuz en telle diablerye ,
 En tel tourment , ne sçay quel diable rye ;
 Plus n'heu remors ne de chant , ne de oyseau ;
 A bon yvrongne il ne fault jamais eau .

De ce dormyr , qui tant me a tourmenté ,
 Tout mal content , le cerveau evanté ,
 Suys eveillé en grant esbahyffance ,
 Pourtant qu'ay veu qu'on m'avoit absenté ,
 Et transporté sans mal , mais en santé ,
 Du premier lieu où fis obeyffance
 Ouyr l'oyseau ; parquoi je heuz deffiance
 Avoir esté en ce lieu enchanté :
 Souvent veoit-on pleurer qui a chanté .

En tel ennuy , pour me cuyder retraire ,
 Charche chemin ; mais on me vint soubztraire
 Incontinent , car je ouy à travers
 Bien hault sonner une clochette & traire :
 A y aller nul ne me fut contraire ,
 Moyne ou Nonnain , Jacobin , ou Convers ,
 Fors le desert qui fort estoit divers ,
 Je tiray là où je ouy la clochette :
 Bon crocheteur toutes portes crochette .

J'ay tant erré par chemin & par voye ,
 Tantost le droict , & puis je me desvoye ;
 Mais tant ay fait , que j'ay veu ung parquet
 Tout cloz à mur , le bon Dieu me pourvoye
 Sy je congnois que c'est tant de près voye ,
 Fors que dedens y avoit grant cacquet :
 Tous mes espritz mis tost en ung paquet ,

Pour

Pour adviser sy rien pourray congnoistre :
Pas grant sens n'a cîl qui ne fait que naystre :

Je m'approchay au plus près de la porte ,
Bien peu hardy , de y entrer me deporté
Comme honteux ; mais soudain le portier ,
Nommé Bon-cœur ; envers moy ce transporte
Avecques clefz , lesquelles il m'apporte ,
Et me disant sy vous deportiez
Entrer ceans , pas ne emporteriez
L'heur d'avoir veu ceulx qui sont cy posez :
Souvent lassez ne sont pretz reposer.

Quant je aperçeu que Bon-cœur me commande
Entrer leans , à luy me recommande ,
Le suppliant qu'il me face support
Sy j'ay mestier ; lors il me dist , au port
Tu es venu , qu'en advant te fault mettre ,
Pour rediger ou en prose , ou en metre
Les faitz & ditz de ceulx qui cy reposent ,
Que les mondains jà perduz presuposent.
Je m'excusay ; mais Bon-cœur ferme l'huy
Quant fuz entré , lors je m'esvanouys
Quasi de peur de veoir tant de tombeaulx ,
Epitaphes , & funereux lambeaulx ,
Tombes , cercueulz , sepultures , & lames
Où gysent corps evacuez des ames.
Bon-cœur me dist , pas icy ne demeure ,
Car temps il n'est encores que tu meure ,
Je te merray où verras les Esprits
Des corps gysans , pas n'auras en despris
Mettre en escript de chascun la requeste ;
Puis bien soudain auras finé ta queste.
Tout traversé tant par faitz que par ditz ,
Vinsmes entrer , quasi en Paradis ,
Au lieu nommé les beaulx champs Elisées ,
B

Où on nous fist grant cheres & risées.
 Là je trouvé Pappes & Patriarches,
 Archevesques, Cardinaulx plaines arches;
 Abbez, Curez, Evesques, Archeprebstres;
 Gens Seculiers, Nonnains, & simples Prebstres;
 Empereurs, Roys, Ducz, Archeduz, & Contes,
 Barons, Seigneurs, dont je ne sçay les comptes,
 Marchans, Bourgeois, Roturiers, Laboureaux;
 Lors mon esprit fut fort laborieux
 Conjecturer que tout ce pouvoit estre,
 Veoir tant d'Espritz reposer en tel aestre.
 Bon-cœur me dit, me voyant en tel point,
 Très cher amy, or' ne t'esbahys point,
 Car ce lieu cy est la propre demeure
 D'Esprit joyeux, sans que jamais il meure;
 En ce lieu cy n'y a que gens gaillards,
 Qui ont esté gaudisseurs & raillards;
 De ce lieu cy s'enfuyt melencolye,
 De-peur que nul au cœur ne au col lye;
 De ce lieu cy sont chassez tous contemps;
 Riotz, desbatz, noysettes, & contends;
 En ce lieu cy ne habite point de bruyt,
 Que de plaisir, qui à tousjours y bruyt;
 Brief ce lieu cy est dist Parc de plaisir,
 Où tous Espritz vivent sans desplaisir.
 Les regarder jamais ne me lassasse,
 Car en ce lieu n'a barat ne fallace,
 Fors joye, & rys; soucy est en oubly;
 Le lieu est fort de baulté ennobly,
 Y demourer sur tous lieux je voudrois,
 Car c'est un lieu plaisant en tous endroictz.
 De toutes pars je fuz environné
 Des assistans, & d'eulx arraisonné
 Que je queroys, & qui vers eux me meine
 En leur manoir, & tant plaisant domaine.
 Bon-cœur respond que vers eulx m'a conduyt.

Pour les seruyr, & pour prendre desduye
 A rediger tout, à leurs appetiz,
 Ce que voudront tant les grans que petitz,
 Les faitz joyeux, non pas grandes cronicques,
 Faitz belliqueux, ne les ditz canoniques,
 Tous il les laisse aux Hystoriographes,
 Ce leur partient passer par soubz leurs graphes,
 Car il ne veult entreprendre à leur affaire,
 Quant le voudroit il ne le sçauroit faire.

Lors tout soudain qu'ilz virent mon voulloir,
 Tous de grant cueur, sans en rien leur doulloir,
 Vont racompter chascun en sa partye
 Leurs faitz & ditz, leur aller & partye,
 Leurs tours subtilz, leur petit passetemps,
 Qu'au monde ont fait pour faire passer temps,
 Leur entretien que ont fait en amourettes,
 Les promesses transmüées en sornettes,
 Pour paruenir par sur leurs entreprinnes,
 Ce gaudissant au monde ilz ont aprinnes;
 Mais pensent bien que plus n'en soit memoire
 En nul endroit, ès loix, ne en grammoire:
 Parquoy me prient que tout mette en escript,
 Dont fuz troublé, & quasy tout perscript;
 Car ilz estoient si grande multitude,
 Que n'en pourrois prendre sollicitude.
 Mais tout soudain je me voys adviser,
 Et à par moy subtilement viser,
 Que de tous ceulx que veoyz en presence,
 On a escript par grande preference,
 Là je congneu Patelin o son drap,
 François Villon, & autre maint satrap,
 Jehan le Seure, & Jehan de Mandeville,
 Maint affronteur & de Bourg & de Ville,
 Quelz en leur temps souvent se sont desdultz
 Faire creditz, sans les avoir resdultz,
 Mais à gaudir mettoient leur estudye.

De tous entr'eulx pas je ne sçay que dye,
 Fors que leur dys, que par fort grande estime
 Leurs faitz on voit tant en prose qu'en rime
 Par chascun lieu, voire jusqu'à Paris,
 En nul endroit leurs noms ne sont perys.
 Les assistens tous de moy sont contens,
 Mais Bon-cueur vint, qui me dist; je n'entens
 Que de ceans en vain tu t'en retourne.
 En ce disant, mon visage je tourne
 Devers Bon-cueur, lors je vy en ung angle
 Ung compagnon, ayant sa robe sangle,
 Qui bien sembloit avoir esté galland,
 Mais de primsfault ne congneu tel allant.
 Quant me apperçeut, son escabeau, ou chaefre
 Il laissa là, & me vint faire chere.
 Je le congneu pour tant qu'il a fait feu,
 A bien gaudir; c'estoit Pierre Faifeu.
 Pour m'accoller de bon cueur se rebrace,
 Et volentiers joyeusement m'embrace,
 Me suppliant, sans noise & sans riotte,
 De bon vouloir, par amour patriotte,
 Sy rien on n'a de luy mis par escript,
 En rediger je ne prengne despit.
 Je luy responds n'avoir en congnoissance
 Rien estre escript, mais bien de sa naissance
 Je sçay le lieu, dont de grant volenté
 L'amour du pays m'a fort entallenté
 Faire son vueil, moyennant qu'on me conte
 Ses faitz, de quoy on pourra tenir conte.
 Lors me bailla en ung petit papier
 Ce que s'ensuyt, pour tost le copier,
 Me requerant, qu'en donnasse le double
 A ung Seigneur, duquel l'honneur redouble,
 Notable Abbé, Chanoine très discret,
 Mixte en sçavoir, en loix, & en decret,
 Tant que l'on voyt, voyre jusque à bien loing

21

Son nom florir, c'est Maistre Jehan Alain ;
 Luy suppliant que pas ne soit si lasche
 Tant le celer, que chascun ne le sache.
 Son dict ouy, je prins de luy le Livre,
 Par le conseil de Bon-cueur me delivre
 Le copier, comme on m'a fait requeste,
 Avec espoir de tost finir ma queste.

*Comment Maistre Pierre Faifeu com-
 mença aller à l'Escolle.*

C H A P I T R E P R E M I E R.



L y avoit tout au commencement,
 Qu'il fut bien temps pour son avan-
 cement
 Que estudiaft, on l'envoye à l'Escolle;
 Mais son esprit, si comme je recolle,
 Estoit tant gay, tant plaisant, & joly,
 Que de plaisir il estoit tout poly,
 Fort inventeur, selon son petit aage,
 De quacquetter & dire il faisoit rage,
 Tant que jamais à nul il n'ennuyoit,
 Mais ung chascun de ses gestes ryoit :
 Les gros Seigneurs l'avoir avoyent envye ;
 Autant qu'enfant qui pour lors fust en vye ;
 Pour ung enfant c'estoit le nompareil,
 Je crois que au monde il n'avoit son pareil.
 Ung jour advint, entre ses fais joyeux,
 Pour ses deffaultz, dont il ne fut joyeux,
 Sa mere a dit qu'il auroit la fessée ;
 Dont de tel fait il cheut en grant pensée,
 En meditant maniere de eschapper :
 Il luy faschoit de se laisser happer ;
 Or tout soudain trouva une cautelle.

Sa dicte mere avoit coustume telle,
 De le lever souvent au fault du liect,
 Qui n'estoit pas pour luy trop bon deliect.
 Il est ainsy qu'il eust ung autre frere
 Plus viel que luy, dont pour mieulx se defaire
 D'estre fessé, il se couche en sa place,
 Subtillement de son lieu se desplace,
 Et fait le guect quant sa mere viendroit
 Au plus matin secretement vint droit,
 Cuydant trouver au liect le vaillant homme;
 Mais se lever je croy que pas ne chomme,
 Elle s'adressa où le pensoit trouver,
 Subtillité n'est que de controuver,
 Car a trouvé son grant frere en son lieu,
 Dieu sache bien s'il y eut du beau jeu,
 Il fust fessé, car il fut prins pour l'autre,
 A poys de escu, & d'un cousté & d'autre.

*Comment quelquefois qu'il estoit à l'Escolle
 son Maistre luy baillant la fessée,
 il effoira.*

CHAPITRE II.



N ce temps-là qu'il ensuyvoit l'es-
 colle,
 Son Precepteur, Regent, ou Prothe-
 colle
 (Pourtant que bien ne sçavoit sa
 Ou pour rager, ou par quelque fazçon) [lezçon,
 Luy decouvrit sa maison par derriere,
 Sans qu'il se sçeust retyrer en arriere;
 Mais quant congneut ne pouvoir eschapper,
 Sans mener bruyt, ou nullement tapper,
 Il fit beau cul tout au droit du visage

Du Precepteur, quel voyant telle ymage
 Cuyda frapper, mais le vaillant poulet
 Luy a tyré de son cul ung boulet,
 Non pas si dur que plomb, ou cuytte terre;
 (Aussy n'en eut si dangereux catterre)
 Mais luy bailla de la foyre à travers
 De son muscau. Vous escripre en trois vers;
 Non pas en cent je ne sçauois la honte
 Que eut le Regent, pour faire fin de compte;
 Car pour certain il fut sy empesché
 A se effoyer, que Faifeu despeché
 S'en est allé, car il ne l'a sçu battre
 Pour la pueur. Or croyez sans rabbatre;
 Que qui eust deu tous les enfans tuer
 Qui là estoient, on ne les peust muer
 A rire, tant que c'estoit grant merveille;
 Dont le Regent grandement s'esmerveille;
 Et a repris Faifeu par grant despit,
 Qui respondit sans faire long respit;
 Monsieur, pour vray de ce me vueillez croire;
 Que pas ne sçay comment j'ay heu la foyre,
 Mais si sentez que soiez offencé,
 Pardon requiers, & que soys dispensé
 Estre battu, car j'ay tant mal au ventre,
 Qu'il m'est advys que le grant Dyable y entre.
 Ainsy Faifeu eschappa en ce point;
 Il n'est qu'auoir subtilité à point.



*Comment il avoit subtillement argent de
sa mere.*

CHAPITRE III



PRES avoir esté par ung long-temps
A la grimaulde, il faillut changer
temps.

Aller au Droit pour y avoir pratique ;

Mais comme on veoit que plusieurs, par trafficque,
Font desbaucher maint enfant de maison,
Leur faisant perdre & leur temps & saison,
Les conduisant par fazçons trop subtiles
En plusieurs lieux, & choses inutiles ;
Le jeune gars qui tant d'esprit avoit,
Fut toust seduict ; mes pas il ne sçavoit
Quel dommaige est que de perdre l'estude ;
Tost en hait & Libvres & estude,
Et se accointa de joueurs & pippeurs,
De gaudisseurs, yvrongnes, & lippeurs,
De chascun jeu tost fut bon maistre en somme,
Autant qu'on heust peu trouver joucque à Romme,
Mes comme on voit tousjours ne gaignoit pas,
Tout son argent perdoit toust que le pas,
Puys ces amys en avoient peine amere,
Et bien souvent le disoient à sa mere ;
Parquoy n'ousoit ce trouver à l'hostel ;
Mes son moyen de appoincter estoit tel ;
Quant il sçavoit sa mere aller à Messe,
Il s'en venoit comme une grande asneffe
De Libvres plain, qui souvent n'estoient siens,
Mes emprunctez d'aulchuns Practiciens.
Alors passoit doucement devant elle,
Puis à aucuns qui estoient avec elle

Elle se plaignoit qu'on luy raportoit faulx
 De son enfant, qu'on luy dit estre faulx.
 Les compagnons respondent; c'est mal fait,
 Car nous sçavons qu'en science est parfait,
 Et apprend fort bien, comme vous voyez,
 Vous faictes mal de ainsy le forvoyez
 De vostre hostel. Doncques la bonne femme
 A veoir ce creu, se reputoit infame,
 Et adjoustoit foy au dit des mignons,
 Qui bien souvent estoient ses compagnons.
 Lors tout soudain envoioit s'enquerir
 Si on l'avoit veu, & bien fort requerir
 De retourner; puis il luy fait à croire
 Que des Livres il s'estoit fait acroire,
 Et d'autres cas, dont il avoit mestier
 Pour soy servir; il sçavoit son mestier
 Mener si bien, qu'il avoit sa demande
 A son plaisir, sans en payer amende.
 Puis son cas fait, retournoit à l'esbat
 Aux compagnons; Dieu sache le sabbat
 Qui estoit là, tandys que l'argent dure,
 Il ne craignoit ne chaleur ne froidure,
 Tout nud dansoit, buvoit jusque à minuyt,
 Ne fut onc veu si glorieulx desduyt,
 Il se changeoit, il se tournoit la face,
 Il engoulloit ung verre, une tace,
 Il gambadoit, il faisoit le badin,
 Oncq' on ne vit ung plus parfait landin;
 Il basteloit, jouoit de passe-passe,
 Bref il n'estoit en compagnie ou place
 Où il ne fust par tout le bien venu,
 Tant que duroit son bien & revenu,
 Des gaudisseurs de toute la province
 Sans en mentyr il en estoit le prince;
 Ung pot de vin, comme emmy ung housseau,
 En son gosier jectoit ce damoyseau,

Comment il avalla du lamprion tout vif.

CHAPITRE IV.



LE compagnon, pour faire le plaisant,
 Feist ung bon tour, dont puis fut des-
 plaisant ;
 Car certain jour du lamprion il
 print,
 A l'avalier tout vif il entreprint,
 Bref il en print je ne sçay pas le nombre,
 Il l'advalla ; mais Dieu sache l'encombre
 Qu'il luy a fait, car aux boyaulx le grappe,
 Mieulx luy vaulsist avoir la goutte grappe,
 Si n'eust esté ne sçay quel' medicine
 Que soudain print, ou de herbe, ou de racine ;
 Le compagnon eust eu son dernier metz :
 Mais il jura sa foy que desormais
 Ne se joueroit avec ung tel bagaige,
 Car pour cuyder gagner ne sçay quel gage,
 Il s'estoit mis en ce fol assieffoire,
 Dont pire fut que s'il eust eu la foyre.

Comment il deroboit les oayes à sa mere.

CHAPITRE V.



A PRES advint, faisant ses passe-
 temps,
 Que chez sa mere avoit, comme j'en-
 tends,
 Pour engresser grant nombre d'oayes
 Pour les avoir le galland se remuë, [en muë ;
 Et va penser comme il luy failloit faire

Pour mettre à fin subtilement l'affaire :
 Le bon enfant droit s'en va au marché ,
 Après qu'il eut son cas bien remerché ,
 Et achepste oayes qui n'estoient gueres grasses ,
 Puis les posa , en faisant noyses basses ,
 Emmy la cage où les grasses estoient ,
 Et emporta les grasses en ce point .
 Sa mere estoit toute esbahye comment
 Ce cas alloit , veu que tant & souvent
 Faisoit penser ces oayes , qui tant sont maigres ;
 Et de ce fait par paroles bien aigres
 Tensoit souvent ses gens , & leur disoit
 Que c'est leur faulte , & fort les mauldiffoit .
 Mais le mignon tant de fois fist le tour ,
 Qu'on s'en douta , parquoy ne fist retour ,
 Mais quand revint certain jour chez sa mere
 Elle l'en reprint par façon bien amere ,
 Luy defendant venir à sa maison ;
 Mais il respond que ce n'est pas raison
 Le forbannyr ainsy sans apparence ,
 Et luy promist que , par experience ,
 Si telz larrons vouloient plus retourner ,
 Il les rendroit en tel point attourner ,
 Qu'on congnoistroit ce n'estre point son vice .
 Lors tout soubdain , sans faire long service ,
 Il s'en partist , & pour le faire court ,
 Aux compagnons joyeusement acourt
 Pour desjeuner , gaudir , faire grant chere ,
 Ausquelz conta , sans faire grande enchere ,
 Que à la maison de sa mere y avoit
 Oayes grasses tant , mes pas il ne sçavoit
 Comment pourroit en avoir à l'emblée .
 L'un des gaultiers étant en l'assemblée ,
 C'est tost offert aller avecques luy ;
 Ce qu'il conscent , & de fait icelluy
 Le va mener tout droit à la maison ,

Or il failloit, sans aucune achoison,
 Par sur ung puitz qui respond en la ruë
 Entrer leans; Faifeu ne fut pas gruë,
 Entre premier, l'autre le fuyt après,
 Sans le laisser nullement que de près.
 Quant eurent prins des oayes à leur plaisir;
 Veullent sortir sans avoir desplaisir;
 Faifeu bailla les oayes à son consort,
 En luy monstrant la maniere qu'on sort,
 Cuydant sortir, le glorieux luneau
 Tumba du hault du puyz jusques en l'eau.
 Lors s'escria, à l'aide; je me noye.
 Faifeu s'en va, & laisse luy & l'oaye,
 Et se coucha en sa chambre à part soy,
 Si qu'on ne dist que ce venoit par soy.
 Les serveurs trouverent le marchand,
 Qui bien estoit acoustré en meschant,
 Car sans secours bien tost se fust noyé,
 Le cas par luy ne fut pas regnoyé;
 Car lors Faifeu fut trouvé en son liët,
 Dont il ne fut accusé du delict.

*Comment il trompoit sa mere pour aller
desjeuner quel ne fust en la maison.*

CHAPITRE VI.



UN autre tour faisoit-il bien sou-
 vent,
 Quant en sa bource il n'avoit que du
 vent,
 Et qu'il n'avoit o luy denier ne maille,
 Ne luy servoit ne rime ne rimaille,
 Ses beaulx parler, son glorieux quacquet
 Lors n'eussent sçeu luy servir d'un bancquet

Pour desjeuner; bien advisoit le temps
 Que l'heure estoit sans noytes ou contends
 Sa mere aller à l'Eglise, à la Messe,
 Quant elle orroit sonner à la Paroisse.
 Or s'en alloit le vaillant Chretien
 Sonner la cloche à Monsieur Sainct Julien,
 Où ny avoit nul Prebtre, qui chanter
 Eust nul vouloir; mais pour mieulx l'enchanter
 Faisoit le guect, quant venoit d'un cousté,
 D'un autre alloit, non pas trop desgousté,
 Incontinent en l'hostel se fourrer,
 Où bien sçavoit son hocqueton fourrer,
 Acompaigné de plusieurs vaillans gens,
 Qui d'un denier souvent n'estoient regens.
 Si à l'hostel y avoit de bon vin,
 Croire bien fault qu'au service Divin
 Ne le mettoient, mais luy tyroient l'aureille;
 Puis emportoient chascun une bouteille
 Pour le disner, aussi mainte autre brible;
 Contre son veuil serviteur ne regibbe,
 Car il les eust bien à son gré frottez,
 Et hors l'hostel fort soudain fait trotter.

Comment sa mere luy ferma la cave, & comment il s'en vengea.

CHAPITRE VII.



A mere ung jour voulut aller aux
 champs,
 Et le mener; mais laisser ses marchans
 Il ne voulut, contrefaisant le grave,
 Pensant pour vray que les clefz de la
 Luy laisseroit: ce que pas elle ne fist, [cave
 Mais s'en alla, & de luy se deffist,

Cuydant gagner de luy par telle cautelle.
 Le bon marchant fut beaucoup plus cault que elle,
 Car tout soubdain qu'el' eust le doz tourné,
 A la cave son chemin a tourné,
 Dont tout-à-coup il leva la ferreure,
 Et ses consors y mena à celle heure.
 Là beurent bien, & firent gaudion,
 Mainte chanson, maint fault & tordion
 Ilz firent là par sept ou huyt journées;
 Filles plusieurs y furent adjournées.
 Quant eut bien fait grant chere à son plaisir,
 Et ne craignant à faire desplaisir
 Nul à sa mere; il s'en va où estoit,
 Et du celier la claveure portoit.
 Quant elle a veu sa claveure penduë,
 Luy demanda, quasi comme esperduë,
 Qui le menoit, & que c'est qu'il portoit;
 Il respondit, pourtant qu'elle apportoit
 La clef du vin, la claveure il emporte,
 Affin que nul ne rompist pas la porte.
 Sa mere fort de ce fait le tenfa,
 Mais pour ce rien ne l'en recompensa,
 Sinon qu'il dit, & bien fort il afferme,
 Qu'il rompra tout si la cave on luy ferme.
 Voyant ainsy que ce il afferma
 Oncques depuis la cave ne ferma.



*Comment il se vengea de seur Macée la
devotte , qui le faisoit tencer à sa
mere.*

CHAPITRE VIII.



L y avoit en la Ville d'Angers
Ung lorpidum, qui par tout sans dan-
gers
Se transportoit, si bien je la denotte,
Elle avoit nom Macée la devotte.

Or est ainsi que souvent gouvernoit
La ditte mere, & si la subornoit
A menacer son fils, & le reprendre
De ses malfaits. Doncques il faut comprendre
Que le mignon n'en estoit pas content,
Car bien souvent il la trouvoit contant
Avec sa mere, & luy faire rapport
De ses follyes, dont perdoit son support
Par son moien, & par telle raison,
Qu'il ne se osoit trouver en la maison.
Advint un jour, sans faire grant quacquet,
Que le galland se accrocha au paquet
Où se pendoient les clefz de ceste vieille,
Subtillement, que ce fut grant merveille,
Ce temps pendant qu'à sa mere comptoit
Ses facheries, & ses faitz racomptoit,
Et luy robba la clef de l'huys devant
De son logis, puis luy soubdain devant
S'en va querir une fille de joye
Secrettement, sans que nully la voye,
Et la posa, si bien je me remembre,
En l'enfermant toute seule en la chambre
De la vieille, & là fist en telle forte,
Que rapporter à ung chascun se assorte,

Que pour certain la vieille luy a mise
 Pour la livrer à qui elle l'a promise
 Pour son plaisir ; comme vraye macquerelle.
 Or pour suyvir mon dit & ma querelle ,
 Le mistoudin , pour parfaire son cas ,
 Ne demande Procureurs n'Advocat
 A rapporter celuy fait à sa mere ;
 Mais il s'en vint faignant douleur amere ,
 (Or toutesfois après qu'il eut renduë
 Subtillement , & très bien renduë
 A la vieille sa clef à son costé.)
 Il a parlé , comme tout desgousté ,
 En regardant la vieille de travers ;
 Il dit ainsi : ma mere , à l'envers
 Est vostre esprit de croire à ceste vieille ,
 Qui à tout mal songer nuyt & jour veille ;
 Qu'il ne soit vray , ma teste soit hachée
 Sy maintenant chez elle n'est caschée
 Quelque Putain , qu'elle garde à quelque Moine ;
 Je vous supply' , sy vous n'avez esloine ,
 Allez y veoir , sy que je n'en soit creu ,
 S'il n'est ainsy , je suys tins pour recreu.
 La povre vieille estoit de son faict seure ,
 Ce luy sembloit ; parquoy fort elle assure
 A la Faifeüe , & bien fort la requiert
 Y aller veoir , aultres choses ne quiert
 Ce qui fut faict , mes bien fut estonnée
 Quant y trouva ceste fille atournée ,
 Qui affermoit pour vray , comme dessus
 Dont pour finir , & venir au parsus
 De ce conte , la povre seur Macée
 De la maison elle fut bien desmacée ,
 Et oncques puis ne s'y oulsa trouver
 Voiez la que c'est que de faulz controuver.

*Comment il joua publiquement ung Boul-
lenger qui avoit faict ung enfant à sa
Chamberiere.*

CHAPITRE IX.



UN G Boulenger en la Ville d'Angers,
Ne craignit point à ce mettre ès dan-
gers,

Ung jour qui fut prier sa Chamberiere
Faire cela, non obstant que eust en bie-

Ou en couche sa femme en sa maison ; [ré
Et la fillette où n'avoit grant raison,
Mes simple estoit, le voullust bien souffrir
Ce moyonnant qu'il se voullust offrir
Que ce seroit par nom de mariage,
Quar elle avoit comprins en son couraige,
Par ouyr dire à sa mere aultreffoys,
Qu'en ce faisant on acquiert mainteffois
Femme ou mary, dont elle fut contente.
Le Boulenger consente bien son entente,
Et le luy fist par nom de mariage,
Mais il survint ung aultre quariage,
Quar la fillette heut soubdain ung enfant ;
Le Boulenger non obstant luy deffend
Ne le dire, mes tout soubdain fut sçeu
Par la Ville ; & lors Pierre Faifeu,
Qui pour present estoit de la Bazoche,
Ne le garde, mais tost le met en broche,
Car pour certain à Karesme-prenant,
Luy qui n'estoit de follyes apprenant,
Mais Maistre en chef, & du corps bien disposé,
Des gaudisseurs le principal suppost ;
Pour mieulx jouer à la vraye verité,

Le cas qui est cy-dessus recité ;
 En une charte , ou en ung tombereau
 Il fist mettre ung cuvier tout plain d'eau ;
 Et s'y poussa tout nud o une fille ,
 Et charyer ce fist parmy la Ville ,
 Pour mieulx donner entendre le bagaige ,
 Le alloit faisant par nom de mariage.
 Ainsy joua le cas à bon escient ,
 Dont fut congneu que pas trop n'est scient ,
 Mais pour finer que le faict ne desguise ,
 Soubdain fut sceu des suppostz de l'Eglise ,
 Qui en firent faire information ,
 Pour à bon droict , par reformation ,
 Pugnir le cas , qui estoit ung peu creu :
 Plus n'en diray , quar pas n'en serois creu.

*Comment ung jour qu'il estoit à Paris il
 joïa aux detz avecque les Clercs de
 la Cour , qui le piperent.*

CHAPITRE X.



POUR quelque affaire ung jour fut à
 Paris ,
 Mais il advint , dont il ne fist pas ris ,
 Qu'il ce trouva avec des gens de
 plume ,

Qui bien soubdain luy ousterent sa plume :
 Ce nonobstant qu'il fut bien emplumé ,
 Par eulx il fut bien toust desamplumé ;
 Car à beaulx detz les gallands le piperent ,
 Et son argent subtilement gripperent ,
 Tant qu'il n'avoit ne maille ne denier.
 Le luy rendre chascun va denier ,
 En emprunter son *credo* estoit tendre ,

Tant que Paris par tout ce peult estendre:
 Le vaillant corps si advise d'ung cault tour:
 Pour essayer à avoir son retour,
 Le landemain, pour le vous faire court,
 S'en vint devant Messseigneurs de la Court,
 Feignant le sot dandin & le nyés,
 Sans leur dire bon jour ne *bona dies*,
 Tout en criant leur dist que de leur gent
 Luy avoient faict tout perdre son argent,
 O ne sçait quoy, & ne sçait quel jeu,
 Ce nonobstant son argent avoient heu.
 La Cour en heut pitié incontinent,
 De le veoir là ainſy incontinent;
 Car pour certain cuidoint qu'il n'eust esprit,
 Dont reprendrent, par ung tres grant despit,
 Ceulx qu'il montra avoir heu son argent,
 D'avoir trompé ung povre negligent,
 Les menassant de les faire tous pendre:
 Parquoy bien touſt furent contraints luy rendre
 Tout son argent, dont ne fut mal content.
 Lors s'en alla sans faire aultre contend
 Se desguiser en une aultre maniere,
 Car de pippet il sçait bien la maniere,
 Mieulx qu'ils ne font, il ce trouve en leur voye:
 Incontinent detz allerent par voye
 A son proffit, tant qu'il heut leur argent
 Avecque le sien, par son subtil art gent;
 Sans que l'ung d'eulx en rien le peust congnoistre;
 Leur Maistre il fut, bien leur fit à congnoistre.

Comment il donna à desjeuner à des Dames de Angers.

CHAPITRE XI.



UY retourné, chascun luy fist grant feste,
 Par tout Angers soubdain fut manifeste
 Le sien retour, dont personne ne pleure;

Or advint il que à une certaine heure,
 Il se trouva à quelque bon banquet,
 Où pas ne fut desgarny de quacquet.
 Là y avoit Damoysselles & Dames,
 Qui bien lamoeent, voire de corps & d'ame;
 Il fut chaery de chascun & chescune,
 Sans estre hay là de personne aulchune;
 Pour abreger l'une ne fut restive,
 Mais des aultres elle fut la plus hastive
 Luy demander qu'il leur fist ung festin
 Pour son retour, ou de soir ou matin.
 De le nier il ne fut si meschant,
 A lendemain le glorieux marchant
 Leur assigna heur au petit saing,
 Et s'en alla, sans mettre nays au sein,
 Leur preparer banquet de bonne sorte;
 Emmy le quel une teste il assorte,
 Ou de mouton, de veau ne scay quelle.
 Mais pour ouyr & scavoir la sequelle
 Il escorcha ceste teste predicte,
 Et de la peau, sans faire outre redicte;
 Il en couvrit une teste de mort,
 Sans à nully en parler ung seul mot;

Lors presenta ce beau petit present
 A ung chascun , qui là estoit present.
 Celle qui fut hastive la premiere
 La descouvrir , voulfist estre derniere ;
 Car chascune eut de la veoir si grant peur ;
 Que de long-temps nulle ne fut aseure ,
 Croyez pour vray que gueres ne mangerent ,
 Mais bien soubdain du lieu se desfrangerent :
 Ce beau bancquet gueres ne luy cousta ,
 Quar ces Dames bien tost il desgousta
 En tel faczon , quel' en heurent les fiebvres
 Plus de troyz moys , tremblantes comme chievres.
 Par ce point là d'elles il se deffist ,
 Tant que depuys bancquet il ne leur fist.

*Comment à ung aultre bancquet il beut de
 l'ypocras.*

CHAPITRE XII.



A PRES ce fait à certain bon festage ;
 Pour mieulx gaudir , & faire davan-
 tage
 Le Pelerin , fut mené pour esbatre
 Les convivez , dans sans à nul debatre
 Plusieurs gayetez fist il & passe temps ;
 Entre aultres fist , pour faire passer temps ,
 Ung qu'il ne fault delaisser jucqu'à cras ;
 Quar pour son mieulx boyre de l'ypocras ,
 Pas ne voullut aveoir verre ne tasse ,
 Mes de son lieu soubdain il ce destasse ,
 Et s'en alla à une chofferette
 Sur ung landier , qui n'estoit guere nette ,
 Pour mieulx sembler le plaisant & nouveau ,
 Il voulut boire en faczon d'ung veau :

Or est ainsi qu'elle fut sy tres chaulde,
 Que bien estroict le bon galland se eschaulde
 En tel faczon, que le bec luy pella.
 De ces cas là point il n'en appella,
 Ce non obtant qu'il en fust bien mocqué,
 D'avoir si près la chofferette chocqué.

*Comment ung soir luy & ces compaignons
 n'avoient que soupper.*

CHAPITRE XIII.



DVINT ung soir, luy & ces com-
 paignons
 Pour leur soupper n'avoient pas deux
 ongnons,
 Et tous estoient sans denier & sans
 maille,

Et n'eussent sceu trouver qui leur en baille,
 Tant ilz estoient bien par la Ville acreuz,
 Et de grant fain estoient quasi recreuz.
 Pour en avoir il se va adviser,
 Qu'il se faudroit par bendes diviser,
 Faisant le guect par tout la Cité,
 Quant chascun est aller soupper cité,
 Les Chanoines ungs o aultres en somme
 Se font porter leur soupper par leur homme,
 Avoir des gens qui portassent corbeilles,
 Barriz, flascons, pincernes ou bouteilles,
 Faire semblant de voulloir tout tuer,
 Sans rien f apper, mes les destituer
 Tant seulement des bribbes & lorreaux,
 Pour le soupper des compaignons lureaux.
 Chascun a dict, c'est tres bien advisé,
 Ainsy soit faict comme il est divisé.

Lors ilz s'en vont par bendes & monseaulz ;
 Amasserent Dieu saiche quelz morceaulx ,
 Et de bons vins tant , qu'en heurent assez
 A suffisance , & pour l'heure passer.
 Mais les Seigneurs qui leur soupper attendent ;
 Qu'il soit ainsy entre eulx pas ne l'entendent ,
 Tant que leurs gens leur dirent la fortune ,
 Qui pour le temps leur fut grant infortune :
 Car tel cuidoit manger d'un bon pasté ,
 Ou d'ung chapon , qui n'en a onc tasté ;
 Mais il fallut que Maistres & servans ,
 Pour ce soir là , tant fussent-ilz sçavans ,
 Fussent tout ung , & prinsent en passience ,
 Ou autrement n'eussent pas heu science.

*Comment Pierre Faifeu fist le Basteteur à
 Baugé.*

CHAPITRE XIV.



POUR son esbat , ou bien pour quel-
 que cas ,
 Non trop muny d'escuz ou de ducas,
 Va à Baugé ; où là fut quelque temps,
 Mais pour certain , ainsy comme j'en-
 Tant ce joua à prendre sa plaifance , [tends,
 Qu'il luy tourna en grande desplaifance ;
 Car son argent bien soubdain luy faillit,
 Et le credit aussy luy defaillit.
 Lors quant ce vit tumber en tel malheur ,
 Il s'advisa faire le basteteur ,
 Et amassa en son hostellerie
 Force mastins , vieulx chiens de Boucherie ,
 Les enfermant en une chambre seure ;
 Puis à son hoste il dit : je vous assure

Que de ces chiens Vous verrez faire un tour ;
 Que n'avez veu en chemin ou destour.
 Puyt tout soudain fist sonner par la Ville
 Ung tambourin , disant ; ung homme habille
 Est en tel lieu , qui joué de passe-passe ,
 Ayant bestes des belles l'oultre passe ,
 Bref , pour faire le faict & le deffaict
 En ce monde il n'y a plus parfaict ;
 Pour ung liard voyra toute personne.
 L'hoste à nully de ce cas mot ne sonne ,
 Car pour certain il pensoit estre voir
 Par ces mastins quelque nouveaulté veoir.
 Gens sans nombre ce sont là assemblez
 Pour veoir le jeu , ont lyards dessemblez ,
 Quelz il poussa en sa bource ou baguette ,
 Il ne luy chault qui de ce cas quacquette.
 Il ennuya d'escouter à la gent ,
 Mais c'est tout un puyt qu'il a de l'argent :
 Ces chiens hussent , rechingnent , & habaient ,
 Les attendans de ennuy la gueulle baient ;
 Bref quant il vit qu'il fut temps & saison
 De s'en sortir , & laisser la maison ,
 Pour saignement jouer son personnage ,
 Il fist renger ung chascun par son eage ,
 Faisant semblant leur aller demonstrier
 Cas merueilleux , & bestes leur monstrier ;
 Il va entrer en sa chambre à par soy ,
 Et ferma l'huys le tirant après soy ;
 Puyt resortit soudain par la fenestre ,
 Sans que aultre bruiet à l'hostel il fist naistre ,
 Et s'en entra coyment emmy l'estable
 De la maison , sans y estre stable ,
 D'avanture y trouva ung cheval ,
 Qu'il emmena , ou à mont , ou à val ;
 Et pour le cas mieulx vous faire assavoir ,
 On ne s'en sçeut jamais appercevoir

Qu'il ne fust loing, sans sçavoir quelle part
 Avoit tiré, quant de là ce depart.
 Ainsy trompa Baugeoys pour ceste heure,
 Quant il heut d'eulx & argent & monteure.

*Comment à son retour de Baugé, voullut
 acheter ung Poullain qu'on ne luy voullut
 vendre, qu'il heust subtilement.*

CHAPITRE XV.



E ce Cheval je crois qu'il le rendit
 Quant fut Angers, ou bien il le
 vendit,
 Je n'en sçay rien; mais sans chandelle
 ou cierge,
 Ung jour alloit à l'esbat vers saint Sierge,
 Où il trouva en un petit bordage,
 Ung beau poullain qui n'avoit pas fort de eage;
 Mais bien luy pleut; lors s'en vint à son Maistre
 Le supplier qu'il ce voullust soubzmettre
 Le luy bailler, sans en faire refus,
 Luy presentant tout contant quatre escus.
 Mais le cloufier, pour faire fin de compte,
 De son parler il ne tint pas grant conte;
 Quar il disoit le poullain & la mere
 Pas ne valloir la monnoye qu'il numere,
 Et se excusoit que sa mere y a part.
 Alors Faifeu de luy soubdain s'empart,
 Et va songer une bonne cautelle,
 Que vous orrez & pour tout vray fut telle.
 Il va trouver ung cheval mort de frays
 En ung fouffé, qui estoit là aupres,
 Où mainte pye, corncille, & corbin
 Jà en avoient heu chascun son loppin;

Et amassa les petiz ouffelletz ,
 Et de la chair de petiz morfelez ;
 Et les poufa en partie de la peau ,
 Sans à ce faict de nully faire appeau.
 Lors s'en alla de nuict en la pasture
 Où ce repaist la jument , & pasture
 O son poullain , où , pour le faire bref ,
 La charongne a portée à grant grief ,
 Et l'espandit au champ en maint endroit ,
 Presuposant pour vroy qu'on entendroit
 Les loups avoir en ce lieu devoré
 Le dict poullain ; puy là n'a demouré ,
 Mais à son gré le poullain il emmeine.
 Or est ainſy qu'en la malle ſepmaine ,
 Le bon homme cuydant trouver ſa beſte ,
 Au plus matin , ſans faire grand tempeſte ,
 Vint au dict lieu ; lors fut bien eſtonné ,
 Et de ſon ſens quaſi tout beſtourné
 D'avoir perdu ſon poullain que eut tant cher ,
 Qu'il croit mengé , plus ne le fault chercher.
 Le propre jour Faifeu vers luy retourne ,
 Le requerant que nul ne le deſtourne
 Qu'il ne luy vende & livre ſon poullain ,
 Luy affermant que juſques à bien loin
 Ny a cheval qui ſi fort bien luy plaiſe.
 Le clouſier diſt ; Monsieur , ne vous deſplaiſe ,
 Car ceſte nuyt j'ay eſté fortuné
 De mon poullain , dont tout importuné
 Eſt mon eſprit , les loups en ont fait feſte ,
 Et l'ont mengé le cas eſt manifeſte ;
 Las ! je voudrois le vous avoir baillé.
 Or diſt Faifeu , qu'il ne ſoit point raillé ,
 Car pour certain je l'auray quoy qu'il couſte ,
 Tu l'as caché , or , mon amy , eſcoute
 Baille le moy , car j'en ay tel vouloir ,
 Que plus dix fois qu'il ne ſçauroit valoir

Je le paieray ; pour Dieu ne me refuse ,
 Tien dix escuz , & n'ayes plus nulle excuse.
 Lors le cloufier près qu'il ne se va pendre ,
 Quant du poullain se voit telle offre esprendre ;
 Et en pleurant luy dist ; Monsieur , pour veoir
 Il est mangé , je vous pry venez veoir.
 Là luy monstra le fait que bien sçavoit
 Trop mieulx que luy , mais semblant si avoit
 Rien n'en sçavoir , en faisant malle chere
 Luy afferma qu'il eust eu quelque enchere
 Qu'on en eult fait : lors du lieu s'empartit ,
 Mais je ne sçay si rien luy impartit
 Pour son cheval , & sy le luy poya.
 Or pour sçavoir comment il employa
 Depuis ce temps , & luy fist nourriture ,
 Il le nourrit pour vray contre nature ,
 Luy apprenant à boyre vin en verre ,
 Faire les faultz , se agenouïller en terre ,
 Monter degrez , le suyvir pas à pas ,
 Qui ne l'eust veu on ne le croiroit pas ;
 Bref il dansoit & faisoit mille mines ,
 Faignant parler il jouoit des babines ,
 Bien le portoit , & fult jusques à Rome :
 Voyla comment le fist le vaillant homme.
 Quant l'eust raisy si qu'il fut descongny ,
 Il le toussa , & si le mist tout nu.
 Tant estoit let que s'estoient grans merveilles ,
 Car luy couppa la queuë & les oreilles ,
 Brief le maitre & le cheval n'avoient
 Point de pareilz , des mines qu'ilz sçavoient.

*Comment le jour des licences publiques
d'Angers, il voulut faire licencier son
cheval disant luy appartenir mieulx que
à une asne.*

CHAPITRE XVI.



PAR chascuns ans ung terme est limité
 Le prochain jour après la Trinité,
 Que à Angers on fait la publique li-
 cence,
 Et que les Clercs de parler ont licence
 Dens le pallais, sans qu'on ferme la porte,
 Chascun pour veoir & ouyr se transporte,
 Les harengues qui là se font & forment,
 Et par raisons ensemble se conforment.
 Or est ainsy, que ung en l'acte se mist,
 Et tel degré percevoit le soubzmist,
 Non cappable, mais en sçavoir fort rude,
 Bien demonstrant n'avoir aymé l'estude:
 A Faifeu fist quelque fois ung faulx tour,
 Lequel pensa ce jour avoir retour,
 Car à l'heure qu'il faisoient la harangue,
 Faifeu entra, non desparny de langue,
 O son cheval, qui estoit si bien duyt
 A le suyvir, que par tout le conduyt,
 Et fust monter la Tour de Babilone,
 Ou à aller jusques en Aquilonne.
 Quant fut monté, en beau latin aorné
 Le sien parler aux Docteurs atourné,
 Les suppliant admettre sa requeste
 (Car bien sçavant estoit) sans autre enqueste,
 Pourtant qu'estoit bien amé & congnu:
 Le refuser nul ne fist l'incongnu,

Mais là luy fut bonne audience faicte,
 Sans qu'on trouvast nulle excuse ou defaicte.
 Lors devant tous dist, Messieurs attendez,
 Je ne sçay pas comment vous l'entendez,
 Que mon cheval qui de nature est noble,
 Ne preferez à une beste innoble;
 Car je voy cy ung asne incencé,
 Qui estre Clerc vous avez dispencé:
 Par quoy concludz, dessoubz correction,
 Que ne debvz faire telle action,
 Car si degré à ceste asne on tribuë,
 Je maintiendray que mal on distribuë
 Les facultez & tiltres de sçavoir,
 Car mon cheval les doit plustost avoir.
 Les assistens tous se prindrent à rire,
 De quoy Faifeu ce leur est allé dire;
 Car en nul point il n'a temporisé,
 Que le galland n'ayt bien vesperisé.
 Mettre son nom, je ne veulx ne ne doy,
 Mais ung chascun le monstroit o le doy,
 Tant qu'eust voulu, pour faire fin de compte,
 Estre enfouy, tant avoit belle honte.
 Ainsi Faifeu de luy bien se vengea,
 Puis du parquet soubdain se desrengea.



*Comment Faifen alla en Poictou, où en une
hostellerie fist monter son cheval au
grenier à l'avoïne.*

CHAPITRE XVII.



Ls'en alla tout d'un traict en Poictou,
Le lieu pour vray où est ne scay point
où,

Mais toultesfois en Ville ou en Bour-
gade

Il arriva, sans faire grand brigade,
Et se logea au bout ou au meillieu,
Où il pensa trouver le meilleur lieu:
Or est ainsi, pour mieulx estre stable,
Il fist mettre son cheval à l'estable,
Et là dedens bien il s'est fait traicter,
Sans marchander en rien, ne contracter.
Quant fut au soir, bien commande qu'on pense
De son cheval, mais pas ne se dispense
I aller veoir; lors voit où c'est qu'on va
A l'avoïne, dont soubdain controuva
Faire ung bon tour, quel cy je voys escripre;
Quant le lyrez vous n'en ferez que rire.
Au soir quant veit que tout est despesché,
Et se coucher chascun est depesché,
Faignant aller au retrect & latrines,
Aussi dire ses Vespres ou Matines,
S'en alla veoir que faisoit son cheval,
Lequel trouva tout couché son chef val;
Lors l'assigna, le cheval l'entendit,
Comme devant j'ay jà a long-temps dit;
Car entendoit tout comme une personne;
Faifeu tout bas le cheval appart sonne,

Signe luy fait que après luy monta hault ;
 Lequel bien tost le fist joyeux & bault ;
 Lors le mena au grenier a l'avoine ,
 Où le laissa , quar pas ne le ramene
 Mais s'en alla coucher emmy son liest.
 Or lendemain il y heut beau delict ,
 Quar au matin Faifeu se habille & hourse ,
 Pour s'en aller ailleurs il ce dispouse ,
 Mais quant fut prest , contrefist l'estonné
 De ne trouver son cheval atourné ;
 Lors s'en alla à l'hoste faire plainct
 De son cheval : l'hoste & ses gens sont plains
 De fâcherie , & grande esbahyffance ,
 Oncques n'ont tant esté esbahys sans ce ;
 Car pour certain pensoient avoir perdu
 Ledit cheval. L'hoste tout esperdu
 Vint à Faifeu , troublé & remply de ire ,
 Et tout fâché , luy a commencé dire ;
 Mon tres cher Sieur , du povre negligent ;
 Pour le cheval , vous plaist prendre argent ,
 Car pour certain je ne sache la sorte
 Qu'il est perdu , c'est une chose forte
 Le recouvrer ; donc je vous pry pour Dieu
 Ne vous fâchez , prenez le mien en lieu.
 Faifeu ne ryt , mais faint fâcheuse chere ,
 Et jure Dieu qu'onc n'eut chose plus chere
 Que son cheval , plus vault de cent ducatz.
 Lors l'hoste fut bien estonné du cas ,
 Car Faifeu dit s'en plaindre à la Justice
 De luy avoir faicte telle injustice.
 En quacquetant , faisant tel dyalogue ,
 Faifeu s'en vint , de marrisson tout rogue ,
 Au serviteur , faignant de l'outrager ,
 Luy promettant de le faire enrager
 Tant le bastra ; le serviteur n'a veine
 Qui ne tremble , disant que de l'aveine

Il luy donna , & sa littere fist ;
 Il ne sçauroit comment le tour se feist ;
 Car pour certain il ferma bien la porte.
 Faifeu luy dit ; vien çà , & me raporte
 Combien d'avoyne au soir luy as baillé.
 Le varlet dist ; si qu'il ne soit raillé ,
 Je veulx pour vray ma teste estre coupée ;
 S'il n'eut du tout son entierre souppée.
 A vertubieu , dist Faifeu , je suis prins ,
 Viens çà , meschant, dy moy , qui t'a aprins.
 Penser chevaulx sans le dire à leur Maistre ?
 Plain ung boyffeau il luy en falloit mettre ,
 Où la prins tu , Monsieur , (dit-il) en hault
 En ce grenier. Donc (dist Faifeu) il fault
 I aller veoir , car je veulx qu'on me pende
 S'il n'est monté ; il fault que tu entende
 Qu'il a esprit , & entend aussi-bien
 Que homme qui soit , sans y fallir en rien ;
 Parquoy s'il veyt que tu as apporté
 D'en hault l'avoyne, il s'i est transporté.
 Lors tout soubdain chascun se met en peine
 Aller chercher au grenier à l'aveine ,
 Et ont trouvé comme Faifeu leur dist ,
 Dont n'y eut nul qui de grant joye ne rist :
 Le bon cheval en fist telle despence ,
 Qu'il en avoit si tres plaine sa pance ,
 Qu'il ne pouvoit du lieu se remuer.
 Soubdain Faifeu de couleur va muer
 De veoir ainsi son cheval trop pencé ;
 Donc a requis estre recompencé ,
 Car son cheval à mourir leur afferme
 D'estre tant faoul , & contre eulx tient fort ferme ,
 Les menassant à les faire adjourner.
 L'hoste luy dist ; Monseigneur , sejourner
 Tant que vouldrez ceans pour le refaire ,
 A vostre vueil je suis prest satisfaire.

Faifeu

Faifeu fut là encor troys jours ou quatre
 A se gaudir, se jouier, & esbattre,
 Sans que jamais luy coultat ung tournoys;
 Voyez comment il faisoit ses tournoys.

*Comment il alla en Bretagne où il contre-
 fist le Triacleur.*

CHAPITRE XVIII.



POUR son plaisir, non d'argent trop
 muny,
 Il s'en alla, d'esprit non immuny,
 Ung certain temps, en maint pays &
 contrée;


Pour le premier Bretagne a rencon-
 Où maint cault tour il fist, & maint desduyt, [trée,
 Que tous n'ay pas en ce papier reduyt:
 Entre lesquelz, pour abreger le Libvre,
 Il se trouva ung jour d'argent delivre,
 Mais son esprit pas ne luy defaillit,
 Car en avoir soubdain il ne faillit.
 Pour mieulx user de cautelle ou miracle,
 Il se advisa vendre le tyriacle,
 En se vantant qu'il guerist de tous maulx,
 Et de plusieurs, tant soient ilz anormaulx;
 Bref quant eut fait ses criées & repuces,
 Il s'employa vendre la pouldre aulx puces.
 Il avoit fait force petitz cornetz,
 Pour affronter tous ses jolys cornetz,
 Où n'y avoit que du seys de bois
 Bien fort pouldré. Adonc à ses abboys
 Chascun accourt, lors en fist bonne vente,
 Car pour tout vray publicquement se vante
 Que les puces toutes fera mourir;

D

Là eut lyards , pour son fait secourir ;
 Tant & si bien , qu'il fut assez content.
 L'un des presens s'advisa tout content ,
 Que bien sont foulz de là se estre admusez ;
 Sans qu'il leur dist la maniere de user
 De la pouldre , quelle il leur a vendüe ;
 A Faifeu va , sans faire aultre attendüe ,
 Luy demander la maniere & la sorte
 Qu'il faut user de la pouldre qu'il porte.
 Il luy respond , sans faire long quacquet ,
 Que mettre fault les puces en paquet ,
 Et les prendre chacune seulle à seulle ,
 Et leur pouser la pouldre en la gueulle ;
 Toutes mouront , sans faire long sejour.
 Lors chascun rist de avoir heu celuy jour
 Tel passe-temps , & sy bonne responce :
 Mais tout soubdain le galland fist esponce
 Et s'en alla , sans faire long adieu ,
 Avecque argent que heust par son plaisant jeu.

*Comment il alla à Nantes où il garrentit
 ung criminel de estre pendu & feist
 le Divin.*

CHAPITRE XIX.


UANT fut party dont il fist ce bon
 tour ,
 Il s'en alla , sans faire ailleurs retour ,
 Droit à Nantes , là où il a fait rage :
 Quant il y fust , il luy print en couraige
 Contrefaire l'Astrologue & Divin ,
 Ce nonobstant qu'il heust charté de vin ,
 Se fist traister en homme de sçavoir ,
 Leur promettant à leur faire à sçavoir

Choufes cachées , choufes hors de memoire ;
 Qui excedent & logique & granmoyre ,
 Tréfors cachez leur montreroit pour voir ,
 Il ne tenoit qu'à y aller pour veoir ;
 Bref il difoit , pour mon propos parfaire ,
 Que experiment il montreroit par faire.
 Or le cas fut , quant on ouit son bruiét ,
 Chascun y va , chascun court , chascun bruiét ;
 Chascun veult veoir les faczons de cest homme ;
 Plus subtil n'est , difent ilz , jusques à Romme.
 Ce temps pendant , comme j'ay entendu ,
 Aucun devoit ung jour estre pendu
 En la Ville , & à l'après-disnée ,
 Ainsi estoit sa povre destinée ;
 Mais les parens du pouvre condamné
 Eussent voulu du bien avoir donné
 Grant quantité , quasi jusques sans nombre ;
 Et leur parent n'eust point eu cest encombre.
 Ung plus subtil en ce cas va viser ,
 Et tout soudain ses parens adviser
 Qu'il faut parler au Divin de l'affaire ,
 Luy promettant , si le cas veult parfaire
 De delivrer leur amy de prison ,
 Sans qu'en nul point ilz en ayent mesprison ;
 Cinquante escus il aura pour sa peine.
 Lors regarda sa bource n'estre pleine ,
 Mais du tout vuyde , & sans avoir denier ,
 Les secourir ne leur va desnier ;
 Or leur promet se mettre à l'aventure
 Faire leur vueil , moyennant que ouverture
 Ilz luy facent de moitié payement ;
 Ce qu'ilz firent : lors il s'en va coyment
 En son Esprit la façon cogiter ,
 Comme il pourra le pouvre corps jecter
 Hors de danger ; la maniere fut telle ,
 Qu'il mist à fin par tres bonne cautelle.

Or y avoit pour le temps à la chartre
 Geollier nouveau , qui prisonniers enchartre ;
 Ne congnoissant encores les Sergeans ,
 Dont Faifeu fut adverty par ses gens.
 Bien joyeux fut , lors il s'en va grant erre
 Chez ung Sergeant , qui ne tenoit grant terre ;
 Luy requerant luy faire le plaisir
 De luy prester , sans aucun desplaisir ,
 Son ocqueton qu'il porte pour livrée ,
 Luy affermant pour vroy à l'arrivée ,
 Que c'est seulement pour jouer une farce ;
 Sy qu'il ne veist que le mignon le farce ;
 Il luy bailla troys beaulx escuz en lieu ,
 Joucques à tant que il heust parfaict son jeu.
 Le bon Sergeant en luy print affiance ,
 Et luy livra , sans nulle deffiance ,
 Son ocqueton , son enseigne & sa verge ,
 Sans qu'il congneust que Faifeu le gauberge.
 Quant le marchant heut parfaict tout son tour ,
 Tout droict s'en va à la geolle ou tour ,
 Bien eschauffé , feignant avoir grant haste ,
 Dist au Geollier ; mon amy , or te haste
 Me delivrer sans plus longue traynée ,
 Cil qu'on doibt pendre à ceste après-dinée.
 Le Chartrenier , comme dessus est dict ,
 N'en fist reffus , & n'y a contredict ,
 Pourtant qu'il dict , le Juge le commande ,
 Et pour encor parler à luy le mande ;
 Quar il le veult derechef confronter
 A ung tesmoing , pour de mieulx l'affronter ;
 Mais il veult bien que soit secretement.
 Lors luy bailla , mes bien estroitement
 Le va lier , feignant avoir grant crainte
 Qu'il eschappast , puy droict de ceste empreinte
 L'en emmena , sans faire aultre semblant.
 Le criminel s'en alloit tout tremblant ,

De peur qu'avoit, mes pas ne sçait l'affaire
 Que là Faifeu pour luy a voullu faire.
 Quant du Geollier ilz furent ellongnez,
 En ung destour, sans gramment besongner
 Faifeu luy dist; mon amy, or despesche
 Faire chemin, quar de mort te despesche
 Comme t'voiz. Adonc l'a deslié,
 Et s'en alla, non merencolyé,
 En certain lieu ces amys l'attendoient,
 Qui en ce point l'avoir ne se attendoient;
 Faifeu leur rend, ilz luy baillent monnoye;
 Il fut content, & ilz heurent mont joye:
 Le ocqueton il rendit au Sergeant,
 Et retira de luy tout son argent;
 Puys s'en alla, sans faire long sejour,
 Quar il ne veult qu'on le voye là ce jour.
 Le peuple attent pour voir faire Justice
 Du malfaicteur, mes à son prejudice
 Rien ne feront, quar il est hors leurs mains;
 Et est plus loing de dix lieux pour le moins.
 Le Juge dict que le Geollier le rende,
 Ou que pour luy il fault qu'il poye l'amande;
 Le Geollier dict vous l'avez demandé,
 Et j'ay toust faict ce qu'avez commandé.
 Bref nul ne sçait pour au cas satisfaire,
 Quant on congnoist la maniere de faire
 Qu'on doit juger, le cas bien entendu,
 Le rustre fut saulvé d'estre pendu,
 Faifeu rescoux de sa grant indigence;
 Les officiers ne leur intelligence
 Rien n'y ont faict, sy que mieulx il soit sçeu,
 Il n'eurent fors du jeu Pierre Faifeu.

Comment à Rennes il contrefist le Medicin.

CHAPITRE XX.



UNG jour à Angers chez ung Appoti-
 caire
 Il fist ung tour, lequel il ne fault taire;
 Quar ce trouva tout seul à son plaisir,
 Considerant ne faire desplaisir,
 Print & faist de receptes grant nombre,
 Feignant jamès n'en avoir veu que l'ombre,
 Puy s'en alla trouver ung compaignon
 Auquel il dist; venez ça mon mignon,
 Si vous voulez que nous aillons ensemble,
 J'ay bon espoir, ainsi comme il me semble,
 Que nous ferons tres bien nostre proffit,
 Car j'ay icy maintes drogues confit,
 Mainte recepte, & mainte medicine,
 Aussi de moy je feray tres bon signe,
 Faisant semblant en tel cas estre expert,
 Aussi direz en secret & appert,
 Que par tous lieux de moy on tient grant compte,
 En toutes Cours & de Prince & de Conte;
 Vous aurez part à ce que acquesterons,
 Voyans le pays ainsy ne questerons.
 Le compaignon fut de son alliance
 Bien tost prest estre, & sans contrariance
 S'en sont partys sur chascun son cheval;
 Tant ont erré & à mont & à val,
 Que à Rennes sont venuz à la couchée,
 Où mainte bade ilz ont là descochée;
 Incontinent à l'hoste se vanta
 De son sçavoir, qui bien tost l'esventa,
 Car bien estoit joyeux d'avoir tel hoste.
 Faifeu luy dist; mon amy quoy qu'il couste;

Ung logis seur fault que je aye à par moy ;
 Et mon varlet , pour m'oster hors d'es moy ;
 Car je ne veulx que personne en approche ,
 Ne que nully à mes besongnes touche.
 Incontinent l'hoste fut disposé
 Le mettre en une , où son cas a posé.
 Par tout fut sçeu que chez ung tel en Ville ,
 Est arrivé ung Medicin abille ;
 Dont chascun jour venoit maint patient ,
 Des quelz le mal il n'estoit pas scient ;
 Mais son varlet , qui congnoissoit l'affaire ,
 Bien entendoit la manierre de faire ,
 Prenoit l'urine , & vers luy la portoit ,
 Puis tout soubdain recepte rapportoit ,
 Qu'il coppioit sur une aultre recepte ;
 C'estoit pourquoy l'entrée leur excepte ,
 Car il ne veult que nully apperceoyve
 Le sien secret , ne son sçavoir perfoyeve.
 Or il advint que par bien ou mal fait ,
 Aucuns se sont bien trouvez de son fait ;
 Ce nonobstant qu'il fist à l'aventure
 Furent secours de Dieu & de nature :
 Parquoy il eut en ville tel credit ,
 Que par tous lieux ung chascun crie & dit ,
 Des Medicins en tant que terre abunde
 C'est le meilleur qui soit en tout le monde.
 Mais il advint que la chance tourna ,
 Car pour bien peu qu'en santé retourna ,
 Il en mourut quasi infiny nombre ;
 Pour ce luy vint ung merueilleux encombre ,
 Car on doubta que du cas abusoit ,
 Et que le monde ainsi il admusoit ,
 Donc fut conclud qu'il fault le faire prendre ;
 Pour de tel cas griefvement le reprendre :
 Mais son hoste de ce cas adverty
 En eut pitié , & tost l'a diverty

Plus demourer, de peur qu'il n'y eust perte,
 Car il veoit sa ruine toute aperte.
 Lors que Faifeu du cas fut advisé,
 Pas n'a long-temps jazé, ne devisé,
 Mais mercya son bon hoste & le poye,
 Et s'en alla de Rennes o grant proye,
 Sans y avoir dommage ou interest,
 Et n'attendit pas des Bretons l'arrest.

*Comment à la Flesche il eut des houffeaulx
 subrillement.*

CHAPITRE XXI.



UNg aultrefois s'en alla pour s'esbatre
 A la Flesche, où fist sans rien rabattre,
 Le tour que orrez icy present compter,
 Lequel vault bien peine le racompter.
 Ung chascun sçet, & par tout est notaire
 Qu'il n'y passe Abbé Protenotaire,
 Grant ou petit, de quelque estat qu'il soit,
 Qu'on ne mocque, ce cas ung chascun sçait;
 Par ce ilz sont appellez coppieurs,
 Quar à gaudir tousjours sont espieurs.
 Or est ainsy que Faifeu c'y transporte,
 Qui tout soudain une coppie emporte
 D'ung Cordouannier, qui le gaudist & raille
 Pourtant que avoit pour cuir bottes de paille.
 Faifeu l'entend, qui pensa ce en venger
 Dedens bref temps; lors s'en alla renger
 Et ce loger au meilleur lieu qu'il peut,
 Où bien faire ce traicter là il sçeut,
 Et y coucha la nuyt & fist grant chere.
 Le landemain, sans faire longue enchere;
 Pour ce venger de cil qui le mocqua,

Ung serviteur de l'Hostel evocqua
 Luy requerant , sans faire longue pause ;
 Ung Cordouannier admener ce dispose .
 Qui apporte housseaulx pour le houser ,
 Luy affermant qu'ont esté si aoufflez
 Luy derober d'où dernier est forty
 Ces deux housseaulx , dont bien estoit forty ,
 Et n'y a nul en ce lieu qui en face ,
 Parquoy il fault que joucque icy s'en passe .
 Le serviteur soubdain luy admena
 Le Cordouannier , qui sy bien le mena
 A son entrée , & luy fist mocquerye .
 Faifeu s'en taist , & n'en dict mot ne crye ;
 Mais marchanda , sans noyses ou riottes ,
 Du coppieur une paire de bottes ,
 Puy il ce fist houser la jambe dextre ,
 Qui fust tres bien , mès la jambe senextre
 Il tint roide , feignant la botte estroicte ,
 Parquoy soubdain sa jambe il a retraicte ,
 Et au maistre , qu'il voyoit indigner
 D'avoir failly , dist ; joucque après digner
 Reportez la , qu'elle soit renformée ,
 Tant que bien soit à l'autre conformée :
 Se que bien toust il fist sans contredict .
 Incontinent Faifeu rencontre & dict
 Au serviteur ; mon amy sans grant noyse ,
 Fairz moy venir , quelque part où tu voyse ,
 Ung Cordouannier autre que cil qui vint ,
 Car il est cher . Le serviteur revint ,
 Et admena avecques luy un aultre ,
 Auquel il fist tout ainsi comme à l'autre ;
 Car à son pied , dont il n'estoit housé ,
 Il a trouvé ung housseau disposé ,
 Et renvoya l'autre pour reboucher ,
 Puis tout soubdain , sans granment s'esmouscher ,
 Il a disné , & payé sa despence ,

Mais de payer les housseaulx se dispence ;
 Et s'en alla se mocquant des mocquarts,
 Qui estiment les gens sotz & coquarts ;
 Car de culx il eut , sans faire grant bataille ,
 Housseaulx de cuyr pour ses bottes de paille.

*Comment la Dame de une grosse maison où
 il hantoit , perdit ung Dyamant en sa
 maison , qu'il luy fist subtilement re-
 couvrer.*

C H A P I T R E X X I I .



'AY jà escript plusieurs & maintes fois
 Icy devant , que sans crainte ou cf-
 froyz

En chascun lieu, sans faire grande en-
 chere ,

Il se trouvoit où on faisoit grant chere ,
 Et par tous lieux estoit le bien venu ,
 Plus pour jaser , que pour son revenu.
 Or y avoit ung gros Seigneur notable
 Au pays d'Anjou , tenant fort bonne table ,
 Et jeune estoit , aimant tout passe-temps ,
 Et gens joyeux ; dont ainsi que j'entends ,
 Faifeu l'alloit bien fort souvent esbatre
 Sans riotter , sans noyser ou desbatre ,
 Et pour certain , sans faire long civé ,
 A la maison il estoit fort privé.
 Ce temps pendant qu'il faisoit residence
 A la maison , en faisant rys & dance,
 Ung certain jour la Dame de l'hostel
 Fut ung ennuy , lequel pour vray fut tel ,
 Car elle avoit en sa main gauche ou dextre
 Ung Dyamant , que l'on renommoit de estre

De la valeur de bien cinq cens ducatz ;
 Or, pour soudain vous advertir du cas ,
 Ou en dormant ; ou en faisant la veille ,
 Du doy luy cheut , dont très fort s'esmerveille ,
 Qu'el' ne le treuve est son cueur très marry ,
 Et n'ose aussi le dire à son mary ;
 Mais à Faifeu allée est s'en complaindre ,
 Qui respondit , sans grandement la plaindre ,
 Que bien failloit que le Seigneur le sceust ,
 Et qu'elle luy dist ains qu'il s'en apperceust .
 En ce faisant le vaillant Pierre Maître
 La recouvrer luy est allé promettre ,
 Ce moyennant qu'il eust cinquante escuz ,
 Qu'elle luy promit , sans en faire refus ,
 Pareillement qu'aucun de la maison
 L'eust point trouvé , il en rendroit raison .
 Leurs propos tins , s'en alla seure & ferme
 Ladicte Dame , & au Seigneur afferme
 Du Dyamant le susdict interest ,
 Dont il ne fist pas grant conte ou arrest ,
 Ce nonobstant que fust le don de nopces
 Qu'avoit donné par sur autres negoces ;
 Car courroucer sa femme assez en veoit
 L'avoir perdu , mais grand dueil en avoit :
 Or toutesfois à Faifeu il ordonne
 Faire son vueil , & puissance il luy donne
 A son plaisir faire ainsi qu'il entend .
 Incontinent Faifeu fist tout content
 Toft assembler serviteurs & servantes ,
 Grans & petitz , & les portes fermantes ,
 Les fist renger en une chambre à part ,
 Où de grant peur chascun d'eulx avoit part .
 Quant il eust fait , appella Sieur & Dame ,
 Desquelz amé estoit de corps & de ame ,
 Et devant eulx aux servans fist sermon
 Du Dyamant , leur disant ; nous chermon ,

Et sçavons bien par l'art de nicromance
 Celuy qui le a & tout en evidence
 Feignoit chermer la chambre en tous endroitz ;
 Se pourmenant devant boytteux ou droitz.
 Il apperçeut parmy une verriere ,
 Emmy la court , ung garsonnet arriere ,
 Qui n'estoit point o les autres venu ,
 Dont vous orrez qu'il en est advenu.
 Ce nonobstant qu'il y en eust grant nombre ,
 Cinquante ou plus , soubdain faignit soubz **umbre**
 De diviner . que tout n'y estoit point.
 Les serviteurs ne congnoissans le point
 Dirent que nul ne restoit de la bende
 Fors le berger ; donc , dist-il , qu'on le mande ;
 Bien le sçavoys , & autres choses sçay ,
 Qu'il vienne tost , & vous verrez l'essay.
 Quant fut venu , demande une arballeste
 Que bender fist o grant peine & moleste ,
 Car forte estoit des meilleures qui soient.
 Les assistens tresfort s'esbahyssoient
 Que faire il veult , car dessus il fait mettre
 Ung fort raillon , puis ainsi la remettre
 Dessus la table , & couchée à travers
 Tout droit tenduë , & atournée envers ,
 Par où passer on doit devant la table.
 Tout ce cas fait , comme resolu & stable ,
 Dist à la Dame , & aussi au Seigneur ,
 Que nul d'eulx ne heut tant fiance en son heur ,
 De demander la bague dessus dicte ,
 Par nul barat ou cautelle maudicte ;
 Car il convient , sans faire nul destour ,
 Que chascun d'eulx passe & face son tour
 Devant le trect , arc , arballeste , ou flesche ;
 Sans que le cueur d'aucun se plye ou flesche ;
 Et puis après les servans passeront ,
 Mais bien croyez que ne repasseront ,

Ceulx ou celuy qui la bague retiennent ;
 Mais estre mortz tous asseurez se tiennent.
 Son dit finy, chascun y a passé,
 Sans que nul fust ne blecé ne cassé ;
 Mais quant ce fut à cil qui a la bague ,
 A ce ne veult user de mine ou brague ,
 Car pour certain se trouva si vain cueur ,
 Que s'excuser ne sçeut est vaincqueur ;
 Mais tout soudain son esprit se tendit
 Cryer mercy , & la bague rendit ,
 En affermant qu'il ne l'avoit robée ,
 Mais sans Faifeu eust esté absorbée.
 Auquel onquist s'il estoit bien certain
 Du larronneau , mais jura que incertain
 Il en estoit , & sans science telle
 Qu'on estimoit , avoit quis la cautelle
 Espoventer par subtile Leçon
 Ceulx qui la bague avoient , en la façon
 Vous pouvez voir que , par subtile prouve ;
 Tel se dit bon , que meschant on approuve.

*Comment il fist une finesse pour couscher en
 la chambre de sa mere avecques sa
 Chambriere.*

CHAPITRE XXIII.



Le bon mignon en ses jeux & esbatz
 Ne laissoit pas estre tendre du bas ;
 Or y avoit demeurante o sa mere
 Une servante , & tres belle commere,
 Que fort aymoit , en desirant jouyr ;
 Le cas qu'il fist vous le pourrez ouyr.
 La dicte fille , ainsi que me remembre ,
 Couchoit tousjours en ung liét de la chambre ,

Où la Faifeüe en tous temps se couchoit ;
 Et volentiers gueres n'en descouchoit ;
 Parquoy ne peult en avoir jouyffance
 Ne jour ne nuyt , donc a esbailfance :
 Mais pour venir au dessus de son fait ,
 Par ung beau soir le luttin contrefait ,
 Et va monter au grenier sur la chambre
 Ou gyft sa mere , & demenant maint membre ;
 Aussi criant tres fort piteusement ,
 En tabourdant ; dont esbayffement
 Sa mere a eu , & en sourfaut s'esveille ,
 Dont de l'ouyr elle eut tres grant merveille :
 Mais plus fut elle estonnée de veoir feu ,
 Que par ung trou monstroit Pierre Faifeu ;
 Car pour certain elle cuydoit estre morte
 D'ouyr ce bruyt , & veoir feu en la sorte ;
 Pensant pour vray que ce fust quelque esprit ,
 Qui tost voullust son corps rendre perscript.
 Or tout soudain de son liët ce depose ,
 Et nullement depuis elle ne repose ,
 Mais s'en alla à genoux prier Dieu
 En l'oratoire , où en ung certain lieu
 Qui loing estoit de la chambre où elle coufche.
 Incontinent le marchant se descouche ,
 Et va tout droit o la fille coufcher ,
 Qui de grant peur n'a osé descoufcher ,
 Ne sonner mot ; dont a trouvé sa coche ,
 Et droïctement par plusieurs fois l'encoche ;
 Dont pour certain bien l'avoit encochée ,
 Dedens neuf moys se trouva accoufchée :
 Car depuis que eut une foys encoché ,
 Par plusieurs fois avecque elle a couché ,
 Et n'en fist plus reffuz ne nulle enchiere ;
 Parquoy on dit que la pinte plut chere
 D'un bon tonneau de vin , est au percer :
 Ce que j'en dy c'est pour le temps passer.

*Comment quelque fois il se trouva seul
avecques de ses compaignons chez sa
mere, & pour desjeuner tyra la viande
du pot, & y mist une pierre.*

C H A P I T R E X X I V .



SOUVENT avoit le galand appetit,
Sans nul denier avoir grant ou petit;
Mais son refrain, quant avoit indigence,

C'estoit aller avecques diligence
Droit chez sa mere y prendre son repas.
Donc fault sçavoir que plustost que le pas,
Ung certain jour chez sa mere se trouve,
Où d'un bon tour il a montré l'espreuve;
Car a trouvé ung jambon en ung pot,
Lequel (pour mieulx user de son tripot)
L'a emporté sans à nul le requerre,
Et en son lieu mist une grosse pierre,
Sans qu'on le vist ou sortir ou entrer,
S'en est allé. Donques pour mieulx rentres
A mon propos, quant de disner fut heure
La chamberiere, en cuydant estre seure
Que le jambon fust cuit & prest manger,
A le tyrer elle s'est allé renger,
Et dens le pot mist broche ou lardouere;
Mais ny entroit, dont s'en alloit arriere,
Par plusieurs fois elle y a fait retour,
Tousjours estoit comme le premier tour.
Quant a esté ennuyée de l'affaire,
Ouster soudain le brouet ne differe,
Car sa maistresse avoit envie disner,
Et qu'elle chommoit se vouloit indigner.

Lors la servante eut fort grant mal au cueur ;
 Quant apperçeut ce qu'a fait le mocqueur ,
 Et l'est allé à sa maitresse dire ,
 Qui pas n'en rit , mais en est plaine de yre ;
 Mais malgré elle en gré prendre il luy fault ,
 Car du jambon pour l'heure elle a deffault ,
 Et pour tel cas il ne fault qu'elle se indigne ,
 Mais pour la chair fault que de soupe disne.
 Ainsi voyez comme necessité
 Oupvre l'esprit , ainsi qu'est recité.

*Comment en la compagnie de aucuns de ses
 amys , il fut question que l'un de la ben-
 de payast une chopine de ypocras : pour
 laquelle avoir , fallut faire cedula, qu'il
 escripuit.*

CHAPITRE XXV.



NE heure estoit o aucuns ses amys
 A bancqueter , où sa peine il a mis
 Faire payer à l'un de la cohorte
 Une choppine ypocras. Or la sorte
 Pourquoi ce fust , pas je ne le sçay
 Mais y avoit tout plain de gens de bien , [bien ,
 Qui grant vouloir avoient de tel vin boire.
 Le compagnon , sans perdre son memoire ,
 Fist si tres bien , que l'autre en fut content
 Pour en avoir sans le payer contant ,
 Fallut soubdain construyre une cedula ,
 Toft la bastir Faifeu point ne recule ,
 Et n'a failly y mettre tout le pot
 A la signer , ne craignant tel tripot ,
 Sans regarder son amy ne refuse.

Or

Or tout soudain, sans faire longue muse ;
 Faifeu s'en va gentement la porter
 Droit chez Bruere, & a fait apporter
 De l'ypocras toute pleine une quarte ;
 Car en ayant tousjours cedula ou charte
 Dudit Seigneur, rien ne refuseroit,
 Et pour son corps tout son bien useroit.
 En banquetant chascun d'eulx s'esmerveille ;
 Car ne sçavoient la finesse & merveille
 Que a fait Faifeu ; car l'ypocras dura
 Tout le banquet, & nul n'en endura,
 Et ne cuydoit avoir eu que choppine.
 Quant eurent fait, pour payer la propine
 De l'ypocras, vint ledit creditteur,
 Et ne pensant estre grandment debteur.
 Adonc Bruere a desployé sa lettre,
 S'il n'est pesneux, il commença à l'estre,
 Car pour choppine ung pot il a poyé,
 Dont fut bien fait & tres bien employé,
 Car jamais nul ne doit son sing escrire ;
 Que le dessus n'ayt sçeu gouster & lyre.

*Comment un jour s'en venant de Orleans
 par la riviere de Loyre, il fist rayre les
 lavandieres de buée à Bloys.*

CHAPITRE XXVI.



Orleans ung temps fut à l'estude ;
 Mais tout soudain il print sollicitude
 S'en retourner Angers veoir ses amys.
 Or pour ce faire en ung batteau s'est
 mys,
 Acompagné de plusieurs gens notables ;
 Croire il vous fault que maintz motz profitables

En ce baſteau furent bien propoſez.
 Or en nouant ſe cuydoient repoſer
 Dans le baſteau, car avoient fait la veille
 Jouant la nuyt : or eſcoutez merveille
 Qu'il leur advint, ung grant bruyt ont ouy ;
 Dont de prinſault nul ne fut reſjouy,
 Car il ſembloit que fuſſent dix banieres
 De gens de guere, & ſ'eſtoient buandieres
 Qui là eſtoient, pour leur buée laver ;
 Dont tout ſoubdain chaſcun ſe va lever,
 Les regardant ſe reputent infames
 Avoir eu peur ouyr le bruyt des femmes.
 Tout ce cas fait, ainſi comme j'entens,
 Faiſeu leur diſt pour faire paſſer temps,
 Que dix eſcuz contre tous eulx va mettre,
 Qu'il fera bien tout leur cacquet remettre,
 Et que ſoubdain bien taire il les fera
 Sans leur toucher, & ne leur meſſera.
 Incontinent entre eulx fut fait la miſe ;
 Alors Faiſeu ſ'eſt mis tout en chemiſe,
 Et d'un habit de Diable il ſ'eſt veſtu ;
 Car à Paris il ſ'eſtoit eſbatu
 A l'achepter, pour maint paſſe-temps faire.
 Luy accouſtré en ce point, ne differe
 Bien toſt monter tout au hault de la hune,
 Cryant, hurlant ; incontinent pas une
 Femme qui fuſt n'a ſonné ung ſeul mot,
 Mais teuës ſe font, n'attendant que la mort,
 Car pour certain de grant peur admirable,
 Toutes cuydoient que ce fuſt le grant Diable.
 Ainſi gaigna, & chaſcun fut content,
 De dix eſcuz il fuſt payé contant,
 Ce luy fut gaing, & tout par adventure ;
 Il n'eſt qu'avoir d'eſprit bonne ouverture.

*Comment il cuyda à Angers estre surpris
avecque quelque fille dont estoit amou-
reux, & comment il se sauva.*

CHAPITRE XXVII.



SOUVENT voyt-on aucun faire
le fin,
Qui le plustost est trompé à la fin;
Comme il advint d'un qui si bien se
afforte

D'une fille, cuydant estre sa sorte,
Qu'il se fyoit en elle de son bien,
Bref tout conclud ne luy challoit de rien,
Car tant cuydoit prude estre sa servante,
Que de bonté d'elle par tout se vante;
Mais trop estoit en ce cas abusé,
Car lors Faifeu, en tel point bien rusé,
L'entretenoit, & soubz la couverture
Du patient. Or en fist ouverture
A ung quidam, vestu de grys ou vert,
Où se fyoit; qui tout a descouvert
Au Principal: quel voyant tel desordre
N'en est content, bien y pensant mettre ordre.
Or pour venir à fin de cestuy fait,
Ung jour faingnit aller aux champs; de fait
Il s'en partit, & dist ne retourner
A la maison, qu'il n'ayt fait attourner
Et accouter certaine son affaire.
Sa servante soubdain pas ne differe
Mander Faifeu, le quel à elle vint;
Vous orrez cy le cas quel luy advint.
Le Maistre avoit mis gens en eschaugette,
Dont l'un d'iceulx si bien à point le guecte,
E ij

Que pour certain leans l'a veu entrer ;
 Donc pour venir au point & mieulx rentrer ,
 S'en vint au Maistre , qui point veu ne l'avoit ,
 Mais en ung lieu ung autre entrée guettoit ,
 Et luy compta , comme très bien aprins ,
 Que si on veult le compagnon est prins.
 Joyeux il fut de le povoir surprendre ,
 Mais marry est sa servante reprendre
 De cestuy fait , veu que tant la amoit ,
 Et en elle tout son affy avoit.
 Or , pour conclurre , à sa porte est venu ,
 Faignant estre des champs jà revenu :
 La servante , qui point ne s'en prend garde ,
 A la fenestre incontinent regarde.
 Quant son Maistre jà venu apperçeut ,
 Comme morte quasi parler ne sçeut ,
 Sinon qu'elle dit à Faifeu , c'est mon Maistre.
 Donc tost respond ; où me pourray je mettre ?
 S'il me treuve je suis mort & perdu.
 Lors se advisa soubdain tout esperdu ,
 De se monter hault en la cheminée ;
 Ce qu'il a fait , sans noyse avoir menée.
 Le Maistre vint , qui entra tout fasché
 Luy & ses gens , querans où est caché ;
 Par tout ont quis , mais point ne le trouverent ;
 Et leurs espritz tous au cas approuverent.
 Quant eurent quis tant au hault comme au bas ,
 Sur les maisons , couvertures , rabbatz ,
 Pour leur chauffer l'un mist une bourrée
 Emmy le feu , qui tost fut esbourrée ,
 De quoy Faifeu fut ung peu estonné ,
 Et si en eut son esprit bestourné :
 Car la chaleur & fascheuse fumée
 Luy font trop mal (dont se amye est fumée.)
 Quant apperçeut ne povoir eschapper
 Sans estre veu , commença à taper

Et faire bruyt comme une ame damnée,
 Qui en enfer brusler est condamnée,
 Contrefaisant sa voix, faisant tonnoire,
 Se laissa cheoir au feu, puis print son erre
 A s'enfuyr. Chascun fuyt devant luy,
 Nul ne l'attend & ne luy fait ennuy,
 Car tant ont peur le veoir en telle sorte,
 Qu'il ne leur chault lequel de eulx premier sorte;
 Ung chascun d'eulx tant estoit interdit,
 Qu'ilz n'eussent sçeu que c'estoit avoir dit.
 Il s'en alla sans que nul le retint,
 Mais bien heureux le plus hardy se tint
 Estre eschappé, sans avoir autre attainte:
 Ainsi Faifeu leur bailla ceste estraincte.

*Comment au Mans il fist gageure avecques
 les Clercs de praticque, à qui feroit
 la plus belle Lettre.*

CHAPITRE XXVIII.



PAR tous climatz & en toutes con-
 trées,
 Les mains du Mans sont si bien acou-
 trées

A bien escrire, & la Lettre parer;
 Qu'en chascun lieu on s'en veult emparer.
 Or est ainsi qu'ung jour au Mans se trouve
 Ledit Faifeu, où pour faire une esprouve
 De son escrit encontre les Manceaulx,
 Il fist tel cas, dont on parle à monceaulx;
 Car se adressa à ung Clerc de Bazoche,
 Contre lequel dix beaulx escuz desbroche
 De son gibatz, que mieulx il escriproit
 Que ledit Clerc, si que jà n'en riroit;

Lequel Clerc tost contre luy alla mettre ;
 Que plus que luy il feroit belle Lettre.
 La mise tint, le Clerc va commencer
 Ung beau caddeau , qu'on ne sçauroit penser
 Ne regarder une chose mieulx taicte ;
 Mais plusieurs pointz fist ains que fust parfaicte ,
 Or toutesfois il la parfist enfin.
 Parquoy Faifeu , contrefaisant le fin ,
 Faingt perdu , luy requerant quictance
 Pour ung bancquet. Adonc le Clerc qui tance
 Luy respondit n'en donner ung escu.
 Doncques Faifeu sans tirer corps ne cu
 La plume a prins , & tyra une Lettre
 Triumphantment , sans ung seul trect y mettre :
 Donc fut jugé le Clerc avoir perdu.
 Alors requist, comme tout esperdu,
 Qu'allassent boire , & desjeuner ensemble ;
 Ce qui fut fait , luy coustant , se me semble ,
 Deux beaulx escuz pour faire le bancquet.
 Alors Faifeu ne perdit le caquet
 Le mercier du bancquet qu'il luy donne ,
 Mais des escuz rien il ne luy pardonne ,
 Car tout il eut ce qu'il avoit gaigné ,
 Oncques le Clerc n'en a rien rengainé.
 Ainsi monstra à tous qu'on ne doit croire
 En son sçavoir , car meint s'en peut mescroire.



*Comment à Chasteaulx en Anjou il fist le
Marchant de pourceaulx.*

CHAPITRE XXIX.



B IEN avez veu faisant ces tours &
 faultz ,
 Que par fortune avoit souvent as-
 faultz ,
 Par cy-devant, mais ung tour de sa
 Depuis ce temps eut, luy faisant la moë ; [roç
 Car comme alloit en maint pays à l'esbat,
 Elle luy joua ung tour de son rabbat :
 Car luy estant au beau pays de Touraine ,
 Et s'esbatant faire mainte fredaine,
 Et jeux joyeux, son argent tout perdit ;
 Dont son esprit quasi s'en esperdit.
 Or ce voyant, fallut vuyder la place ,
 Pour en chercher, tout soubdain se desplace ;
 Et par Chasteaulx en Anjou print chemin ;
 Dont vous verrez en charte ou parchemin
 Le tour qu'il fist en une hostellerie ,
 Nul ne le orra qui de bon cueur ne rye.
 Voyant qu'il n'a dont payer son escot ,
 Sans le conseil de Bede ou de Lescot,
 Il s'advisa Marchant se contrefaire
 De gras pourceaulx, & pour mieulx son cas faire ;
 Quant arriva, à l'holtesse il a dit,
 Que bien soubdain sans aucun contredit
 On espondist force bled ou aveine
 Emmy la cour, pour pourceaulx qu'on ameine
 Bien ung millier, dont il se dit Marchant.
 Ce qui fut fait, mais ne fut si meschant
 Que cependant n'ayt bien sa repeuë prinse,
 E iiii]

Et son cheval ; puis sans aultre reprise
 Quant heut disné , semble luy emuyer
 Qu'ilz ne venoient ; donc pour defennuyer
 Il fist semblant vouloir aller-encontre
 Sur son cheval , que soudain il rencontre
 Enharnasché , car nully ne doubtoit
 Que fust Faifeu , mais pour vray se l'estoit ,
 Qui s'en alla sans payer sa despence ,
 Car pas n'avoit le denier ; mais je pence ,
 S'il en eust eu , volentiers eust poyé,
 Quant en avoit tout estoit desployé.
 L'hoste se attend avoir des pourceaulx houstes ,
 Mais les avoir fust encore aux escouttes ,
 Et si fallut tout son bled reserrer
 Le lendemain , dont en eust de enferrer.
 Ainsi Faifeu leur monstra de ses gestes ;
 Esprit subtile à besoing vault Digestes.

Comment il dansa une Morisque en une chemise glacée.

CHAPITRE XXX.



U temps d'yver qu'il faisoit facheux
 temps
 Et tres grand froit , ainsi comme j'en-
 tends ,
 Nouvelleter luy print en fantaisie
 Ung certain jour , devant la Bourgeoisie ;
 Car sa chemise au soir il fist tremper ,
 Et mettre au vent pour de mieulx l'attremper ,
 Dont lendemain estoit toute glacée ,
 Et de glassons par tout entrelacée.
 Or en ce point il la print & vestit ,
 Et puis après ses jambes revestit

De clochettons ou petites sonnettes.
 Or sans plus prendre hardes ou besongnettes ;
 La telle nuë , en chemise , & piedz nudz ,
 Pour mieulx dancier & faire saulx menuz ,
 Ayant o luy ung menestrier abille ,
 Alla dancier parmy toute la Ville ;
 Dont fut bien rys : c'est tout ce que acquesta
 Pour celuy fait , rien plus ne conquesta ,
 Nulz biens ne veult , mais qu'il puisse complaire ,
 Onc ne voulut à personne desplaire ;
 Fors quant n'avoit argent , trouvoit moyen
 En recouerr de Chanoine ou Doyen,
 Ou aultres gens , sans le robber ou prendre
 Sans leur vouloir ; doncques il fault aprendre
 Necessité par esprit secourir ;
 Rien impossible à nul , sinon mourir.

Comment derechef fut amoureux de quelque Dame ; à qui, pour ce faire, donna trois aulnes de escarlatte.

CHAPITRE XXXI.



POURTANT qu'estoit frisque & gay ;
 bon marchand ,
 Chez quelque Dame il s'en vint bien
 marchand ;
 Car d'elle estoit feru de l'estincelle
 Du dard d'amour. Ung certain jour que d'elle
 Pensoit jouyr , il la pria très fort
 Que consentist , & y fist son effort :
 Ce qu'el' nyoit ; mais luy bailla si belle ,
 Que fut contente , & ne fut plus rebelle ,
 Ce moyennant que de luy eust present
 Honneste & bon: que le vaillant plaisant

Luy accorda. S'estoit de l'escarlette
 Dequoy luy faire ou robe ou coctelette.
 Le cas conclud , il ne fut si meschant
 La refuser , mais va chez ung Marchant
 Toit empruncter trois aulnes d'escarlatte ;
 Bien justement mesurées d'une latte ;
 Mais il fallut , comme aultrefois j'ay dit ,
 Qu'il laissast gage ou argent pour credit.
 Or est venu le vaillant cappitaine
 Vestu de drap , de soye , ou de fustaine ,
 Faire present à la Dame predicte ,
 Le sus nommé , sans faire aultre redicte ;
 Donc il jouyt de son veuil & plaisir.
 Or entendez , sans prendre en desplaisir ,
 Ce qu'il luy dist ; il luy a fait acroire
 (Car onc de luy ne se voulust mescroire)
 Que pour trop mieulx ce drap mettre en son
 Il fault qu'il soit par une nuyt attainct , [teinct ,
 De l'aer de nuyt , ou bien de la roufée.
 La sottie fut de son dit arroufée ,
 Tant quel' permist que tost on l'allast mettre
 En la gouttiere , où soudain le bon maistre
 Bien le trouva , le print , & le rendyt
 A son Drappier , dont l'argent qui luy duyt
 Luy fult rendu la propre matinée.
 La pouvre beste en fut bien mastinée ,
 Car a perdu son drap , presté son cu ,
 Et son mary par ce point fist cocqu.

*Comment chez une de ses tantes , trouva
ung coffre ouvert où avoit argent ; qu'il
print & y enferma ung regnard tout
vif.*

CHAPITRE XXXII.



UN G chascun sçet que oncques n'eut
convoitise
Biens amasser , mais bien pensoit la
guyse,
Quant n'en avoit, soubdain en recou-
Or chez la tante ung soir se va trouver, [vrer.
Où a trouvé ung coffre ou une huge
Tout descouvert , ne craignant Roy ou Juge,
Aussy pensant , comme très bien apprins ,
Qu'il est son hoir , car de l'argent a prins
Que y a trouvé , pour passer son affaire ;
Mais pour bien mieulx de tel cas se defaire ,
Qu'on ne doubtaſt que fust luy , ung regnard
Dedens posa , enferma , eu esgard
Qu'on penseroit que fust Diable ou Diableness ,
Ou quelque Esprit qui souvent les gens blesse :
Ce que fut vray , car nul n'osoit toucher
Au predict coffre , & en rien approcher.
Mais quelque jour Faifeu si est trouvé
Tout à propos , qui le fait aprouvé
Leur a rendu ; car soubdain on luy conte
Le cas predict , dont il ne tint grant conte :
Car tout soubdain , comme prompt & hardy ;
Je ne sçay pas si se fut au mardy ,
Mais toutesfois de la journée ne chaille ,
Il print la clef sans faire grant bataille ,
Le coffre ouvrit , d'ont saillit le regnard

Si très soubdain , que nul n'eut point de esgard
 A ce qu'estoit , mais faisoit grant tempeste ,
 Et ne sçavoient si s'estoit Diable ou beste :
 Ou coffre on quist , mais l'argent n'y fut plus :
 Donc pour conclurre , & venir au surplus ,
 Rien on ne sçeut de Faifeu la finesse ,
 De ce propos pour venir à fin esse.

*Comment pour quelque follietterie , ne se
 osoit trouver chez sa mere, & comment à
 ung soupper il se y trouva.*

CHAPITRE XXXIII.



OMME ay jà dit que par envie amere,
 Le plus souvent ne se osoit chez sa
 mere
 Trouver , ou veoir , par meschantz
 faulx raportz ,
 Dont bien souvent les justes poient deportz.
 Or advint il quelque fois que heut famine ,
 Et bien sçavoit que meint est qui fait mine
 A ung soupper , que chez sa mere on fait.
 Comme sçavez qu'en esté on le fait ,
 Ce soupper fut soubz le vollier ou treille ,
 Où y avoit maint flascon & bouteille
 Emmy la court , où faisoit mansion
 Sadiète mere. Or sans grant mension
 Faire ou desbat , voyant qu'on le desprise ;
 Incontinent en Diable se desguyse ,
 Et par le puy , dont devant est parlé ,
 Le vaillant corps est entré , & allé
 Se presenter devant la compagnie ,
 Où on souppoit ; qui tost descompagnie
 A bien esté ; car tant eurent de peur

Que la pluspart d'un moys ne fut a seur ;
 Car toutes pars chascun fut variable ,
 Et pour certain cuydoient que fust le Diable.
 Alors il fist au soupper son proffit ,
 Car à menger trouva tant qu'il suffist ,
 A ses compaigns alla ouvrir la porte ,
 Qui l'attendoient , & tout le cas leur porte :
 Or bien joyeux ilz furent pour ce coup ,
 Car ne pensoient en trouver si acoup.
 Les assiltens furent tous prestz refaire
 Autre soupper , ou penser aultre affaire ,
 Ce nonobtant qu'ilz n'eurent meshuy cueur
 Boire ou menger , ne pensans au mocqueur ;
 Mais le marchant ne fut pas desgousté
 De bien soupper , car rien ne luy a cousté.

*Comment ung jour vint à ung sien amy luy
 prier qu'il luy donna à bancquetter ; le-
 quel luy respondit qu'il n'avoit que ung
 pain de bien la velleur de cinq sols qu'il
 luy donnoit s'il le pouvoit manger ; &
 comment il en fist , & de la reponce qu'il
 fist après.*

CHAPITRE XXXIV.



LE vaillant corps n'estoit point des-
 gousté

Aller souvent en maint lieu & cousté,
 Quant il avoit d'aucune chose affaire;
 En demander jamais il ne differe.

Or ung jour fut , ou qu'il n'avoit argent ,
 Ou qu'on avoit emporté le regent
 De la maison , où le pain on enferme ;
 Mais toutesfois l'esprit n'avoit trop ferme

Pour ce jour là , pour la fain qu'il avoit ,
 Et croy vrayment que trouver n'en sçavoit ,
 Ou bien faisoit par maniere de rire :
 Car ce jour vint à ung sien amy dire
 Qu'il luy donnast ung peu à bancquetter ;
 Lequel respond , pour l'ouyr caqueter ,
 Qu'il n'a qu'ung pain , lequel luy abandonne ,
 Si tout manger le peult il le luy donne ;
 Car bien six solz il valloit grandement ,
 Dont n'eust cuydé qu'eust esté si gourmand.
 Ledit pain print sans que guere il empesche ,
 Incontinent il en a fait depesche ,
 Et le mengea ; dont son amy ne rist ,
 Car plus n'en a , & quasi s'en marrist ,
 Pourtant qu'avoit aussi le Capitaine
 Beu de son vin deux potz sans grande peine ,
 Et ne luy chault si nul en est marry ,
 Femme , ou Varlet , Chamberiere , ou Mary ;
 Mais devant tous faisant ung tour ou roë ,
 Pour tout payement il luy a fait la moë ;
 Puis luy a dit que luy & sa jument ,
 Sa femme , enfantz , chatz , chiens en meint moment
 Et son cheval , son Varlet , Chamberiere ,
 Tout son avoir , & devant , & derriere
 Il mengeroit , & le grant Dyable o tout.
 Donc son amy ayant esgard à tout ,
 Malgré ses dens luy a fallu en rire :
 Parquoy le fait j'ay bien voulu escripre ,
 Car pour tout vray luy mesmes l'a conté ,
 Comme il est cy en ce lieu raconté.
 Dont vous voyez qu'en faitz & en langage
 De plaisanter en tous lieux faisoit rage.

*Comment il vendit du vin sur les champs,
qui estoit à sa mere.*

CHAPITRE XXXV.



N doit penser que le mal S. François
Souvent avoit (comme on voit maint
François ,

Qui à gaudir s'esbat & prend sa cure;)
Si le surprint , mais soudain il pro-

En recouvrer , non par sort ou Devin. [cure

Il est certain que sa mere eut de vin

Ne sçay combien , mais toutefois grant nombre ,

Elle en avoit aux champs ; or une encombre

A tost trouvé pour en avoir argent

Le vaillant filz , car bien fut diligent

Mener Marchant , auquel l'a démontré ,

Vendu , livré , & luy a remontré

Tost le lever , ou bien du garantage

Ne luy promet , mais luy dist davantage

(De peur qu'il fust d'aucun anticipé ,

Après avoir amplement occupé

Tout le payement ,) mon amy , or te haste

Lever ton vin , ou bien le cas tu gaste ,

Car si tu faulx ce jourd'huy le lever ,

Aucun pourra contre toy s'eslever ,

Lieve le tost , car present le te livre ,

Et l'emmener tout soudain te delivre.

Le Marchant fut de son fait paresseux ,

Car il ne sçeut lever du vin , que deux

De ses tonneaulx , qu'incontinent la mere

Ne le sçeut bien , dont eut douleur amere ;

Mais toutesfois à ce cas a pourveu.

Tout regardé , advisé , & prou veu ,

Le Marchant fut trompé par sa paresse ,

La mere aussi que le cas appareffe ,
 Perdit du vin deux pippes ; toute somme
 Pierre eut argent , dont indigence allomme.
 Voyez comment en plain jeu ou rabbatz ,
 Pierre Faifeu ufoit de ses esbatz.

*Comment il devoit argent à ung creditur,
 qui le mist en Justice.*

CHAPITRE XXXVI.



AYANT usé de plusieurs passe-temps,
 Ung certain jour il fut , comme j'en-
 tends ,
 D'ung creditur evocqué en Justice ,
 Où il respond ; mais craignant inju-
 Ont appoincté certain jour se trouver [Justice ;
 En aucun lieu pour la debte approuver.
 Or est ainsi que Faifeu anticipe
 Aller au lieu , & aux gens s'esmancipe ,
 De la maison , compter tout son affaire ,
 Leur suppliant que brief luy vueillent faire
 Quelque plaisir , leur promettant buttin
 De ce que aura en jouant son luttin.
 L'hoste & l'hostesse en ce ne le desdirent ,
 Mais d'un voulloir tres volentiers luy dirent ;
 Que prestz estoient faire à sa volenté ,
 Et que soubdain il fut entalenté
 A leur compter la maniere de faire ,
 Qu'il veult user , pour du cas se defaire.
 Incontinent leur va dire ; escoustez
 En une chambre il fault que m'acoustrez
 Ensepvely , comme faictes ung mort ,
 Sans de ce cas en declarer ung mot ;
 Au creditur venu ferez acroire ,

Que

Que plus que luy m'avez voulu acroire ;
 Mais que le temps est venu de respit ;
 Et en pleurant , semblant très grant despit ;
 Me direz mort , couché en une chambre
 En vostre hostel , ensepvely de chembre ;
 S'il ne le croit menez le soubdain veoir
 Au lieu predict , luy faisant assavoir
 Ce que vous doibz me donnez en presence
 Du bon du cueur , ayant gant desplaisance
 De mon trespas , mais fault qu'il y ayt gens
 Qui tesmoigner le fait soient diligens.
 Comme il conclud , l'affaire fut parfait
 En tous endroitz , & par dit & par fait.
 Le creditur ne fist pas grant demeure
 Qu'il ne viensist à une certaine heure ,
 Qui mise estoit entre les deux parties ,
 Maintes larmes & douleurs départies
 Furent present par l'hostesse & par l'hoste ;
 Le creditur de ce propos les oste
 Leur demandant si nul d'eulx a rien sçeu ,
 Que venu soit Maistre Pierre Faifeu.
 L'hoste s'escrie , & la femme se pasme ,
 Les regarder , mon serment , c'est ung basme ;
 Car affermans , dirent au creditur
 Ce que Faifeu a esté inventeur ;
 Qu'il ne soit vray le meinent en la chambre ,
 Où est Faifeu , ne demenant nul membre ,
 En luy disant qu'il leur devoit beacoup ,
 Mais tout pour Dieu luy donnent à ce coup.
 Le creditur meu de misericorde ,
 Tout hault a dit , par ma foy je m'acorde
 Tout luy donner ce que il me debitoit ,
 Don luy en faitz , car pas grans biens n'avoit.
 Incontinent deux tesnoings , ung notaire ,
 Se vont monstrier , Faifeu comme est notaire
 Toft s'est levé , dist ; aultre cas ne quiers ,

Je vous mercy , instrument j'en requiers.
 Ainsi quicté fut par subtilité ;
 Après avoir , il n'est qu'abilité.

*Comment pour quelque cas à Tour fut prins
 par plusieurs Sergeans pour le mener en
 prison , dont en porta ung en une Esglise,
 & gaigna franchise.*

C H A P I T R E X X X V I I .



FAIFEU estoit tant gay gentil & noble,
 Que bien souvent , n'ayant escu ne
 noble ,
 Vicarioit en maint contrée & lieu ,
 Où bien sçavoit s'acoustrer de son jeu.
 Or toutesfois , faisant maintz faultz & tours ,
 Ung certain jour il se trouva à Tours ,
 Où fut surprins , comme faulte foulz lye ,
 D'un cas trop jeune ou petite follye ;
 Car par Justice il fut soudain reprins ,
 Et par Sergeans huyt ou neuf il fut prins :
 Grant nombre estoient , car quant l'avoient happé ;
 Par plusieurs fois leur estoit eschappé
 Par son sçavoir , dont pensoient y mettre ordre
 Par estre tant ; vous orrez le desordre.
 Quant l'eurent prins , se tindrent environ
 De tous endroitz , tirans à l'aviron
 Le pouvre corps comme une ame dampnée ,
 Qui à boullir est desja condampnée.
 Or toutesfois voyant le deshonneur
 Qu'on luy faisoit , leur requist par honneur ,
 Sans luy tenir rigueur si très austere ,
 Que par les ruës chascun se vueille taire ,
 Aussi leur pleust luy faire ce bon tour ,

Qu'un le tenist, & les aultres entour,
 Sans nul semblant que fust un prisonnier,
 Ce qui fut fait; alors un personnier
 De ceste bende, entreprint le negoce,
 En se vantant par son Dieu qui que groce
 Bien le tiendra: lors sans faire aultre mise,
 Il a saisy sa manche de chemise
 A beau plain poing, feignant que fust la main;
 En le menant sans attendre à demain.
 Or vous sçavez, quant aucun à affaire,
 Et est lyé, ne tasche qu'à deffaire
 Les siens lyens, mettant tout son esprit
 A eschapper, on le voit par escript.
 Ce cas Faifeu par vraye experience
 Leur a monstré, car soubdain en presence;
 Sans y prevoir fors à necessité
 Le tour qu'il fist est icy recité.
 En chemynant, que le fait ne desguyse,
 Le vont passer par devant une Eglise;
 La congnoissant, de tout son cueur s'efforce
 A y entrer, car par très vive force
 Tourna son bras & chargea le Sergeant
 Dessus son doz, car là n'estoit songeant,
 Et se jecta tout chargé à la porte
 De ceste Eglise, où son Sergeant il porte;
 Mais en entrant cheurent tous deux tel fault;
 Qu'on les cuydoit tous deux mortz de primfault;
 Car le Sergeant estoit, comme on les veoit,
 Gros & enflé, dont trop grant faix avoit.
 Incontinent Faifeu se lieve & dresse,
 Au benoistier joyeusement s'adresse,
 Audit Sergeant & à tous ses consorts
 (Qui luy disoient meschant deshors tost sorts)
 Baille eaue beneyte en demandant franchise.
 Voyant qu'il est entré dedens l'Eglise,
 Desditz Sergeant un chacun d'eux s'efforce

Le mettre hors de sa franchise & force ;
 Mais meint voisin tost y est acouru ,
 Qui en son droit l'ont à gré secouru ,
 Et ont tous dit aux Sergeans , sans debattre
 Ailleurs il fault que vous aillez esbatre.
 Ainsi fault veoir que Faifeu improveu ,
 Par son esprit a esté reproveu ;
 Car comme on dit , souvent en meinte estorce
 Le bon esprit vault mieulx que nulle force.

*Comment à Angers il joua avecques les
 Egyptiens , qu'il affina.*

CHAPITRE XXXVIII.



AGABUNDER on voit ung chascun
 jour
 Egyptiens , sans faire long sejour ;
 Quelz ensemble ont une coustume
 telle ,

Qu'ilz usent fort de jeux & de cautelle.
 Angers en vint ung jour pour heberger ,
 Qui à meint jeu jouoient ; pour abreger ,
 Ung jeu faisoient avecque une ceinture ,
 Qu'en ung baston mettoient , sans ouverture
 Ilz en tiroient , dont se mettoit meint gage :
 Par ce moyen de gagner faisoient rage.
 Or s'advisa Faifeu faire ung bon tour ,
 Quel j'escripray icy en ce detour.
 Il se vestit en robes de Village ,
 Puis par dessus print ung aultre abillage ,
 Car de velours gentement s'accoultra ;
 Ses compagnons en ce point rencontra ,
 Ausquelz il dist ; pour entendre l'affaire ,
 Je vous diray que aujourd'huy nous fault faire ;

Trouver convient , pour finer à mes dictz ;
 De beaulx escuz une douzaine ou dix ,
 Puis vous irez quatre ou cinq tous ensemble
 Sans qu'en nul point nul de vous se desseuble ;
 Au port Ligniers veoir les Egyptiens ,
 Où je seray ; alors foyez sciens
 Jouer à eulx , si de ce vous requerent ,
 Ce qu'ilz feront , aultre chose ne querent ;
 Je suis certain pourtant qu'ilz me oyeront
 Nommer Monsieur , & aussi qu'ilz voyeront
 Le mien estat , me bailleront les gages.
 Obtempèrans ensemble à ses langages ,
 Ilz sont allez où Faifeu leur a dit ,
 Où ilz ont fait & tenu son esdict.
 Incontinent l'un c'est venu à mettre
 Ung bel escu la ceinture desmettre.
 L'Égyptien voyant Faifeu auprès
 Si bien en point , luy requist tout exprès ;
 Comme au plus grant , qu'il luy pleust estre garde
 De leur argent , puisque là les regarde.
 Ce qu'il voulut ; l'escolier a perdu ,
 Mais tout soubdain , comme non esperdu ;
 Il a remis d'or encore une pieſce :
 Lors reperdit dont feingt qu'il se despiefce ;
 Or a juré , s'on ne luy fait reffus ,
 Adventurer encore dix escuz ,
 Ce qu'il a fait & les mist tout à l'heure.
 De celuy fait l'Égyptien ne pleure
 Mais meſt aussi entre les mains Faifeu ,
 Qui luy bailla soubz le ventre le feu ;
 Car tout soubdain qu'entre eulx il veit desbattre ,
 Faisant leur jeu , il laissa sans rabattre
 Tumber sa robbe ; incontinent ses gens
 La redresser ne furent negligens :
 Lors demoura acouſtré en Village
 O les escuz , q'heut par subtil pillage ;

Car en l'estat nul ne l'a recongneu ;
 Aussi qu'il fait du cas fort l'incogneu.
 L'Egyptien remply de dueil & de ire ,
 Pour abreger , ne sçeut quasi que dire ,
 Fors qu'il disoit , pour ce propos finer ,
 Qu'on ne l'avoit jamais sçeu affiner
 Jusques Angers , où s'est venu soubzmettre
 A affiner , mais a trouvé son Maistre.

*Comme l'an 1518 que le Roy François
 fut à Angers ; devant des Seigneurs
 de la Court il mengea des mousches.*

C H A P I T R E X X X I X .



' A N mil cinq cens dix huyt , ce me
 semble.
 Du Roy François Angers la Court
 s'assemble ; [toient ,
 Or tous Seigneurs de la France y es-
 Je croy que nulz pour le temps ne restoit ,
 Tant que logis par tout on requeroit ,
 On le sçauroit qui bien s'en enquerroit ;
 Nul ne pouoit bien loger sans grant mise.
 Donc la maison de Faifeu fut admise
 Et retenüe à ung très gros Seigneur ,
 Je ne dys pas qu'il n'en fut de greigneur ,
 Mais toutesfois en Court avoit grant vogue ;
 Bien estimé , tenu puissant & rogue ;
 Auquel Faifeu faisoit meint passe-temps
 Et jeu joly , & plaisant. Dont j'entends
 Qu'en Court en fist aux Seigneurs grant nouvelle ,
 Et ses beaulx faitz à plusieurs renouvelle ,
 En l'estimant pour vray le plus plaisant
 Qu'on veit jamais , sans estre desplaisant ,

Chascun avoit de le veoir grant envye ,
 Autant qu'aucun qui pour lors fust en vie ;
 Dont ung Seigneur des plus grans de la Court ,
 Le fufdit Sieur fupplia bref & court
 Le luy monftrer ; le cas pas ne differe ,
 Mais l'a mené au logis pour mieulx faire ,
 Et luy a fait ung fort riche bancquet ,
 Pour mieulx ouyr de Faifeu le caquet ,
 Lequel eftoit empesché au service ,
 Ce simulant merencolicque & nice ;
 Mais le Seigneur qui là eft pour le veoir ,
 Le demander fift très bien fon devoir.
 On luy monftra , lors le fift feoir à table ,
 Dont contrefift le refolu & ftable.
 Quant fut affis nul mot il ne difoit ,
 Ses geftes fort le Seigneur advisoit ,
 Mais bien le veoit qu'il mengeue & digere ;
 L'interroguer très volentiers s'ingere
 Qu'il ne parloit , veu que par tout on bruyt
 Que de jaser il emporte le bruyt.
 Lors respondit au Seigneur comme fage ,
 Non eftourdy , volaticque , ou ruffage ,
 Ung fol eft bien entre fages ouy ,
 Mais icy fuis quasi evanouy.
 Lors le Seigneur qui entend bien fon dire ,
 Et les prefens , fe font tous prins à rire ,
 Et en riant de bon cueur le requerent ,
 Qu'il paffe temps , aultre chofe ne querent.
 Incontinent , fans changer de propos ,
 Mousches à tas viendrent faire repos
 Dedens ung plat , quel devant luy on pofe ;
 A les happer foubdain fa main appofe ,
 Dont il en print ung très fort grant monceau ;
 Et les pofa toutes à ung morceau
 Emmy fa bouche ; & feignant les menger
 Faisoit semblant ahanner les renger.

Ledit Seigneur, qui de luy se prent garde ;
 Très voulentiers son passe-temps regarde ,
 Le requerant qu'il luy dist un petit
 Si tel morceau luy donnoit appetit.
 Il respondit que d'icy en Yrlande
 Impossible est trouver meilleur' viande ;
 En affermant s'il y avoit gousté ,
 De toute aultre il seroit desgousté.
 Dont chascun rist, lors Faifeu print sa game
 A bien jaser, car en toute une rame
 De bon papier on ne scauroit escripre
 Les motz qu'il dist, qui estoient tous pour ryre ;
 A ce bancquet tant fist de passe-temps ,
 Que les presens s'en allerent contens ;
 Car en la Court en firent tel memoire ;
 Qu'audit Seigneur plus de cent fois à boire
 Il en cousta, dont se fust bien passé ;
 Les tres-passez *requiescant in pace.*

*Comment à Angers une certaine nuyt il joua
 avecques un jeune Prothenotaire Ab-
 bé, qui gaigna son argent & le gaudist ;
 mais il emporta subtilement sa Robbe.*

CHAPITRE XL.



CHASCUN sçet bien, n'eust-il nul
 revenu,
 Que par tous lieux estoit le bien venu.
 Or est ainsi, si qu'à tous soit notoire,
 Qui se trouva chez un Prothenotai-
 Bien gros Seigneur, jeune Abbé & joyeux, [re,
 Qui à meint jeu estoit très grant joueux.
 Angers tenoit son mesnage & mesgnye,
 Faifeu souvent luy tenoit compaignie,

Et pour certain estoit son compagnon
 Quant à jouer, son privé & mignon.
 Ung jour advint qu'ilz jouerent aux chartes,
 Où il fut beu maintz potz de vin & quartes;
 Faifeu jouant fut prest & diligent
 Mettre & tyrer au jeu tout son argent,
 Autres plusieurs à jouer se disposent,
 Et leur argent pareillement y posent:
 Faifeu fut fin, car ainsi qu'il gaignoit,
 Des compagnons l'argent il enguainoit
 Secrettement, tousjours feignant la perte
 Tumber sur luy, patente & toute aperte;
 Dont il escheut le gaing estre à l'Abbé,
 Qui de tous eulx c'est mocqué & gabbé.
 Bien nuyt estoit, temps fut qu'on se retyre,
 L'un sur ung list ou sur ung banc se tyre
 Pour reposer, car le jour estoit près:
 Tout chascun dort, fors Faifeu, qui exprès
 (Quant voit dormir ainsi toute la bende)
 Son vif esprit subtillement desbende,
 Du quel tyra dens une garde robbe,
 Où il attaint, une très bonne robbe,
 Qui bien valloit des escuz trente ou vingt:
 Toist la saisit, puis chez luy il s'en vint.
 La dicte robbe estoit à ce bon Maistre,
 Qui les gaudir se voullut entremettre
 Quant eut gagné, comme il est sus escript.
 Faifeu soubdain, sans perdre son esprit,
 Bien essuya la robbe dessus dicte,
 Quant l'eut chez luy apportée & reduytte;
 Puis il s'en vint à aucuns ses voisins,
 Ne sçay s'ilz sont ses parens ou cousins,
 Mais leur promist payer vin pour l'admende;
 Et que l'on dist si aucun le demande,
 Que pour certain bien matin est sorty,
 Fort bien monté de cheval, & sorty.

D'acoustrement, quel la nuyt a fait faire ;
 D'une robe laquelle a fait defaire ,
 Dont il leur dist la façon & couleur ,
 Si que l'Abbé en eust plus grant douleur ;
 Aussi qu'on dist que tout il a fermé ,
 Et que chez eulx ses clefz a enfermé.
 Pourtant qu'il n'a reposé qu'à demy ,
 En son liect s'est couché & endormy ,
 Où de longtemps il ne s'est resveillé ,
 Pour ce qu'avoit trop longuement veillé.
 Le lendemain l'Abbé s'esveille , & sourt ,
 Des compagnons ung chascun fait le sourd ;
 Car nul ne peult se resveiller ne souldre ,
 Dont de tel cas sont aisez à absouldre.
 Le dict Abbé premier se reveilla ,
 Puis les gallands tout soubdain esveilla ;
 Fors que Faifeu , qui a fait sa passée ,
 Dont il est cheut en très grande pensée.
 Incontinent en son estude va ,
 Où son meilleur habit il ne trouva ,
 Lors a congnu (la fortune advenue)
 Que c'est Faifeu qui baille tel' venue.
 Tost chez luy va le pensant retrouver ,
 Mais il n'est prest son habit recouvrer ;
 Car des voyfins nul n'y a qui l'accuse ,
 Mais chascun d'eulx bien fermement l'excuse ;
 Comme dessus icy est recité ,
 Qui à l'Abbé grant dueil a incité :
 Car bien congnut telle enseigne estre vroye ,
 Dont de douleur tout son esprit desvoye ;
 Mais il crainct plus mocquerie en effect ,
 Que perte ou coust que Faifeu luy a fait :
 Or s'en resva , car plus ne sçet que faire.
 (Faifeu levé) plus guere ne differe
 Dudiect habit bien se faire acoustrer ,
 Au prime ouvrier qu'il a peu rencontrer ;

Puis s'en alla, sans plus à nul débattre ;
 En plusieurs lieux sur les champs pour s'esbattre.
 Ainsi trompa il l'Abbé finement,
 Qui se mesloit vers luy d'affinement,
 Car quant Faifeu fut de retour en Ville,
 L'Abbé ne sçeut tant fin estre ou habille,
 Qu'il sçeut le fait luy faire reconnoistre ;
 Tant peust sur luy bien sa robbe congnoistre.
 Car du cas fist tant fort le descongny,
 Que l'Abbé dist estre donc incongny,
 Comme en ce point sa robbe on luy embla.
 Ainsi Faifeu o luy se rassembla,
 Et de la robbe il ne fist recompense ;
 Ung bon penseur pense au revers qu'on pense.

*Comment il avoit une garce chez luy, de
 laquelle, quant il en fut ennuyé, s'en
 despescha subtilement.*

CHAPITRE XLI.



AUCUNE fille ung coup fut amou-
 reux,
 Dont en passa maint jour moult lan-
 goureux,
 Tant qu'il advint que d'elle eut jouys-
 A son vouldoir, & tout à sa plaifance. [sance
 Mais proprement, tout ainsi que la pluye
 Fort désirée, incontinent ennuye,
 Luy ennuya avoir ung tel fardeau.
 S'en despescher bien vouloit le hardeau,
 Mais ne pavoit à son plaisir en faire ;
 Parquoy encore ung peu de temps differe.
 Or pour plus seur son vouldoir mettre à fin,
 Luy qui estoit entre tous le plus fin,

A la commere il dist une soyrée ;
 Au plus matin que serez efforée ,
 Si que trop miculx je vous puisse emboucher ;
 Il fault qu'aillez parler à ung Boucher ,
 Et achepter pour dix solz de viande ,
 Car au disner demain une grant bende
 De compagnons seront avecques moy .
 L'argent a prins au matin sans esmoy ,
 Au Boucher va pour faire son emplette .
 Tandis que fut , Faifeu soubdain explette
 Bien aultrement qu'ainsy comme elle entend ;
 Car luy cerchea ses hardes tout content ,
 Et les bailla , si bien le cas desine
 (Pour les garder) à une sa voisine ,
 Et luy bailler quant seroit de retour .
 Ainsi Faifeu luy joua de ce tour ,
 Puis il en sort en fermant l'huys & porte ,
 Avecques luy toutes ses clefz emporte ,
 Et s'en alla aux champs pour passer temps .
 La dicte fille , ainsi comme j'entends ,
 Long-temps ne fut , mais à la revenuë
 Bien esbahye elle est de la venuë ;
 Ce nonobstant bien long-temps attendit
 Son revenir , mais enfin entendit
 Que sondict Maistre ainsi l'avoit pippée ;
 Et cautelement de chez luy extirpée :
 Lors s'en alla , pour faire fin de compte ,
 Cercher parti à tout sa courte honte .
 Ainsi Faifeu à chascun a aprins
 S'en depescher , quant prou on en a prins .

Comment à Saulmur il se trouva en certaine compagnie, où fut faicte une folle, dont il fut prins, & mis en prison; & comment il demanda estre renvoyé à Angers; & comment à saint Ebroüil il se sauua.

CHAPITRE XLII.



Saulmur fut une fois pour s'esbattre;
 Où de gaudir fist feu; mais sans débattre,
 Ung jour advint qu'il se trouva en lieu
 De celle Ville, au bout ou au milieu,
 Où il fut fait je ne sçay quel' folle,
 Ainsi qu'on voit que jeunesse folz lye.
 Or est ainsi qu'en ce fait il fut prins,
 Et griefvement en fut soubdain reprins;
 Car en prison il fut estroitement,
 Où on luy fist très mauvais traictement,
 Ses subtilz jeux, ses quacquetz, & ses baddes;
 Ses faultz legers, ruaddes, & gambaddes,
 Son bon cheval, ne ses habiles tours;
 Tous ses amys & d'Angers & de Tours,
 Si tout leur bien en ce eussent despendu,
 N'eussent pas fait qu'il n'eust esté pendu;
 Car pour certain tous les gens de la Ville
 Avoient horreur d'ouyr ung cas si vile,
 Et à mourir estoit jà condampné,
 Dont eust voulu quasi estre dampné;
 Mais en telz cas, soient Medicins ou Mires;
 A ce saulver chascun ouvre ses vires.
 Il s'advisa, comme homme qui n'est sot,

Qu'il n'estoit pas jugé par son ressort ;
 Car pour ce cas requiert qu'on le renvoie
 Devant son Juge Angers , si qu'on revoie
 Le sien procès , où pour le faire court
 Appellera plainement à la Court.
 Pareillement ses amys en requirent
 Les Officiers d'Angers , qui soudain quirent
 Tout le moyen de luy faire service,
 Pour doucement le purger de son vice.
 Ceulx de Saulmur n'oserent contredire
 Ce qu'il requist , ne rien encontre dire ,
 Mais advisé fut par ung certain jour ,
 Qu'on le maineroit , sans faire long sejour ;
 Dont fut joyeux quant de ce on l'advertit ,
 Croyez pour vray que rien n'en divertit.
 Quant lçcut le jour , à quelcun son segret
 (Qui de le veoir sortyr n'avoit regret)
 Dist ; mon amy , à tel jour & telle heure
 Je te supply' , sans faire aultre demeure ,
 Que soys Angers pour mon cas incité ,
 A saint Eburou qui est en la Cité ,
 Mettre ung brandon feignant estre taverne ,
 Si je ne faitz ung bon tour , qu'on me berne ;
 Aussi fault-il qu'ays Notaire & tesmoings ,
 Pour veoir comment je sortiray des mains ,
 De ceulx qui ont commission me rendre
 A mon Juge , me cuydant faire pendre.
 Son compagnon luy a promis ce faire ,
 Disant adieu , de luy se va defaire.
 Or vint le jour que Faifeu fut tyré ,
 Pour estre Angers tout soudain attiré ;
 Lors dist à ceulx qui de luy charge avoient ,
 Pour ce qu'Angers les destours ne sçavoient ,
 Mes compagnons je suis en vostre garde ,
 Mais quant à moy souvent bien je regarde ,
 Considerant que me menez à fin ,

Donc n'ay parent, parente, ou affin
 Qui me saulver eust povoir ou puissance ;
 Parquoy suis cheut en très grande impuissance ;
 Aussi pour vray que me menez ès mains
 D'un Chartrenier, plus larron des humains ;
 Car si j'avois mille escuz en ma bourse,
 Ne cessera que tous ne les desbourse,
 Et n'en feray pour ce jà mieulx pensé :
 Par tant enfans en moy mesme ay pensé,
 Que j'ay encore escuz ou trois ou quatre,
 Que nous beurons sans denier en rabbattre
 Sur le chemin, car je sçay bien pour voir
 Que mes amys tous voudront bien pourvoir
 A me nourrir, & me faire grant chere
 En la prison, qui me sera bien chere ;
 Dont je vous pry', sans enfreindre à l'office
 Que vous avez, me faciez ung service,
 Qui pour certain rien ne vous coustera,
 A mon prier chascun escouterà,
 Je vous supply' ne me faictes l'injure
 De me mener par la ruë, car je jure
 Que mes parents en mourroient de despit.
 Les compagnons respondent sans respit,
 Qu'ilz sont contentz admettre la requeste,
 Or pour parfaire & leur charge & leur queste.
 Ilz ont Faifeu bien lyé & billé,
 Le pouvre homme est laydement habillé.
 Or pour venir à fin d'iceluy conte,
 Sur ung cheval ou jument on le monte
 Pour le mener, quasi desesperé
 L'ont de Saulmur soubdain desemparé.
 Dieu sçait comment son argent luy fut cher,
 Pour employer en vin, poisson ou chair,
 A festoyer les gallands, qui le meinent,
 Et qui ainsi pouvrement le demeinent :
 Lieu n'ont trouvé ou y eust vin en broche

Sur le chemin , que Faifeu ne desbroche
 De sa bougette argent sans estre chiche ,
 S'il peust sortir de leurs mains il fust riche.
 Quant furent près de la Ville & Forsbourgs ;
 Ne demandoient vielles ne tabours
 Pour tympaner leur entrée & venuë ,
 Artillerie ou grosse ou bien menuë
 On ne sonna , mais bien secrettement
 Se fist mener o grant regrettement ,
 Par sur les murs du portail de Toussaincts .
 A saint Eburou se sont trouvez tous sains.
 Quant Faifeu veit le brandon à la porte ,
 En cest endroit il veult qu'on se transporte ;
 Car son argent y sera despendu ,
 Puis qu'aussi bien il fault qu'il soit pendu.
 Les conducteurs n'y firent resistance ,
 Mais au brandon vont faire residence ,
 En esperant que fust pour bancquetter ;
 Mais fault que ailleurs en aillent donc quester.
 Lors il entra premier , chascun le suyt ,
 Quant fut entré il fist ce que s'ensuyt ,
 De l'eau beneyte il print & leur en donne ,
 En leur disant que tout il leur pardonne
 Qu'ilz luy ont fait , si que rien ne desguyse ,
 Franchise il veult , pourtant qu'est en l'Eglise.
 Ilz ont juré qu'ilz le traioient par force ,
 Mais on leur dist , nully ne s'i parforce :
 On leur monstra Crucifix , & Aultiers ;
 Ainsi trompez furent povres gaultiers ,
 I faire rien tout ne leur vault ung double ,
 S'en plaindre aussi leur travail en redouble ,
 Le meilleur point fut leur en retourner
 Ung doy au cul , pour mieulx les attourner ,
 Et l'autre en l'œil à Saulmur leur complaindre ;
 On se mocqua d'eulx , en lieu de les plaindre.
 Par ce moyen fut Faifeu acquitté ,

Bien

97

Bien aysement de son iniquité ;
Car tel estoit le voulant faire pendre ;
Qui fut joyeux un bien peu d'argent prendre ;
Subtilité ainsi le delivra ,
Mais à Saulmur grant mocquerie livra.

Comment Faifeu entretenoit certaine fille , à qui il fist une autre fille.

CHAPITRE XLIII.

QUANT eut regné ainsi par un long
temps ,
Tous ses amys n'estoient pas trop con-
tens
Qu'il ne mettoit peine à se retyrer ,
Ce nonobstant qu'onc ne vult attirer
A faire mal , mes en joyeuseté
Tousjours par tout il a joyeux esté ,
Et gaudisseur , entretenant commeres ,
Tant qu'il en fut , que devenir fist comme meres ;
A l'une il fit une très jolye garse ,
D'elle parler jamais je ne m'esgace ,
Pourtant qu'Angers de present elle fait feu ,
Degenerer elle ne pourroit Faifeu ,
Car à la veoir (ainsi qu'on me rapporte)
Audit Faifeu de visage reporte ,
En faitz & ditz oncque on ne veit pareille ,
Les plus gros Sieurs luy prestent leur oreille ,
En plusieurs lieux , où grands de fain choirroint ;
Les bons morceaulx souvent luy eschoirroint ,
Car en Angers , pour faire fin de compte ,
Quant à jaser , d'elle on tient fort grant compte ;
Mais en ces ditz pas ne tient grans propos ,
Car son esprit n'a guere de repos ,

Mais toutesfois souvent à plus sotz qu'elle
 Mangeust le pain , & meinte aultre sequelle ;
 Pour demonstrier , par inclin paternel ,
 Que du tout n'a retins le maternel ,
 Quant du babil elle tient de son pere ,
 Et de piffer elle tient de sa mere.

*Comment ses parens le pathelinerent & re-
 darguerent tant , qu'il fut de oppinion
 estre marié.*

C H A P I T R E X L I V .



OUR revenir à noz premiers mout-
 tons ,
 Si que ses faitz mieulx au vray nous
 mettons ,
 Comme j'ay dit devant que ses amys
 Estoient fachez quasi plus que demyz ,
 Et courroucez que bien ne se retyre ,
 Aucun amy des siens vers luy le tyre ,
 Luy remonstrant qu'il avoit bon sçavoir ,
 Et congnoissant prou pour richesse avoir ,
 Et que temps est de ses follyes congnoître ;
 Et s'arrester non pas se descongnoître.
 Bref tout conclud , tant l'alla harier ,
 Que content fut qu'on l'allast marier ,
 Jamais ne sçeut de ses gens se defaire ,
 Qu'il ne fallust , pour tel sot marché faire ;
 Qu'on le menast si bien le goustier
 Pour querir femme à Chasteau-Gontier.
 Le jour fut prins de toutes les parties
 Pour fiancer , là furent departies
 Meintes baves , meinte promesse ont fait ;
 Comme on sçet bien qu'à tel marché on fait.

L'un luy afferme, elle a mille ducatz,
 Où onc ne fut advertye du cas;
 L'un dist, il est fort sçavant & bien riche,
 Où il n'a pas vaillant une bouriche.
 Voyez comment faisant telz quariages,
 Souvent on est trompé ès mariages:
 Or pour finer on l'a tant avancé,
 Que de par Dieu femme il a fiancé.
 S'il n'est content, il fault qu'il se contente
 C'est le plus fort mais qu'il mette en contente.
 La mariée est bien du marié
 Pour le present, mais soubdain harié
 On l'a vers elle, & par faulx raportz faire,
 Tant que voudroit du marché se defaire,
 Car on luy dist qu'il n'est q'ung gaudisseur,
 Joueur, pippeur, de follyes banisseurs,
 Dont pour certain elle veult, pour tout conclurre,
 De ce marché son fiancé forclure.
 Ung jour Faifeu va tout exprès la veoir
 Chez ses parentz, en esperant l'avoir
 Comme promise à luy & accordée,
 Mais la trouva toute defaccordée
 D'avecques luy; dont fut bien estonné
 Autant ou plus que si là eust tonné:
 Car luy a dit; mon amy ne te pene
 Me pourchasser, car tu perdras ta peine,
 Jamès o toy ne feray demourée,
 Et fusse-tu tout vestu de morée;
 Car on m'a dit, pour le cas abreger,
 Que tu n'as point où ton doy herberger.
 Faifeu respond; pas il ne vous fault croire
 Ce qu'on vous dit, on le vous fait acroire,
 Mais en nous deux il nous fault adviser,
 Sans à jamais en rien nous diviser,
 Jour consonant pour noz nopces parfaire,
 Et espouser, ne voulez-vous pas faire

Ce que je dis ? Si dist ; non par ma foy ;
 Plus fort qu'avez vous n'aurez pas ma foy ;
 Quant il congnut qu'on l'avoit subornée ,
 Et le laisser sa pensée est bournée ,
 Incontinent pour plustost l'inciter
 A l'espouser , la va faire citer ;
 D'estre citée elle ne s'est estonnée ,
 Fut à son jour , frisquement attournée ;
 Où leur procès par longtems fut tenu ,
 Dont je ne sçay du tout le contenu ,
 Mais penser fault , faisant telle menée ,
 Que leur matiere a bien esté menée ,
 Croyez aussi que Faifeu ne s'est tins ,
 Qu'il n'ayt souvent de bons propos meintins
 En plaidoiant , on n'en faisoit que rire ,
 Mais tous icy ne les ay peu escripre .
 Or toutesfois ses baddes & quacquetz ,
 Qui plustost vont que ne font nulz tracquetz ;
 N'ont rien servy , car par grant injustice
 L'Official luy a tollu justice ,
 Car à n'avoir sa femme est condampné ,
 Mais il ne veult estre par con dampné ;
 Donc appella à Tours de la sentence ,
 Souvent on voit tromper plus de cent en ce ;
 Bien eust voullu avoir là tout laissé ,
 Car il estoit du procès trop lassé ,
 Mais il vouloit acquitter sa conscience ;
 Et veoir aussi si elle a en con science .
 A son jour fut plaidoyer jusques à Tours ,
 Où il a fait meints voyages & tours ,
 Pourtant qu'il veit sa femme estre trop malle ;
 Aussi qu'elle est de raison anormalle ;
 Bien eust voulu jà l'avoir mise à sac ,
 Pourquoy il mist en escript sur son sac ,
 Sac de procès si que par tout soit sçeu
 Pour le pouvre Maistre Pierre Faifeu ;

Qui de malheur ne peut trouver l'indice ;
 Si ne le quiert par voye de Justice.
 Tant tint à Tours ferme son estappeau ,
 Que il gaigna sa femme par appeau ,
 Et si luy fut sentence prononcée
 En jugement, quelle il n'a renoncée ,
 Mais pour gaudir il dist à plaine voix ,
 Puis qu'il me fault ainsi ma femme avoir ;
 Qui trop me tourne à fascheux prejudice ,
 Je fringueray (or avant) par Justice.
 Lors de son dire il fut fait ung grant rys
 Des assistens , qui n'en furent marrys.
 Son cas gagné au retour se va mettre.
 Nul ne sçauroit ou en prose ou en metre
 Bien rediger (stable ou par chemin)
 En nul papier , tablette , ou parchemin
 Le grant recueil , la grant chere & la feste ,
 Qu'on luy a fait du bas jusques au feste ;
 Car en Angers ses parens & amys
 Le festyer chascun sa peine a mis ;
 A sa femme est soubdain à son instance
 Insinuer son dicton & sentence ,
 Duquel pas n'eut le cueur trop resjouy ,
 Mais toutesfois il a d'elle jouy ,
 Malgré ses dens en souffrera l'estraincte ;
 Non par amour , mais plustost par contraincte ;
 Mais s'il eust sçeu (comme tost sera dit)
 Son mauvais cap , premier se fust desdit.
 Or pour conclure , entre eulx ont divisé
 Plusieurs propos , puis ont jour advisé
 Pour espouser , & les nopces parfaire ,
 Si qu'il n'y eust plus jamais à refaire.

*Comment la conclusion des nopces prinse ;
pour faire cher , & festyer les parens
de sa femme , alla à Paris faire acou-
strer sa veze la sepmaine qu'il devoit
espouser.*

CHAPITRE XLV.



FAIFEU s'en vint pour faire l'ap-
pareil,
Je croy que au monde il n'estoit son
pareil.
Pour faire mieulx recueil à l'espousée,
Une veze eut par trop mal disposée,
Donc la porta sur les pontz racoustrer,
Car de tel cas bien se sçeut acoustrer,
Et bien jouer , aussi de la vielle ,
Se desguysant avecque une bielle.
A l'acoustrer ung se cuydant gaudir
Avecques luy , aussi pour l'esbaudir,
Luy demanda que c'est qu'il faisoit faire ;
Il respondit que là faisoit refaire
Et racoustrer sa veze qui n'est bien
Pour resjouyr tout plain de gens de bien ,
Qui conduyront l'un de ces jours sa femme ,
Bien seroit-il ung nyès & infame
S'il ne leur fait grant chere & passe-temps ,
Tant que de luy s'en aillent tous contens.
Le compagnon luy dist ; en ceste Ville
Ilz ne font rien en ce mestier que vile ,
Mais vous avez pour deux soldz à Paris ,
Qu'ilz surferont cy de moityé de pris.
Rien ne respond Faifeu à son parler ,
Mais tout soubdain son esprit fut par l'aer

Non courroucé , marry , ou remply de yre ;
 A nul vivant son vueil il ne va dire ,
 Mais s'en alla droict en sa mansion ,
 Prent son cheval , dont ay fait mention ;
 Lequel estoit caduc & fort cassé ,
 Car trop l'avoit mené & traquassé ,
 Monta dessus , & picque de la botte ;
 Tant picqué l'a , qu'à peine se sabbotte ,
 Et transporta jusques à la Ferté.
 Mais le mignon , pour faire l'affaicté ,
 Court son cheval tant que de chault il suë ;
 Fort l'a crotté , mais pas il ne l'essuë ,
 Ung cor il a qui est tout fait à poste ,
 Qu'il va sonner courant feignant le poste ;
 Se va loger droict chez Gillet le Prince ,
 Qui (gaudissant) ung chascun picque & pince.
 Alors Faifeu en l'estable posa
 Le sien cheval , qui bien se reposa ,
 Or pour tout vray à son hoste il afferme
 Que de Bretaigne a chevauché bien ferme ;
 Car à midy partit devant ce jour ,
 Qui à croire est qu'il n'avoit fait sejour.
 Quant fut logé son cheval recommande ;
 Et au Varlet qu'il soit pensé commande ,
 Pourtant qu'il dist devoir estre à Paris
 Le lendemain à midy , ou peris
 Sont & perduz meint affaire qu'il dit
 Avoir en Court. Nul n'y fait contredit ,
 Mais fut traicté comme homme de la sorte
 Qu'on le pensoit ; donc ung chascun s'afforte
 Le festyer & luy faire grant feu ,
 Pas ne pensoient que fust Pierre Faifeu.

*Comment en allant à Paris faire acou-
strer sa veze, il logea à la Ferté chez
Gillet le Prince, qu'il trompa avec-
ques son Cheval.*

CHAPITER XLVI.



A PRES soupper fut temps qu'on se
retire ;
Faifeu s'en va en sa chambre & se tire,
Où ne dort, mais quant il fut re-
traict ,
Il s'est levé, feingt aller au retrect,
Alla trouver le Varlet endormy ,
Qui n'estoit pas pour luy fin à demy ,
Car luy robba ses clefs & les emporte ,
Partant peult bien clorre & ouvrir la porte.
Premier ouvrit le grenier à l'aveyne ,
Où son cheval (comme en Poictou) il meine
Et le laissa , puis va la porte ouvrir
De la maison , pour son fait mieulx couvrir ,
Si qu'on pensast que le Varlet fust yvre ,
Remett les clefz , puis soubdain se delivre
Se recouscher , & prendre son repos.
Le lendemain se fust ung hault propos ,
Car quant fut prest de parfaire sa voye ,
Le Varlet eust voulu estre en Sabvoye.
Faifeu feignant n'estre adverty du cas ,
Dit qu'il ay mast mieulx perdre cent ducatz
Que son cheval , donc pour tel desarroy
Incontinent s'en yra plaindre au Roy.
Le Prince dit ; pour ung don charitable ,
Prenez le mien qui est en mon estable ,

Cinquante escuz il vault je vous affy.
 Faifeu ne veult , faignant avoir deffy
 Qu'il ne luy peust servir à son affaire ;
 Disant le sien avoir coustume faire
 Cent lieux par jour comme ung cheval fayé.
 Le Prince fut de ce mot effrayé ;
 Lors luy donna , pour de tel cas se taire ,
 Dix beaulx escuz sans appeller Notaire ,
 Et son cheval , & son escot aussi.
 Faifeu le veult , par tel moyen que si
 De son affaire il ne fait la depesche
 Sera au coust du Prince qui l'empesche.
 Bien l'a voulu ; lors Faifeu a monté
 Sur le cheval , mais comme desmonté
 Il s'estimoit ; or toutesfois il picque
 Bien asprement. Ainsi par sa trafficque
 Heut le cheval , quel gueres ne courut ,
 Et de l'argent qui bien le secourut.
 Quant eut passé la Ferté & laissée ,
 Sa haste il eut bien soudain delaissée ,
 Car tout en paix s'en va jusques à Paris ;
 Et fist au Prince ung tour dont n'a pas rys ;
 De ce bon tour à nully ne se vante ,
 Mais tout soudain son cheval mist en vente ;
 Le propre jour on trouva son cheval
 Monté en hault au grenier non aval.
 Le Prince alors bien congnut qu'on le pippe ,
 Et q'ung trompeur ainsi son cheval grippe.
 On essaya si le cheval alloit
 Comme il disoit , mais gueres ne valloit :
 Le Prince à nul ne conta l'aventure ,
 Qu'on l'a mocqué par si faulce nature ,
 Mais le cheval en l'estable on posa ,
 Où longuement très bien se reposa.
 Faifeu faisoit à Paris bonne chere
 De l'argent q'heut du cheval à l'enchere.

Et acoustrer sa veze il a bien fait,
Ne prenant point la matiere à effect.

Comment il s'en retourna de Paris à Angers, avecques aucuns de sa congnuë, & relogea chez ledit Prince, qu'il trompa de rechef, & ne fut point congnu.

CHAPITRE XLVII.



E temps pendant qu'il parfaisoit sa
queste,
De luy Angers on faisoit grant en-
queste,
Chascun cuydoit qu'il se fust enfouy ;
Car nul ne sçet quel, s'il fut enfouy,
Et enterré, ne par quelle fortune
On l'a perdu, ce pas trop importune
L'esprit d'aucuns, pensans l'avoir perdu,
Meint en estoit fasché & esperdu.
Or advint-il pour nostre cas parfaire,
Qu'aucuns d'Angers à Paris ont à faire,
Quelz d'avanture ont rencontré Faiseu
En leur chemin, si que le cas soit sçeu,
Luy ont enquis qui de present le meinne,
Veu qu'il devoit la prochaine sepmaine
Femme espouser, ainsi qu'on rapportoit,
Et luy ont dit aussi qu'il apportoit,
Et si faisoit grant dueil à ses parens,
Autant qu'on a par monceaux ou par rens.
Si leur respond qu'il y a des jours seize,
Qu'il est venu faire acoustrer sa veze,
Car à Angers aucun n'a sçeu trouver,
Qui l'habiller se voulust esprouver :
Aussi leur dist, pour eviter diffame,

Qu'il en vouloit faire feste à sa femme ;
 Et recevoir ses parens & amys ;
 Voyez dist-il , qui à Paris m'a mis.
 Lors ont conclud de retourner ensemble ,
 Mais tout soudain de la compagnie se emble ,
 Et s'en va droit chez ung Feupier changer
 Tous ses habitz , pour de mieulx s'estranger.
 Comme homme cault , subtil , & bien aprins ,
 Prent ung cheval , qui n'estoit de grant pris
 Que de cent solz , ou au plus de six livres ;
 Pas ne le prent pour le charger de Livres ,
 Mais pour Angers seullement l'apporter.
 Ne fut si foul à ses gens rapporter
 Ce qu'avoit fait de son cheval quant vint ,
 Mais vous orrez comment il en advint.
 Or pour partir chascun se botte & hourse ,
 A demeurer nul d'eulx ne se dispose ,
 Mais tant ont fait , qu'à la Ferté s'en vindrent ,
 Escoutez bien les choses qui advindrent.
 Chez ledit Prince ilz prindrent leur herberge ,
 Qui leur donna de meint poulet & berge ,
 Et les traicta comme homme à ce congnu
 Et n'a Faifeu de nul esté congnu.
 Le lendemain , quant fut temps de partir ,
 Et à chascun leurs chevaulx departir ,
 Faifeu congnut son here emmy l'estable ;
 Semblant n'en fist , mais comme sage & stable ,
 A demandé qui tel here leur donne.
 Incontinent le Prince s'habandonne
 Compter le cas qui luy est advenu ,
 Dont aux presens grant plaisir est venu.
 Le compte fait , Faifeu dist à son hoste ,
 Je te requiers mon bon amy escoutte
 Trocquons nous deux sans faire aucun retour.
 L'hoste le veult. Ainsi par celluy tour
 Faifeu trompa son hoste doublement.

Voyez comment, sans aucun troublement ;
 Il ramena son cheval jusques Angers
 Sans y avoir ne perte ne dangers.
 Quant fut venu jusque en sa congnoissance ;
 Et qu'il congnut le lieu de sa naissance ,
 Plus ne craignit conter le cas qu'heut fait
 A plusieurs gens , dont meint rys en fut fait ;
 On luy enquist de son partir la cause ,
 Mais respondit sans faire longue pause
 A meint amy qui luy ryt, court & baïse ,
 Qu'estoit allé faire acoustrer sa veze.

*Comment , après tous ses tours , il espousa
 sa femme en l'Esglise saint Julien
 à Angers.*

CHAPITRE XLVIII.



POUR parvenir de ses faitz à la fin ;
 Il n'heut cousin , parente , ne affin ,
 Luy retourné , qu'aux nopces ne con-
 vye ; [vye.
 Bien cuyde avoir longuement par con-
 Le jour fut mis , pour mieulx luy don-
 Qu'espouferoit à saint Julien sa femme ; [ner fame,
 Mais cependant chascun jour se desguise ,
 Et s'en alloit de chez luy à l'Esglise
 Avec sa veze , ou bien o sa vielle ,
 Oncques on ne veit pareille kyrielle ,
 Plustost faisoit l'aveugle ou le mancquet ;
 Aux compaignons ainsi fist meint bancquet,
 Pour luy tenir compaignie à ce faire ,
 Tous ses voisins pensans que fust pour faire
 L'espoufement , donc chascun y tournoit ,
 Meint y couroit qui pesneux retournoit.

Mais le jour vint qu'on fist à bon escient ;
 Pierre Faifeu , comme bon & scient ,
 Sa femme print , dont il ne fault pas dire ,
 Que meint le veit qui fort s'en print à rire ,
 Le jour fut gay , frisque , & plaissant , & beau ,
 Meint au bancquet sur chaer ou escabeau
 Fut resjouy de tabours & buffines ;
 Là on a fait meints passe-temps & signes ,
 Plusieurs dances morisques & virlaitz ,
 I furent faitz par Maistres & Varlerz ;
 Les metz qu'on heut racompter par parolle
 On ne sçauroit , ne rediger par rolle ,
 Car l'habundance y fut tant superfluë ,
 Je croy le bien de tout Angers y fluë ,
 Le jour passa , chascun se retira ,
 Mesme Faifeu vers sa femme attyra .

*Comment après avoir esté certain temps
 en mesnage avec sa femme , il mourut
 de merencolye.*

CHAPITRE XLIX.



N peu de temps mesnage le surprint ;
 Bien asprement dessus & dessous
 print ,
 Car tout soubdain par bien frapper
 en coche ,
 Dedens ung an il eut sa femme en couche .
 Or la coustume a la femme souvent
 A son mary faire boyre son vent ,
 Que gaudisseurs sans en faire aultre mise ,
 Nomment & dyent le vent de la chemise ;
 Le povre homme n'en fut pas exempté
 Car de tel vent tost fut bien esventé ,

Voyre & si bien, que jusques à berfer ;
 Il fut contraint sans en rien traverser.
 De ce cas là je ne m'esbahys point ,
 Car ès escriptz on trouve , & en meint poinct ,
 Que les plus grands ayans sçavoir & fame ,
 Se sont trouvez trompez & par la femme.
 Ce nonobstant que vueille maintenir
 Qu'il fust trompé par son mal contenir ,
 Mais on disoit tant en glose qu'en texte ,
 Que elle avoit la plus mauvaise teste
 Qui fust Angers , dont son joly esprit
 Quasi estoit tout perdu & perscript.
 D'avantage eut avecque elle sa mere ,
 Qui à Faifeu faisoit douleur amere ,
 Car ce qu'en bruyt la fille ne faisoit ,
 La mere estoit qui le tout parfaisoit.
 De ses douleurs je n'en dys pas la dysme ;
 Mieulx luy vauisist tumbé estre en abyfme.
 Où il avoit tousjours joyeux esté ,
 Bruyt & tanson ha pour joyeuseté.
 Bref il cuyda ung jour estre le Maistre ;
 Et bien tanfer se voullut entremettre ;
 Mais s'il eust eu trois testes en montseau ;
 Davantage il n'eut eu ung morseau.
 Mais pour monstrier qu'il tenseroit plus hault
 (Qu'ilz ne feroient) il s'encrucha en hault
 Sur ung buffet , ou sur ung dressouer ,
 Mais rien ne sert ung tel adressouer ,
 S'estoit nyent ; pour faire fin de conte ,
 Contrainct estoit s'en en aller de honte.
 Quant eut regné ainsi ung bien longtemps ,
 En telz debatz , riottes , & contemps ,
 Remply de dueil , soucy , merencolye
 (Qui des joyeux souvent cueur & corps lye)
 Luy qui avoit sur tous esté joyeux ,
 Frisque & gaillard , & de tous jeux joueux ,

Pourtant qu'il eut femme à sa vie contraire,
 Dieu le voullut par devers luy retraire,
 Et trespassa de ce siecle en ce point,
 L'heure & le jour pour vray je ne sçay point.

L' A C T E U R.



QUANT j'heu finé coppier ce volume,
 Incontinent mon conducteur ralume
 La lucerne de mon petit esprit,
 Lequel estoit quasi demy perscript.
 Lors m'advise à son Maistre le rendre,

Qui doucement l'a bien voulu reprendre,
 Me merciant de mes peine & labeur,
 Sans en nul point de moy estre gabbeur;
 Mais me pria derechef m'adonner
 Le coppier, & le double en donner
 Au deslusdit Abbé très venerable,
 Remply d'honneur, & bien innumerable;
 Ce que promis faire sans abuser.
 Lors tout soubdain de luy me voys ruser,
 Prenant congé; Bon-cueur tousjours me guyde,
 Hors ce parquet fault soubdain que je vuyde,
 Puis me conduyt par où j'estois venu,
 Dont je ne sçay près que suis devenu,
 Veü que je fortz d'un lieu tant delectable,
 Et suis rentré en ung tant lamentable.
 Or toutesfois pensois sortir tout droit,
 Mais Bon-cueur m'a arresté à l'endroit
 Où gyft Faifeu, soubz une pierre dure,
 Me contraignant, dist qu'il fault que j'endure
 Lyre & goulter l'epitaphe & dicte
 Qui est sur luy. Tout soubdain je medite
 Obtemperer au vueil de tant bon Maistre.
 Incontinent je me voys entremettre
 La regarder selon mon povre esprit,

Puis peine ay mis la mettre par escript ;
 Comme voyez que cy elle est escripte ,
 Sans qu'il y ayt nulle faulte ou redicte ,
 Car en telz motz , comme icy sont posez ;
 J'ay toust escript pour m'aller reposer.

*Epitaphe de Maistre Pierre Faifeu, trou-
 vée au Cymitiere où gysent les corps ,
 dont les Espritz sont aux champs Eli-
 sées.*



P R E S avoir regné soubz la tutelle ;
 Gouvernement , regime & curatelle
 Des Elemens , Dieux , Planettes , &
 signes ,
 Pierre Faifeu des gaudisseurs insignes ,
 Le parangond & le superlatif ,
 D'Angers nourry , engendré & natif ,
 Par de Atropos le dart merencolicque ,
 Feru on l'a d'un coup trop collicricque ,
 Sans y penser , comme on fait chascun jour ;
 Dont est contrainct faire icy son sejour .
 Soubz le fardeau de ceste dure pierre ,
 Voyez gesir le plaissant Maistre Pierre ,
 Qui en ses faitz par tout passa Villon ,
 Et Pathelin. Pourtant à reveillon
 Tout bon compaing' *De profundis* luy donne ;
 Priant à Dieu que ses maulx luy pardonne.

L' A C T E U R

J'EU bientost fait , car pas n'a grant longueur ;
 Bon-cueur m'ouvrit sans me mettre en langueur ,
 Et me conduyt jusque dehors la porte .
 Avecques moy mon escripture emporte ;

Si ne l'eusse eu mon frain eusse rongé ;
 Pensant avoir ce qu'est dessus songé.
 Quant fus chez moy je me mis à repos
 De mon labeur , mais sans changer propos ;
 Le lendemain en coppie le redige ,
 Pour vous donner , mon très cher Seigneur lige ;
 Comme Faifeu m'a dit & commandé ,
 Vous suppliant que soys recommandé
 Vers la haulteur , grandeur & inagnitude
 De vostre estat , auquel mes mon estude
 A mon pouvoir obtemperer & faire.
 Si je le fais c'est ce que je doibs faire ;
 Car si pouvois en cent me transformer ,
 Et Dieu du Ciel m'eust voulu imformer
 De tous sçavoirs que jamais sçeut Pallas ,
 En mon vivant estre ne doibs pas las
 Vous honorer , & tousjours vous servir ;
 A voz biensfaitz ne sçauois deservir ,
 Car vous m'avez si bien entretenu ,
 Que fort à vous me treuve estre tenu.
 On me devoit de grant ingratitude
 Redarguer , si vostre gratitude
 A mon pouvoir j'estois desbilité
 Le reconnoistre à possibilité.
 Pourtant , Monsieur , ce petit cas vous donne ;
 Vous suppliant qu'aulx fautes on pardonne ;
 Ne ayant esgard à mon rude stille ,
 Car mieulx fluant de moy il ne distille ;
 Mais je congnois tant vostre noble cueur ;
 Qu'il ne voudroit de moy estre mocqueur ;
 Mais bien prendra la peine corriger
 Tous les defaulx qui y sont erigez ;
 Si son plaisir à ce faire veult mettre ,
 En ce sçavoir je ne sçay meilleur Maistre.
 De peur d'ennuy , à l'Espittre faitz fin ,
 Priant mon Dieu qu'il vous doint à la fin ;
 H

Très cher Seigneur , les grans joyes perdurables
 Qu'ont les heureux , qui tousjours sont durables ;
 Et vous vivant louer Dieu , en paix vivre ,
 Hors de soucy , de tout ennuy delivre.
 Par vostre serf (dont n'estes engigné)
 Très obeyffant Charles de Bordigné.

*Envoy en maniere de Ballade du Compil-
 lateur aux Lecteurs.*



RENGEZ vous tous à milliers & à tas,
 Gentilz enfans aux espritz angeli-
 ques ,
 Desduysez vous en chambres, gallatas,
 Parez de soye , ou laine , ou taffetas,
 Lyre & goufter les loix Evangeliques.
 Après , de peur estre merencoliques ,
 Esbattez vous auprès de vostre feu,
 A regarder les faitz Pierre Faifeu.

Si faulte y a de raison ou compas ;
 Je vous supply' n'en foyez colleriques ,
 Mais corrigez , car je ne l'entends pas ;
 A besongner voys plustost que le pas,
 Parquoy ne peult qu'il n'y ayt des repliques ;
 Pour les deffaulx qui sont plus que dupliques ,
 Or toutesfois passez temps peu à peu ,
 A regarder les faitz Pierre Faifeu.


Ce qu'il y a n'est q'ung trop petit cas ,
 Pour en par er, entre les Rhetoriques ,
 Entre sçavans , Procureurs , Advocat ,
 Et gens lettrez , tost serois mis accatz
 De me vanter devant les Theoricques ,
 Et gens parfaitz en carmes heroïques ;


Donc je m'en tays ; mais ay fait mieulx qu'ay sçeu
A regarder les faitz Pierre Faifeu.

E N V O Y.

Prins ce, & bien veu voz vouloirs tous uniques,
M'excuseront sans en rien m'eltre iniques,
Vous suppliant que chascun face veu
A regarder les fais Pierre faifeu.

*Fin des faitz & dictz joyeux de Mai-
stre Pierre Faifeu mis & redigez, par
Messire Charles Bordigné Prebstre, le
premier jour de Mars l'an 1531 sur l'im-
primé à Angers l'an 1532.*





POESIES DIVERSES

DE


J E H A N

M O L I N E T

C H A N O I N E

D E V A L E N C I E N N E S.

Extraites de ses faiçts & dictz.



LE SIEGE D'AMOURS.

L'ACTEUR.



N ung verd bois, deffoubz une ramée
Je veiz Amours tenir sa Court Royale,
Et ung Amant preparant son armée,
Pour l'assieger en sa Cité fermée,
A juste cause evidente & loyalle;

La Guerre fut pour une especialle
Dame d'honneur garnie de refeuz:
Petis charbons allument les grans feuz.

A l'arme gentilz amoureux,
A l'arme, saulvez corps & biens,
Refus le vasal rigoureux
Fait affuster ses gros engiens,
Pour tumber l'espoir que je tiens
En ses tenebres esconfes,
Je seray par ses lours maintiens,
Revide de dures responses.

Doux-regard le bon sagittaire
A pris aultre part sa visée,
Et Doulx-parler son Secretaire
Me sert d'une estrange risée;
Ardant desir de sa fusée
Ne veult embrasser Bel-accueil,
Toute joye m'est refusée,

H iij

Je n'ay d'ame quelque racueil

Secours, secours leaulx Amans,
 Secours à mes douleurs oultrées,
 Laissez François & Allemans
 Detruire pais & contrées;
 Venez deffendre les entrées
 De noz envieux ennemys,
 Il ont jà leurs cornes monstrées
 Pour resveiller les endormys.

Venez Amoureux champions,
 Venez servir à mes souldées,
 Laissez Rocz & meschans Pions,
 Tours & bombardes eschaudées;
 Mes amours toutes desfrauldées,
 Ne pendent qu'à ung fil de foye,
 Mes fortresses sont bersauldées
 Du traict où il fault que je soie.

Amour, qui est tout plein d'amer,
 D'amer m'aprist les joyeux tours,
 Tours plaisantes à regarder
 Garder me fist ès basses cours,
 Secours donnoit à mes doulours;
 Lourds sont ceulx qui tient en ses las,
 Las suys de porter ses atours,
 A Tours n'à Gand n'ay nul soulas.

Amour me fist son Bachelier,
 Et me donna joyeux espoir,
 Gracieuſeté, bien celler,
 Courtoisie, force, povoir,
 Loyaulté, sens, santé, avoir;
 Lyesse & ceulx de sa banniere,
 Pour amoureuse Dame avoir,
 Gente de corps & de maniere.

Ung chascun bien s'y employa ;
 Pitié luy brisa sa rigueur ,
 Humilité s'y desploya ,
 Avoir luy fist large d'honneur ;
 Beau-parler luy oindit le cueur ,
 Et tant luy souffla en l'oreille ,
 Que je conquis Dame d'honneur :
 Je ne veiz oncques la pareille.

Se tous les prez & champs du monde
 Estoient peaulx de parchemyn ,
 Et toute eaue puraine & munde
 Devenoit encre par chemin ;
 On ne sçauroit venir à fin
 D'escripture , en louant l'adresse
 De l'honneur d'elle , tant est fin ,
 De tout bien pleine est ma Maitresse.

C'est ung chef-d'œuvre de beaulté ,
 Ung triumphe de noble arroy ,
 Sa prudence & sa loyaulté
 Vallent l'avoir d'ung petit Roy ;
 Ravy suys quant je l'aperçoy :
 Tout œil amoureux qui l'advise
 Rit de joye , chante à parsoy ,
 J'ay pris Amours à ma devise.

Son œil comme ung fier basilicque
 Occist mon cueur de son regard ,
 Sa très douce face angelicque ,
 Et son corps , passent tout esgard ;
 Qui bruyt desloubz son estandart ;
 Il est à la bonne heure né ,
 Et est , soit Duc , Conte , ou Souldart ;
 Le seruyteur hault guerdonné ,

Amours à sa benivolence ;
 Pour confort & resjouissance ;
 M'ottroya haultz dons d'excellence ;
 Et me donna la jouyffance
 De la plus mignonne de France ,
 Celle qui très belle forme a ,
 La plus joyeuse & la plus franche
 Que Dieu à son semblant forma.

Je suis servy d'ung franc baïser
 Le plus gratieux de jamais ,
 D'ung très beau ris pour moy aïser ;
 De pensées , & d'aultres metz ,
 Par honneur , sans mal penser ; mais
 Danger me traverse & defroisse ,
 On me sert du pis desormais ,
 Ensemble de poires d'angoisse.

La très noble fleur de pensée
 M'est muée en une soucie ,
 Larmes d'œil & plate risée
 Ont toute ma joye abaïllée ;
 Une perte amere encollie
 Me rend des douleurs plus de sept ;
 Je meurdris ma melencollie
 Souvent à par moy , Dieu le sçayt.

Amours hée ! que te ay-je mesfait ;
 Qui me montres ta brune face ?
 Prendras-tu pitié de mon fait ?
 Quelle chose veulz-tu que je face ?
 Convient-il que je me desface
 De ma Dame de noble affaire ,
 Ou que nostre amour se reface ?
 Je ne sçay moy que je doy faire.

Amours , Amours , que ay-je mespris
 Contre ton saint commandement ,
 Que tu m'as les haultz biens repris ,
 Dont j'ay jouy paisiblement ?
 Diz-moy pourquoy , quant , ne comment
 J'ay peché devant ton ymage ?
 Se j'ay faulcé foy ou serment ,
 Je vueil reparer le dommage.

Ou tu faiz le sourd de l'oreille ;
 Ou la parole t'est faillie ;
 Ou ton œil repose ou sommeille ,
 Ou tu n'as ne sens ne follie ;
 Ou ta puissance est abollie ,
 Ou tu n'as ne corps ne couraige ,
 Ou tu n'es rien que une vessie
 Pleine de pois , & vent d'oraige.

Se tu n'as voix , si monstre signe
 De la volenté que tu sens ,
 Respons par chantz ou par buffine ;
 Par Advocatz , ou par Regentz ;
 S'à mon vouloir ne te consens ,
 Je te deffie & te renoye ,
 Tu n'es que ung decepveur de gens ;
 Et ung pas où chascun se noye.

A Dieu , au Ciel , & à Nature ;
 A toute chose elementaire ,
 De ton faict qui se desnature ,
 Je me plains très fort sans me taire ;
 En mon propre lieu solitaire
 Je fay ma lamentation ,
 Comme ung Prophete solitaire ,
 Qui jadis lamenta Syon.

DIEU qui congnois les pensées
 Ains qu'elles soient pensées,
 Parfaites ne devisées
 Ne visées
 Regarde ma dolleance,
 Donne moy fresches rosées,
 Chauldes gouttes embrasées,
 Pour faire plaintes rusées,
 Sans risées,
 Sans joye, & sans recreance.

Noble aier prens la congnoissance
 De ma dure desplaissance,
 Faiz en mer espuissance
 Par puissance
 De pluies de larmes pleines,
 Amour m'a faiët decepvance,
 Se tu as quelque chevance
 De souspirs pleins de grevance,
 Si l'avance
 Pour gemir enmy les plaines.

Terres basses & haultaines,
 Qui portez flotz & fontaines,
 Mers & abismes loingtaines
 Incertaines,
 Gouffres cruelz, vens sauvages,
 Soufflez moy de voz allaines
 Es gueulles de voz balaines,
 Ou les voix de voz Seraines
 Trop seraines
 M'endorment en voz rivages.

Hideux criz, piteux langaiges,
 Venez servir à mes gaiges

Prenez en voz maresquages
 Les bagaiges ,
 Et les atours de tristesse ,
 Pour vestir les personages ;
 Et faire pellerinages ,
 Ou sonnages
 De mort en nostre fortresse.

O ! ma très chere Maistresse ;
 Mon espoir , ma seule adresse ,
 Voyez l'ennuy qui m'opresse ,
 Et agreffe
 En vostre amoureux service ;
 Je meurs jeune & sans vielleffe ;
 Amour m'affault & me blesse ,
 Vostre œil plus ne me releffe , ;
 Mon fait leffe
 Aller comme l'escrevice.

O Mort ! très rabice bice ;
 Tu n'es pas genice nice ,
 Mais de dueil nourrice rice
 Genitrice ,
 De toute dolente lente ,
 Lente au povre & preste au rice ;
 Malle lice par malice ,
 Lice moy dedens ta lice ,
 Lance & glice
 Mon corps en mortelle tente ;

Soyez moy regente gente ,
 Mon mieulx , ma presente sente ;
 Ma plus apparente rente ,
 Souffle & vente
 Mon ame en celette garde ;
 Sans nul soulas je lamente ,

Tout mon esbat est tourmenté ;
 Il n'est ne mire , ne mente
 Vehemente ,
 Pour qui ma douleur retarde.

Mort se tu as darde , darde
 Arcq turquoys, canon, bombarde,
 Ou quelque taillarde larde ,
 Et escarde
 Mon cueur de ta dure perche ;
 O ! très plaisante laifarde,
 Viens avant musant musarde ,
 Pepelotant papelarde ,
 Je ne garde
 Fors que ton dard me tresperche.

E S P O I R.

QUE vous fault-il nostre Escuyer,
 Qui faictes ce clam douloureux ?
 Pensez de vous defennuyer ,
 Sans vous en ce point engluer
 En triste regret malheureux :
 Espoir suys qui les Amoureux
 Reconforte , grans & petitz.

L' A M A N T.

Esperance paist les chetifz ;
 Asez promet , & peu contente ;
 Les grans & haultains appetitz
 N'ont cure de ses apatitz ,
 Ne de loger à son attente :
 C'est eue benoiste patente
 A gens de Court dont on les paye.

E S P O I R.

Point' n'est glouft qui de tout n'effaye ;
 Entendz à mes dictz fomptueux ,
 Tu dis qu'Amour te bat & flaye ,
 Et qu'il te fait fi grefve playe ,
 Que tu pers tous biens fructueux :
 Amour est juſte & vertueux ,
 Et d'honneur le riche trésor.

L' A M A N T.

Tout ce qui reluyſt n'est pas or :
 Amour qui me priſt par le poing ,
 Me fiſt auſſy bruyant que ung tor ,
 Et me pourveut , mieulx que Hector ,
 De Dame , où je pris loyal ſoing ;
 Mais il m'a failly au beſoing ,
 Envers moy s'est très mal prouvez.

E S P O I R.

Pour ung perdu deux recouvrez :
 Se tu as ung ſeul bien perdu ,
 Cent en auras mieulx approuvez ,
 Plus gros , plus gras , & plus ouvez ,
 Il n'en fault pas eſtre eſperdu ;
 Car Amour a ſon arc tendu
 Pour conquerir ſes proyes haultes.

L' A M A N T.

Clabault abaye bien aux faultes :
 De chiens , d'oifeaulx , d'armes , d'Amours ;
 De behours , de jouſtes , de vaultes
 Fault-il payer les malletaultes ?
 Pour ung plaisir milles doulours ,

Après deschans viennent les plours ;
Et risée du bout du dent.

E S P O I R.

Tost pleure à qui la lippe tend :
Cuides-tu avoir les grans dons
D'Amour le noble Président,
Sans decliner par accident ?
Après gras jours viennent brandons ;
N'est digne d'avoir doulx guerdons,
Qui de l'amer ne taste & gouste.

L' A M A N T.

Tel a beaulx yeulx qui n'y voit goutte :
Je cuidois estre son mygnon,
Mais il me regette & deboutte,
Et me ruë plus bas qu'en soute,
Ce n'est pas jeu de compaignon ;
S'il a Chastel, Tour, ou Pignon,
Je y feray des assaultz hidetix.

E S P O I R.

Le dire & le faire sont deux :
Amour loge en haulte pourprise,
Tous gorgias & gens pompeux
Sont ses alliez ; se ne peulz
Dessus luy faire quelque emprise :
Qui greve cil qui chascun prise,
Il prent à tous guerre nuyfible.

L' A M A N T.

A cueur vaillant rien impossible :
Jamais n'auray beu ne mangé

De

De quelque substance sensible ;
 Se feray par assault terrible ,
 De mon tort fait contre vengé ;
 Il sera si contre siegé ,
 Qu'il ne se sçaura où frotter :
 Besoing fait la vieille trotter.

A l'assault noble souldars ,
 Desployez voz estandars ,
 Brisez lances , lancez dars ,
 Ruez engins , tirez d'arcs ,
 Vuidez de voz pavillons ,
 Rompez murs de toutes pars ,
 Le feu soit par tout espars ;
 Rembarrez dedans ses parcz
 Amours & tous ses poupars ,
 Mettez les en gresillons ;
 Gros courtaux & lambillons
 Abattez leurs bastillons ,
 Faictes fagotz bosquillons ,
 Dressez hecqz , & equaillons :
 Picquars , Anglois , & Lombars :
 Laissez France à voz tallons ,
 Et d'Allemans les tas longz ,
 Il sont mors si nous voulons ,
 Montons , courons , & volons ,
 Comme griffons & lieppars.

Ordonnez noz avant gardes ,
 Sellez chevaulx , mettez bardes ,
 Tirez canons & bombardes ,
 Bregiers , soufflars , & soufflards ,
 Veuglaires , & serpentines ,
 Employez Archers & Gardes ,
 Mortiers cas , gruës taillardes ,
 Crennequins , coustilles , dardes ,

Arbalestres très gaillardes ;
 Badelaires , barbarines ,
 Guifarmes luyfans que glaces ;
 Briquolles , fundes , machines ,
 Dollequins agus que picques ,
 Mantellines , gaillardines ,
 Bringandines , cappellines ,
 Cuyraces , hasches , & masses.

R E N D Z toy Amours , vivres te sont faillis ;
 Fort affoiblis sont tes faulbourgz & fors ,
 Tu pers portaulx , portes , palays , palis ,
 Passus polis , pons , passaiges , pourpris ,
 Prouesse , pris , posternes , puys , & portz ,
 Tu vaulx que mors , pou valent tes efforts ;
 Tu n'as confors de Prince ne de Conte ;
 Soit tempre ou tard il convient rendre compte.

Rendz toy Amours , jamais mieulx tu n'auras ;
 Bref tu mourras en ta Cité fermée ,
 Ou noble Dame en ton clos trouveras ,
 Par qui seras deslié , comme Arras
 Fut au pourchas d'une Duchesse amée ;
 Quiers en l'armée Argine renommée ,
 Panthasilée , ou quelque haulte Dame :
 On coppe ung bras pour saulver corps & ame.

Rendz toy Amours , ou livre moy bataille
 D'estoc de taille , ou pris seras au piege ,
 Les Dames sont en ta fortreffe & baille ;
 Viens & me baille ung hault bruyt qui m'affaille ;
 Par qui je faille accoup hors de mon siege ;
 Lors Fricque & Liege & moy & mon college
 Plus loing qu'en Liege irons ailleurs repaistre ;
 Il n'est si fort qui ne trouve son maistre.

A M O U R S.

SECouREZ moy Damoyſelles ;
 En ce malheureux danger ,
 Secourez moy Damoyſelles ,
 Nobles Dames , & pucelles
 Triumphans à mon verger ;
 Deſcendez de mes tourelles ;
 Gracieuſes paſtoureſſes ,
 Pour mes greſz maux alleger ;
 Vueillez l'Amant deſſieger
 Qui me fait guerres mortelles ,
 Et ſi bonne paix forger ,
 Qu'il ait fin de ſes querelles
 En ce malheureux danger.

En ce malheureux danger
 Secourez moy Damoyſelles ;
 En ce malheureux danger
 Choyſiſez ſans plus ſonger
 D'entre vous la fleur des belles ;
 Pour rembarer ceſt Oger ,
 Qui fait batailles renger ,
 Et deſtruiſt tous noz ſequelles ;
 Trouvez façons , Dieu ſçayt quelles ;
 De le faire deſloger :
 Nobles Dames mettez ſelles ,
 A cheval pour moy venger ,
 Secourez moy Damoiſelles.

L' A C T E U R.

AINSY Amours aſſis en baſſe lame ;
 Employa l'ame & du cueur le vouloir ,
 Et fiſt command' à tout Prince & Vidame

De trouver femme ou quelque noble Dame
 De noble fame & d'excellent valloir,
 Qui son ſçavoir deſploiaſt & avoir,
 Pour paix avoir au hardy champion;
 La Dame prent ſouvent Roc ou Pion.

Or eſt la Dame à trouver difficile,
 Son domicile eſt hors de congnoyſſance;
 Vrays amoureux tenez voſtre concille,
 Faiſtes vigille, & liſez evangille
 De toute agile amoureuseuiſſance,
 Tant que plaifance ait l'Amant ſans nuifance,
 Et alegeance à ſes dures clamours:
 A tant finit le hault ſiege d'Amours.

L' A. B. C.

Sauvaige.



EPUIS que Pan eut mys buffines ſus,
 Cires confus ſaudées, & bien loyez,
 Et que les champs qui ſont fort près
 tonduſ,
 Furent tendus de vert, & que Phebus
 Les fiſt barbus de ſynople armoyez;
 Trop ennuyez en larmes d'œil noyez
 Et deſvoyez ſont les bergers des champs;
 En temps de paix ne ſervent nulz deſchantz.

Les belles flourettes
 Aux paſtoureaulx nettes,
 Avec les proprettes,
 Fœilles de caurettes,
 S'en vollent au vent;
 Pommes & poirettes,
 Jadis fort tendrettes,

Nous sont trop durettes ,
Amours amourettes
Larmoyent souvent.

On ne voit Nymphé ou n'oit quelque Nymphée,
Tant soit huppée en verd yver ne flourade ,
Muse n'y a qui ne soit achoppée ,
Ou escloppée , ou surprise , ou happée ,
Clio frappée ou boutée en touradde ;
N'est Oreade au siecle , ne Driade ,
N'Amadriade en forest ne champaigne :
Qui trop povre est, ame ne l'accompagne.

Roseaulx, & rosettes ,
Noiellers, & noifettes ,
Dansereaulx, dansettes ,
Musars , & musettes
Furent en grant bruyt ;
Mais noz brebisettes
Seuffrent grant disettes ,
Buiffons , & branchettes ,
Ranceaulx & roncettes
N'ont fueille ne fruit.

A quoy tient-il , ô gentilz pastoureaulx ,
Que nos thoreaulx , & aigneletz petis ,
Et les moutons dont avons les troppeaulx ,
N'ont que les peaulx , & vont soubz les obbeaulx
Plaisans & beaulx , perdant leurs appetis ?
En noz patis voit-on grans abatis ,
Par vens subtilz qui les ont mys au bas ;
Menus aigneaulx accroissent hault & bas.

O ! bergeronnettes ,
Qui des sept planettes ,
Cleres que lunettes ,
Congnoissez les cours ;

Sonnez voz sonnettes
 En voz maisonnettes,
 Dont les voix sont nettes ;
 Donnez nous secours.

Le cours du Ciel, les estoilles errans,
 Sont comme errans hors de terme & de voye ;
 Car Juppiter, dont les Roys sont puissans,
 Par l'acir plaisans regardz resplendiffans,
 Fors nourrissans que Phebus luy envoie ;
 Tout se desvoye, hellas ! faut il qu'on voye
 Par toute voye eclips en si hault throsne !
 Rien n'est bien faict sy Dieu ne le patrone.

Luna, Saturnus,
 Mercure, Venus,
 Et Mars, sont tenus
 Pour les biens venus ;
 Mais quoy Juppiter
 Ung grant dus
 Entre gens menus
 Est comme tout nudz ;
 Et n'a regardz nulz
 De son bon *pater*.

Terrible aurige, exorbitant Pheton,
 Fier charton qui tient train retrograde,
 Charier veulx come on chante en bas ton
 Soubz ton baston le Soleil, & dit-on
 Que ton guidon le destourne & degrade,
 Se plus estrade outre bort, ta virade
 Yra tout radde à l'hostel Proserpine ;
 Couvoytise petit mont arrapine.

Pheton que fais-tu ?
 Ung petit festu

Ne vault ta vertu ,
 Se tu es vestu
 De malice faulce ,
 Se d'ung pié pointu
 Es comme ung testu ,
 Batu abatu ,
 Et bien combatu ,
 S'en fera la faulce.

Se Vulcanus tourne où Boreas corne ,
 Qui desavoye arbres & tourne jus ,
 Il n'y aura thoreau, ne capricorne ,
 Lyon, licorne, ourse, ny beste à corne ;
 Qu'il ne descorne, & ne soit porté jus ;
 Se Vulcanus braffe un tas de menus
 Fouldres cornus, grant tempestes adviendra :
 Il n'a pas pleu tout ce qu'il plouvera.

Coruscations ,
 Exaltations ,
 Insufflations ,
 Constellations
 Telles comme on voit ;
 Feront fractions ,
 Et oppressions ,
 Par impressions ,
 Sur noz nations ,
 Se Dieu n'y pourvoist.

O ! Juppiter, & Juno seur benigne
 Lieu avez digne en place Francigene ,
 Se Dieu permet que Phebus l'enlumine ,
 Qu'elle germine en triumphe & domine ,
 Mars & famine en auront plate gesne ;
 Cerès ahanne, Atropos est sans resne ,
 Mais Bacus regne en plenitude monde :

Il n'y a qu'eur & malheur en ce monde.

Francz baisers jollis ,
 Puis ung peu faillis ,
 Dedans noz pallis ,
 Sont fort appallis
 Par forte bruynes ;
 Mais la fleur de lis
 Aux flourons delis
 Bien parez de lis ,
 Croissant en dellis
 Sans quelque ruyne.

A quoy tient-il dont viennent ses rumeurs ;
 Vapeurs , clameurs , cris , & gemissemens ?
 Helas ! il tient aux terribles humeurs ,
 Verdz & non meurs de mauvais escumeurs ;
 Et allumeurs de guerre & de tourmens ;
 Les tourblemens & crueux croblemens
 Des elemens en son d'orage pleins :
 Il n'est danger que de mauvais villains.

Les obscures nuës
 En sont survenuës ,
 On voyt des cornuës
 Testes toutes nuës ,
 Qui sont toutes noires ;
 Tempestes menuës
 En sont soubstenuës ,
 Dont sont maintenuës
 Et entretenuës
 Fouldres & tonnoirres.

Tant est Titan de broullas abroullé ,
 Et en toullé , que Juppiter son filz
 Estre ne peult en ses bras recouellé ,

Ne conseillé, n'abillé, ne veillé ;
Ne resveillé, n'en fachiez neuces filz ;
Cueurs desconfiz en sont en dueil confitz ;
Non asouffis de regretz & de pleurs :
Aux bonnes gens surviennent les douleurs.

Le noble Orphenim ,
 Très doux , très bening ,
 Sans fiel, sans venin ,
 Et non feminin ,
 A perdu la Lune ;
 Qui son regard fin ,
 Comme à son affin ,
 Luy monstroit , affin
 Qui luy fist en fin
 De ses beaultés l'une.

Pere de vie , imperant Patriarche ,
 Clef de Monarche , O ! Soleil de Justice ;
 Tu es venu , ainsi qu'on se desmarche ,
 En nostre marche enluminer nostre arche ;
 N'est Dannemarche aisselle plus faitisse ,
 Quoy qu'on lotisse , au pais fut propice
 Ton benefice & puissant luminaire :
 Qui descongnoist il n'est point debonnaire.

Horribles tempestes
 Cheurent sur les testes
 De gens & de bestes ,
 Fouldres & molestes ;
 Mais ton noble ray
 Rebouta les gestes
 Des vens manifestes ,
 Qui firent ces festes ;
 J'en suis vray prophetes ;
 Il n'est rien plus vray.

Et quant tu es come invaincu vainqueur ;
 Par ta vigeur nestoye cest oraige ,
 Renforce vie , & redouble challeur ,
 Vertu , couleur , & reduitz en valleur
 Fruict , fœille , & fleur , bourg , bourgades , & ter-
 Hideux ouvraige , horrible rouge rage [rage ;
 A mis umbraige entre l'œil & la glace :
 Toit se fait paix où le discord s'efface.

Amour paternelle ,
 Est tant solennelle ,
 Vertu supernelle ,
 Juste & naturelle ,
 Qui que le depointe
 Ou desnaturelle ,
 Par quelque cautelle ,
 Qui soit telle ou quelle ;
 De glaive mortelle
 Doibt sentir la pointe.

Feu fatuel , estincelles ardans ;
 Dragons mordans , maint enflamé buisson ;
 Lances de feu cruelles & poindans ,
 Chevres faultans , & estoilles vollans ,
 Estincellans chandelles à foison ,
 Ont pris maison dessus nostre horison ;
 Trouvons façon d'eschapper de leurs mains :
 Qui bien toit meurt , on dit qu'il languist moins.

Se Dieu qui prospere
 En gloire prospere ,
 En paix qu'on espere
 N'esclarcist l'espere
 Et le diaphane
 De nostre hemispere ,

Plein de vitupere ,
 Le monde est sans pere ;
 Et se desespere ,
 Comme ung fol profane.

Ung puissant vent François nommé Notus ;
 Plein de vertus , assez hault & subtil ,
 Filz d'Eollus , des parens de Venus ,
 Nous est venus pour mettre noz argus
 Fiers & agus en noble arroy gentil ;
 Mais n'est oustil qui puist fondre grefil
 Mettre à excil , ilz sont fort engelez :
 A cler Soleil fond la neige à tous lez.

Dieu le nous amaine
 De France , ou du Maine ;
 En nostre demaine
 Qui luy est humaine
 Affin qu'il s'employe
 De bouche ou d'allaine ;
 Forte que ballaine ,
 A loger à pleine
 Paix en nostre plaine ;
 Mais nul ne se y ploye.

Trois bons bergers portans une aureine
 A leur poiçtrine ung mouton de Calcos ,
 Sont assemblez en frontiere Flandrine ,
 Pour fouldre aerine execrable bruine
 Mettre à ruine à peu de noise & cops ;
 Mais sans picquos agus ou bec de cocqz ,
 Ou vuide cocqz ne peult on noise abbatre :
 Qui quiert huttin , il trouve à qui combatre.

Se le grant berger ,
 Hardy comme Oger ,

Qui fouloit loger
 Au noble verger
 Et parc de Bourgoigne,
 Povoit par songer,
 Revivre ou menger,
 De ce grant danger,
 Nous vouldroyt venger,
 Qui qu'en mordre ou groigne.

Les nobles signes au Zodiac fchez ;
 Sont trebuechez au profond Caribdis,
 Quant nobles corps celestes tant prisez
 Sont debrisez de tempeste atouchez,
 Et dechassez par tourbillons mauldis ;
 Puis des ans dix les preux & les hardis,
 Sont assourdis de tempeste & d'orage :
 Dieu qui tout sçayt juge le bon courage.

Se le pol Articque,
 Juste non oblique,
 Qui du magnifique
 Celeste fabricque
 Tenoit bride & resne ;
 Par ung basilicque
 Regard draconicque,
 Fel & tirannicque,
 A perdu afficque
 Rose, robe, & regne.

Se Neptunus Dieu de la Mer profonde,
 Par feu profonde, par unde, ou sagittaire
 Vouloit purger ce grant broullis immonde,
 Du meschant monde, & employer faconde,
 L'œuvre fecunde en seroit salutaire,
 Par trop luy taire, ou estre solitaire,
 Il est notaire on pert bien bruyt & brout :

Qui trop s'abaïsse , on dit que Dieu l'acroult.

Se les douze signes ,
Nobles & insignes ,
Qui font les racines
Des grosses buffines ,
Soufflans par ces aeirs ,
Accroissent vermynes ,
Hommes , & germines ,
Et vaches marines ,
Parins & marines
Seront tous defers.

Vecy Juillet ung mois imperial ,
Fort cordial , que le Roy d'Illyon
Doibt obtenir , comme Juge loyal ,
Siege Royal par droit original ,
Et tribunal au throsne du Lyon ;
Rebellion & folle opinion ,
Ont l'union rompu des personaiges :
A povres gens y a peu de langaiges.

Se Apollo noz cris
N'oyt & noz escrips ,
Monstrant aternis
Ses luyfans radis
Perpendiculaires ;
Femmes & maris ,
Auront cueurs marris ,
Car en grans perilz
Sont d'estre periz
Cieulx orbiculaires.

Pasteurs sacrez , saiges & bien rassis ,
De Cambresis , de Lannoy , & du Mans ,
Qui congnoissez Ciel & Dieux hault assis ,

Climatz cinq fix lasure throsne apis ;
 Hallo rassis cruelz feux allumans ,
 En voz commans du tout je me commans ;
 Les vrays amans de la chose publicque :
 Bref oraison penetre œil angelicque.

Ains que dure verge
 De mort nous herberge ;
 Presentons ung cierge
 A la mere Vierge
 Qui la sus prospere ;
 Affin que de charge
 Elle nous descharge ,
 Sans plus de rencharge ;
 Et soit la concierge
 Du filz & du pere.

Pastours portans croce en lieu de houlette ;
 Gand pour moufflette , ont cuidé entamer
 Horribles vens d'une pluye doulcette ,
 Qui point ne haicte à bise n'à comette ,
 Se fault qu'on mette avant gens pleins d'amer ,
 Bergers de fer dignes de triumpber ,
 Par bien griffer ont fait bonne paix naistre ;
 On dit qu'il n'est ouvrage que de Maistre.

Chascun d'eulx s'avance
 De sens , de sçavance ,
 De corps , de chevance ,
 Pour sans decepvance
 Mettre en train prospere
 Et obeissance
 Vens faisans nuyfance ,
 Et grant desplaisance
 Contre la puissance
 Du filz & du pere.

Soubz le manteau de religion faincte ;
 De Mars enchaincte en habit de Nonnette ;
 Le cler Soleil , en qui l'ymage faincte
 De Dieu est paincte exquisite , & fort bien taincte ;
 Print son attaincte en terre monde & nette ,
 Contre planette y fist sa maisonnette ,
 Plaisant , honneste , & juste que horologe ;
 Cil riens ne pert qui ung bon oste loge.

Là font les regardz ,
 Ses gens , ses esgardz ,
 Ses vergers , ses gardz ,
 Et ses gentilz gars
 Fort bien regardez ;
 Pas ne font souldars
 Foullez ne saulx d'arcz ,
 Sans fleches ne sans dars ,
 Soubz leurs estandars
 Sont gens bien gardez.

Par vent subtil secretement conduit ,
 Prenant deduit de broullas mettre arriere ;
 Le cler Soleil , qui aux chuettes nuyt ,
 Entra de nuyt en fort qui nous duynt ,
 Si le reduit sans rompre huys ne verriere ;
 Sur la frontiere ont fait une duyere ,
 Pont , & barriere , ung tas de fors Lyons :
 Par trop cuider viennent rebellions.

Blans lyons ficheaulx ,
 Ours & fins oyseaulx ,
 Vuident par monceaulx ,
 Sur les lyonceaux
 Vestuz de sinoples ,
 Qui comme pourceaulx ;

Furent fiers ponceaulx ,
 Servis d'espinceaulx ,
 Perdans penonceaulx ,
 Et bannieres nobles.

Une comette à la longue queuë ardant ,
 Retrogradant , ainsi qu'on se desvoye ,
 Par influence aucuns signes tardant ,
 Vint regardant Juppiter , luy cuidant
 Ung gros fendant donner emmy la voye ;
 Mais Dieu envoie un ray qui le convoie ,
 Et le renvoie en son estre & couvent :
 Petite pluye abbat un très gros vent.

Le corps qui discorde
 Cè que bonté corde ,
 Et ne se recorde
 De paix de concorde ,
 Ne de la cord' d'hier ,
 Et soubstient discorde ,
 Dont la fin n'est que orde ,
 Sans misericorde ,
 Doibt sentir la corde
 D'ung cordant Cordier.

Une aultre estoille estrange & fort barbée ;
 Felle, enflambée , & par trop venimeuse ,
 Qui contre un ray , après qui chascun bée ;
 S'est rebarbée , & qui Liege a robbée ,
 Paix destourbée , & troublé Rin & Meuse ,
 Par sa fumeuse influence orgueilleuse ,
 Fort pilleuse est cheutte en terre basse ;
 De chien rabby n'y a point longue chasse.

O ! barbe pointuë
 Tu as abbatuë

La

La sainte statuë,
 De mettre advestuë,
 Dont le chef pourrist ;
 Se tu es tonduë,
 Reze & pourfenduë,
 Droit ne s'esvertuë ;
 Qui de glaive tuë,
 De glaive perist.

Au point du jour Appolo preparâ
 Son Aurora qui sa lumiere esband,
 Ou parc l'envoye où son filz repara ;
 Tant esclara, laboura, temboura,
 Qu'il rembarra le noir lyon rempant,
 Et là fut tant batu en abbatant
 Et combatant, que à peu qu'il ne fut pris ;
 Trop enuys meurt qui point ne l'a apris.

Après fouldre esclitre,
 Tempeste behistre,
 Qui leur administre
 Mars le fier ministre,
 Lyons prestement,
 Tenans leur chappitre,
 Devant leur pulpitre,
 Tournant maint registre
 Penserent de tistre
 Bon appointment.

Tant a Titan en sa tonne tonné ;
 Et entonné tonnoires à bon ton,
 Que le pays en fut tout estonné,
 Tout nud, tout né, en dueil descotonné ;
 Desbatonné de cotte & de baston,
 Plus n'abaton baton ne combaton,
 La paix voit-on ens au pere & au filz,

L'Esperit saint c'est lancé à leur fiz.

Juppiter domine ,
 Phebus le enlumine ,
 Mavors se termine ,
 Et Pallas lamyne
 Rigueurs & esclandres ;
 Mercure chemine ,
 Saturne germeyne ,
 Broullas & bruyne
 Son mis à ruyne ,
 On voit paix en Flandres.

Vecy Juillet ung mois imperial ;
 Fort curial , que le Roy de Lyon
 Doibt triumpfer par droit original
 En tribunal , & avoir son real
 Siege Royal au throsne du Lyon ;
 Rebellion à ce coup deslion
 Par union qui rompt son appareil :
 Après leid temps voit-on le cler Soleil.

Obscures nuées
 Se sont desnues ,
 Les grandes armées
 Des vens sont charmées ,
 Et ne vont avant ;
 De feu les fusées
 Nous sont reffusées ,
 Et grosses gellées
 Se sont desgellées
 Au Soleil levant.

Prions à Dieu qui le Soleil puissant
 Resplendissant dessus toute lumiere
 Soit entre nous bonne paix flourissant ,

Et nourrissant, & son très noble enfant
 Soit triomphant en Majesté sommiere ;
 La guerre fiere orgueilleuse greffiere,
 Plus ne se fiere entre leur bons suppos :
 Qui vit en paix, il dort en grans repos.

Pastoureaux hantans
 Les Chantres chantans
 Donnez vous bon temps,
 Les bons combatans
 Ont mys en voz lacz,
 Les reinceaulx sentans,
 La paix pour cent ans,
 Soyez esbatans,
 Sans estre inconstans,
 Bergers sans foullas.



*Recollektion des merueilleuses advenueës en
nostre temps, commencée par très éle-
gant Orateur Messire GEORGE
CHASTELLAIN, & continuée
par Maistre JEHAN MOLINET.*



UI veult ouyr nouvelles
Etranges à compter,
Je sçay les nompareilles
Que homme ne sçauroit chanter;
Et toutes advenueës

Depuis long-temps en ça;
Je les ay retenues,
Et sçay comment il va.

Les unes sont piteuses;
Et pour gens esbahir;
Et les aultres doubteuses,
De meschef advenir;
Les tierces sont estranges
Et passent sens humain,
Aucunes en louanges,
Aultres par aultre main.

En France la très belle
Fleur de Crestienté,
Je veis une pucelle
Sourdre en auctorité,
Qui fit lever le siege
D'Orleans, en ses mains;
Puis le Roy par prodiege
Mena sacrer à Reims.

Saincte fut aorée
 Par les oeuvres que fist ;
 Mais puis fut rencontrée
 Et prise sans prouffit ,
 Arse à Roüen en cendre ,
 Au grant dur des François ,
 Donnant depuis entendre
 Son revivre aultresfois.

J'ay veu ung petit moyné
 En Romme dominer ,
 Et en très grant ensoigne
 Le Pape gouverner :
 Dont depuis l'aventure
 Fut d'estre escartellé,
 A honte & à laidure
 Comme traistre appellé.

J'ay vu ung ypocrite ,
 Pour le monde prescher
 Soy disant Carmelite ,
 Et fol soy avancer
 De dire messe fainte ;
 Sans de prestrie adveu ;
 Laquelle chose atteinte
 Fut condampné en feu.

Depuis veiz en Escosse
 Le Roy David meurdrir
 D'espée , & de talloce ,
 Et luy convint souffrir ,
 Et prendre en pacience
 A sa noble moullier ,
 La Royne , qui en ce
 Prist peine à se venger.

J'ay ung Duc de Savoye
 Veu Pape devenir ,
 Ce qui fut hors de voye
 Pour à salut venir ;
 Si en vint dure playe
 En l'Esglise de Dieu ,
 Mais il en reçeut paye
 A ripaille son lieu.

J'ay veu à la grant Romme
 Meurdrir ung Cardinal ,
 Par ung faulx mauvais homme ,
 Son Barbier desloyal ,
 Gisant en liêt paisible ,
 Querant sa coyeté ,
 Dont en tourment horrible
 Il fut executé.

J'ay puis veu soudre en France ;
 Par grant derision ,
 La racine & la branche
 De toute abusion ,
 Chef de l'orgueil du monde ,
 Et de lubricité ;
 Femme où tel mal habonde
 Rend povre utilité.

Puis ay veu par mistere
 Monter ung argentier ,
 Le plus grant de la terre ,
 Marchant & financier ,
 Que depuis la fortune
 Veiz mourir en exil ,
 Après fraudes mainte une
 Faicte au Roy par cas vil

J'ay veu par excellence
 Ung jeune de vingtz ans ,
 Avoir toute science ,
 Et les degrez montans ,
 Soy vantant sçavoir dire
 Ce qu'onques fut escript ,
 Par seule foiz le lire
 Comme ung jeune Antecrist.

Par fortune fenestre ,
 Veiz à l'œil vivement
 Le grant Duc de Cloestre
 Meurdrir piteusement ;
 En vin plain une cuve
 Failloit qu'estranglé fust ,
 Cuidant par celle estuve
 Que la mort n'y parust.

Ung Gilles de Bretagne ,
 Nepveu au Roy Charlon ,
 Veiz-je , par mode estrange ,
 Estrangler en prison ,
 Par l'adveu de son frere ,
 Dont cité devant Dieu ,
 Mourut de mort amere
 Tout soubdain comme sieu.

D'Espaigne ung Conestable ;
 Haultainement regnant ,
 Grant Maistre redoutable
 De saint Jacques le grant ,
 D'or riche oultre mesure ;
 Celluy veiz-je mourir
 De mort confuse & dure ,
 Ce fist son demerir.

Le trésor de Venise ,
 Où si grant apport a ,
 Veiz-je embler par l'emprise
 D'ung Grec , qui l'emporta ;
 Depuis ung sien compere
 Fist accusation ,
 Dont dommaige grant ere
 De pendre ung tel larron.

Depuis en ung province
 Trouvay ung accuseur ,
 Qui me disoit que ung Prince
 Coucha avec sa seur ,
 Soubz une fausse bulle ,
 Cuidant dispense avoir ,
 Dont honneur le reculle ;
 Et non qu'a bon debvoir.

J'ay veu Millan conquerre
 Par ung povre routier ,
 Et plus los y acquerre ,
 Que ung Roy vray heritier ;
 Se luy en est bien deuë
 La gloire de l'arroy ,
 Car sa vertu congneuë
 Vault couronne de Roy.

J'ay veu de trois centaines
 Vieille possession ,
 Exposer d'Acquaine
 Angloise nation ,
 Et Bordeaux & Bayonne
 Prise du Roy François ,
 Louenge à la couronne
 Qui fist sy hault exploix.

J'ay veu la Normandie ,
 Et la noble Rouen ,
 Submise à la mestrie
 Du Roy & de son ban ,
 Monstrant là ses banieres
 Sur les vielz ennemys ,
 Les quelz par armes fieres
 Vainqueurs il a remys.

J'ay veu ung hault emprenre
 Pour advenir grans mauix ,
 De tuer & de pendre
 Beaucoup de Cardinaulx ,
 Et du Pape ainsy faire ,
 Se Dieu n'y eust pourveu ,
 Estienne de Procaire
 A Romme en fut pendu.

J'ay veu grand' invaincuë ;
 Subjuguer à mes yeulx ,
 D'ung Prince soubz la nuë
 Le plus victorieux ,
 Et d'espée mortoire
 Vaincre ses habitans ,
 Dont cas de telle gloire
 Ne fut passé mil ans.

J'ay veu extreme chose ;
 Chevalier soubz trente ans
 Combatre en lice close
 Vingt deux nobles gens ,
 Par tant de foyz diverses ;
 Comme il y a de noms ,
 Sans foulle & sans traverse ;
 Ce qu'oncques ne fist homs.

La Cité Constantine

Depuis veiz envahir
 De la gent Sarrazine ,
 Qui la vindrent saisir ,
 Et la teste copperent
 Au vieillart Empereur ,
 Sans ce que ailleurs monstrerent
 Maint aultre grant horreur.

J'ay veu une Lucrece
 En Romme dominer ,
 De Naples non de Grece ,
 Pour le Pape honorer ,
 Aller au devant d'elle
 Cardinaulx & Prelatz ,
 Et sy n'estoit que ancelle
 Du Roy , pour son soulas.

J'ay veu Roy de Honguerie
 Faire preparement
 De haulte drurie ,
 Très glorieusement ,
 Qui attendoit la chere
 Du nuptial atour ;
 Trouvé fut mort en bierre ,
 Ne sçayt-on par quel tour.

Luy mort , prit la Couronne
 Le filz d'ung compaignon ,
 Vertueuse personne ,
 Et de très grant renom ;
 Ainsi royal' racine
 Prist là son dernier plong ,
 Et la basse origine
 Monta en royal tronc.

J'ay veu l'aisné de France ;
 Fuytif de son fourgeon ,
 Venir prendre umbroiance
 Soubz le Duc Bourguignon ;
 Et le mettre en couronne
 Non gueres biens venu ;
 Dieu congnoist en son throsne
 S'il l'a bien recongneu.

J'ay veu peuple confondre ,
 Et Royaulme trembler ,
 Chasteaux & Villes fondre ,
 Et Citez abismer ,
 Craventer les Eglises ,
 Fendans toutes parmy ,
 Es Naploises pourprises ,
 Ce fist ce grant ay my.

J'ay veu descendre en France
 Anglois encontre Anglès ,
 Par contrainte & puissance ,
 Pour contendre au *posses* ,
 Pour Calès & pour Guines ,
 Ce fut tout cest esmeu ;
 Ce sont estranges signes
 Le cas bien entendu.

Passant par Engleterre ;
 Je veiz en grant tourment
 Les Seigneurs de la terre
 S'entretuer forment ,
 Avec ung tel deluge ,
 Qui cueurs esbahissoit ;
 Qu'à peine y eut refuge
 Où mort n'apparoissoit.

Ung nouveau Roy créèrent ;
 Par despitieux vouloir ,
 Le vieil en debouterent ,
 Et son legitime hoir ,
 Qui fuytif alla prendre
 D'Escoffe le garand ,
 De tous siecles le mendre ,
 Et le plus tollerant.

J'ay veu en grant fortune
 Une des fleurs de lis
 Tenir en prison brune ,
 En très povres delictz ,
 Privé de Seigneurie ,
 Et de Royal honneur ,
 Dont la gloire perie
 Est en sa prime fleur.

De Cypre la Couronne
 Ay-je veu emprunter
 Au Chef de Babilone ,
 Pour le Roy en jecter ;
 Bastard est , & d'Eglise
 Celluy qui le maintient ;
 Et n'a compte à reprise ,
 Ny à mal qui en vient.

La Royne veis descendre
 Dedans le marin cours ,
 Par ung ardant contendre
 Vers France pour secours ;
 Qui depuis fut pillée ,
 Et mis au sacqueman ,
 Par pillars de Gallée ,
 Du port Venician.

J'ay veu de deux Royaulmes
 Deux Roys contemporains,
 Confesser en leurs ames
 Haulx motz & souverains,
 De tenir leur couronne,
 Et leur pourpre vestu,
 D'une seule personne,
 Le grant Duc de vertu.

J'ay ung Roy de Cecille
 Veu devenir berger,
 Et sa femme gentille
 De ce propre mestier,
 Portant la pennetiere,
 La houlette, & chapeau;
 Logeant sur la bruyere,
 Auprès de leur troppeau.

J'ay veu de Georgie,
 Et du hault Orient,
 De Perse, & d'Armenie,
 Diverse estrange gent,
 Mesme d'ung infidelle
 Transmettre au Roy Charlon;
 Pour luy donner querelle
 Contra le Turc felon.

Le hault Duc de Bourgoigne
 Fort bien le recoeillit,
 Dont l'œuvre assez tesmoigne
 Quel honneur il leur fist;
 L'honneur fut si profonde,
 Et de si haultain fait,
 Que jusques au bout du monde
 La memoire s'en fait.

J'ay veu deux trois commettes
 Manifester au Ciel ,
 Et d'estranges planettes ,
 Plus ameres que fiel ,
 Dont les fins non congnuës
 Sont d'esbahissement ,
 Et de non advenuës
 N'est nul vray jugement.

J'ay veu chose inhumaine,
 Et cruelle en la foy ,
 Tuer à force pleine
 Gens d'Eglise à defroy ;
 La Cité de Mayence
 En est tournée en feu ,
 Et a si grefve oultrance ,
 Que oncques tel mal ne fu.

O ! hault Duc plein de gloire ,
 Et vous son noble filz ,
 Ceste brefve memoire
 De tant de divers dis
 Ay fait en voz louanges
 D'ung cueur non vermolut ;
 Il plaïse au Roy des Angelz
 Qu'il vous tourne à salut.

J'ay veu dure vieillesse,
 Qui me vient tourmenter ,
 Se fault que je délaiïse
 L'escripre & le dicter
 En rime telle quelle ,
 Puis que je vois mourant ;
 Molinet mon sequelle
 Fera le demourant.

J'AY veu ung petit Conte,
 Seigneur de Charrolois,
 Qui bailla bien son compte
 A Loys de Valloys,
 Au mont Henry en France
 Son ost le poursuy,
 Mais l'ung tint place franche,
 Et l'autre s'en fuy.

J'ay veu la Chandreliere
 Orgueilleuse Dinant,
 Ville assez singuliere,
 Mais toujours huttinant;
 Pour sa grande arrogance,
 Le Lyon très hardy
 En print dure vengeance,
 Et en cendre l'ardy.

J'ay veu les murs de Liege
 Destruictz & abbatus,
 Son Peron perdre siege,
 Ses mutins combatus;
 Criant, vive Bourgoigne,
 Le Roy vint de surcrois,
 Qui porta sans vergoigne
 De saint Andrieu la croix.

J'ay veu Duc magnifique
 Tant surpris de Gantois
 Qu'à dur trouva practique
 D'eschapper de leur toictz;
 Ilz furent pris au pieges,
 Dont ilz furent honteux,
 Car leurs grans previlleges
 Dessira devant culx.

Paulus sans faulte nulle,
 Qui d'argent eut maint marc,
 Filt nouveau scel & bulle,
 Et le Palais sainct Marc;
 En or & pierrerie
 Mit son entendement,
 Et en sa trésorie
 Fina estrangement.

J'ay veu, par forte glaive;
 Edouard Roy Anglois
 Expulsé, comme esclave,
 De ses royaulx angletz;
 En moins d'onze sepmaines,
 A l'espée tranchant,
 Recouvrer ses demaines,
 Et son throsne luyfant.

J'ay veu porter souffrance
 A Werwic, qui cuidoit
 Trouver Anglois soubz France;
 Et France sur son doigt;
 Payé fut de ses galles,
 Car il passa par là,
 Et le Prince de Galles
 Oncques puis ne parla.

Fortune qui couronne
 Les siens à son franc chois;
 Donna double couronne
 D'Anglois & de François
 A Henry, qui ses resnes
 Rompit sur le hault roc,
 Il perdit ses deux regnes,
 Se ne fut Roy ne Roc.

J'ay

J'ay veu la Normandie
 Du lion trespercer,
 Le Roy, quoy qu'on en die,
 Ne l'osoit approucher;
 L'ung demandoit la guerre,
 L'autre plaisant soulas,
 L'ung vouloit bruyt acquerre,
 L'autre en estoit fort las.

J'ay veu comette horrible;
 Comme verge poindant,
 Espoventable, terrible,
 Grande, felle, & ardant;
 Sur le Rin vers Couloigne
 Jectoit son rayant dart,
 Et le Duc de Bourgoigne
 Y mist son estandart.

J'ay veu soulfre salpetre
 Ensemble batailler,
 Quant j'ay veu Fratre Petre,
 Cardinal Cordellier,
 Plein de pompe mondaine,
 Et d'immundicité,
 Et à heure soudaine
 Estre à la mort cité.

L'Empereur d'Allemaigne
 Dedans Treves entra,
 Charles qui l'accompaigne
 Son triumphe y monstra;
 Chascun tant ayme & prise
 Son excellent arroy,
 Que la journée fut prise
 Pour le couronner Roy.

Nus attendit l'espée
 Du plus fort Duc des Ducz ;
 Sa riviere coppée,
 Ses muretz pourfendus,
 Près d'ung an assiegé
 Endura ses travaux,
 De secours estrangé,
 Mangeant chair de chevaulx.

J'ay veu ung Duc combatre
 Le Rommain Empereur,
 Tentés & gens abatres
 Par mortelle terreur ;
 Sans craindre hacquebutes,
 Sans estre berfandé,
 Retourner en ces butes
 Son siege bien gardé.

J'ay veu Roy d'Angleterre
 Amener son gran ost,
 Pour la Françoisse terre
 Conquester bref & tost ;
 Le Roy voyant l'affaire,
 Si bon vin luy donna,
 Que l'autre, sans riens faire,
 Content s'en retourna.

J'ay veu saint Pol en gloire
 Ravy jusques ès Cieulx,
 Puis descendre en bas loire,
 Mal en grace des Dieux ;
 Saint Pierre s'en delivre,
 Pas ne le respita,
 Et au Prince le livre,
 Qui le descapita.

Et si fault que je life
 Ceulx qui ont eu mal an :
 Meurdry fut à l'Eglise
 Le grant Duc de Millan ;
 Par user des plus belles
 Femmes de son pays ,
 Et mettre sus gabelles ,
 Il fut à mort hays.

J'ay veu le plus fort Prince
 De la Chrestienté ,
 En Turquoise Province
 Fort crainct & redoubté ;
 Surmonter en bataille
 Par ung petit Ducquet ;
 En gens de rude taille
 On n'y a point d'acquest.

Ainsi dont loups faulvaiges
 Occirent le lion ,
 Gardant sur les rivaiges
 D'aigneaux ung million ;
 Moutons , loups , & ouailles
 S'accorderent enfin ,
 Pour pillier les oreilles
 Au renard rouge & fin.

J'ay veu Citez & Villes
 Ensemble mutiner ,
 Villains , meschans , & villes
 Les nobles huttiner ;
 Ce tourbe que j'alegue
 Occist le Chancellier ,
 Et le Conte de Megue
 De l'ordre Chevallier.

En Gueldres qui prospere ;
 J'ay veu grant mesprison ,
 Le filz tenir le pere
 En obscure prison ,
 S'en fut bouté en selle ;
 Puis mourut champion
 D'une noble pucelle ,
 Comme ung vray Scipion.

J'ay veu dedans Mallines
 Notable Parlement ,
 Pour faulses gens malines
 Corriger justement ;
 Mais comme le Prophete
 Par avant l'annunça ,
 Le hault bruyt de la feste
 Tout à coup trébucha.

J'ay veu grans bledz & paille
 Par les champs rapiner
 Tous biens à la haspaille ,
 Sans pendre & sans traifner ,
 Chetifz & miserables
 Devenir riches gens ,
 Et riches honorables
 Mendians indigens.

J'ay veu Juifz seduire
 Ung petit enfançon ,
 Le meurdrir & destruire
 Par estrange façon ;
 Miracles faire à Trente ,
 Comme font plusieurs sainctz ;
 Plus de vingt & de trente
 En sont gueris tous sains.

J'ay veu ung Roy de France
 Accorder aux Angloys ,
 Affin que grant souffrance
 N'ayt France en ses angletz ;
 France franche & non serve ,
 Sinon à ses amys ,
 Et dure que leu serve
 A tous ses ennemys.

J'ay veu homme de guerre ;
 Sur cheval bon & fier ,
 En Hapre venir querre |
 Ung très riche Censier ;
 Le bon saint de l'Abaye
 Acquaire , s'en vengea ,
 Le cheval enrabié ,
 Et son Maistre enraigea.

J'ay veu grant multitude
 De Livres imprimez ,
 Pour tirer en estude
 Povres mal argentez ;
 Par ces nouvelles modes
 Aura maint escollier
 Decret, Bibles , & Codes
 Sans grant argent bailler.

J'ay veu pucelle tendre ,
 Anthonias eut nom ,
 Toute science entendre ,
 Logicque & Droit Canon ,
 Saige comme Sibille ,
 En l'aage de dix ans ,
 Et de respondre habille
 A tous contredisans.

J'ay veu Gendarmerie
 Bigarrée à tous lez ,
 Comme Juifverie ,
 Riolliez , piollez
 De diverses bigornes ,
 Et d'estranges façons ,
 Ne restoit que les cornes
 Pour estre limassons.

J'ay veu Tournay tournée
 En ung mauvais tournant ,
 Sans estre retournée ,
 Ses voisins bestournant ;
 Noz maisons , noz tourelles
 En cendre contourner ,
 Et Flamens entour elles
 Durement attourner.

J'ay veu par ces oraiges
 Des nobles corumpus ,
 Et des loyaulx couraiges
 Qui leurs boys ont rompus ;
 Les villains sans richesse
 Furent trop plus loyaulx
 A leur Dame & Princeffe,
 Que aultres gens desloyaulx.

J'ay veu Chevallier noble
 En bruyt & en valleur ,
 De vertu la vignoble ,
 De proesse la fleur ,
 Espouser noble femme ,
 Et avoir beaulx enfans ,
 De glorieuse fame ,
 En armes triumphans.

La Dame mise en bierre ,
Le Seigneur de vertu ,
Content de pain & bierre
Fust Moysne revestu ,
Prestre , Abbé portant chappe ;
Et Evesque sacré ,
Fort digne d'estre Pape
Pour son final degré.

J'ay veu nobles contrées
Sans chef & sans Seigneur ,
Durement rencontrées
D'ung terrible enseigneur ,
Pucelle habandonnée ,
Grant desroy de commun ,
Et en mains d'une année
Avoir deux Ducz pour ung.

J'ay veu dedans Florence
Arcevesque pendu ,
Et fort grant apparance
De Cardinal perdu ;
Trois Abbez portans crosses ;
Et ceulx de leur partis ,
Furent , par dure approche ,
Mutillez & occis.

J'ay veu , chose incongnüe ,
Ung mort resusciter ,
Et sur la revenue
Par milliers achapter ;
L'ung dit , il est en vie ;
L'aultre , ce n'est que vent :
Tous bons cueurs sans envye
Le regrettent souvent.

J'ay veu Duc de Clarence
 Bouté en une Tour ,
 Qui queroit apparence
 De regner à son tour ;
 De mort préadvisée
 Le Roy le fist noyer
 Dedans mallevisée ,
 Pour le moins ennuyer.

J'ay veu , comme il me semble ,
 Ung fort homme d'honneur
 Luy seul chanter ensemble
 Et dessus , & teneur :
 Olbeken , Alexandre ,
 Joffequin , ne Bugnois ,
 Qui sçayvent chantz esprendre ,
 Ne font telz esbanois.

J'ay veu Clerc de Villaige
 Menger ung gros raton ,
 Une poulle volaige ,
 Ung quartier de mouton ,
 Du pain plein une mande
 Bouter en ses boyaulx ;
 Ne sçay comme la pance
 Ne luy rompt de morseaulx.

J'ay veu en Vallenciennes ,
 Quant droit là me tournay ,
 Va-toft faire des fiennes ,
 Et aller à Tournay
 En moins d'heure & demye ,
 Sans cheval ou jument ;
 C'estoit chose ennemye ,
 Force , ou grant radement.

Affieger vindrent Rhoddes
Plus de cent mille Turcz,
Vestuz d'esfranges modes,
Luy percerent les murs;
La Vierge glorieuse
La Cité secourut,
Qui fut victorieuse,
Et le Turc s'en courut.

J'ay veu felle besoigne;
Et cas de grant pitié,
A Disjon en Bourgoigne
Plouvoir sang à planté;
Au Roy Loys de France;
Fust le sang envoyé,
Doubtant avoir souffrance;
Fut assez ennuyé.

J'ay veu cinq personnaiges
D'ung triumphant hostel,
En mains de dix lunaiges,
Payer tribut mortel;
Marie rendit compte,
François son filz le bon,
Sainct Pol, Cymay le Conte,
Et Loys de Bourbon.

Loys d'ung coup d'espée;
Digne Evesque, & Duc grant,
Eut la gorge coppée
Par ung mauvais Tyrant;
Mais Liege en fut pugnie
Par glaive & par arsin,
Et la barbe honnye
Qui brassa ce brassin.

Je veiz devant Bouloigne
 Le filz de Ravestain,
 Mettre gens en besoigne
 Cinq mille, il est certain;
 Liegeois plus de dix mille,
 Par chevallereux faitz,
 Furent comme une pille
 Succombez & deffaitz.

Liegeois y apporterent
 Cinq tonneaux de licolz;
 Car pendre il y cuiderent
 Bourgoignons par les colz;
 Mais de cleres espées,
 Picques, & gaurelos,
 Eurent gorges coppées,
 Sans y avoir grant los.

J'ay veu peuple en mes Livres,
 De famyne troublé,
 Et vendre quatre livres
 Ung seul mencault de blé;
 En ceste propre année
 Avoir deffus l'Escault
 La chance retournée,
 Ung muy pour ung mencault.

Pour chose assez précise,
 J'ay veu en noz tenans,
 Arras nommer franchise,
 Et changer les manans;
 Comme infames & villes,
 Les hoirs en debouter,
 Et gens d'esfrange Villes
 Y venir habiter.

Et Cambray changer armes ;
 Portans florons royaulx ,
 Forger pour les Gens-d'armes
 Chaisnes de ses joyaulx ;
 Meuge fut composée
 Du Seigneur Marafin ,
 Et du Roy remboursée ,
 Avant qu'il prenlist fin.

J'ay veu oyseau ramaige ;
 Nommé Maistre Olivier ,
 Volland par son plumaige ,
 Hault comme ung esprevier ;
 Fort bien sçavoit complaire
 Au Roy ; mais je veiz qu'on
 Le feist , pour son salaire ,
 Percher au Mont-faulcon.

J'ay veu , estrange compte ;
 François accompagner
 De Richemont le Conte ,
 Pour son regne gagner ;
 Richard Roy d'Angleterre
 En bataille perir ,
 Et les hoirs de la terre
 Eslonger & mourir.

J'ay veu la fiere barbe ,
 Qui tant se rebarba ,
 Doulx comme sainte Barbe ,
 Quant on le desbarba ,
 Sans couvrechief qui buë
 Atrest fut desbarbée
 De se barbe barbuë ,
 Car il vint à jubé.

Je veiz Gand qui prospere
 Sur Flamens triumphans,
 Au desplaisir du pere
 Retenir deux enfans ;
 Le pere à force d'armes
 Les reconquist, s'en fu,
 Gand pour ses gros vacarmes
 En danger d'estre en feu.

Comme Paisans villes,
 Portans flesches & dardz,
 Quirent aux bonnes Villes
 Du vin pour leurs souldars,
 Maint Archer fist son hoste,
 D'autour de saint Bavon,
 Porter vivres en hottes,
 Comme povre Esclavon.

J'ay veu Seigneur des Cordes
 Aux Flamens accorder,
 Cordeller grans discorder,
 Pour pays descorder ;
 Flamens se racorderent
 Au Duc que recordons,
 Et les François corderent
 De guerre les cordons.

Aignemont en Hollande
 Mena ses Cabillaux,
 Armez d'escaille grande,
 Dure comme caillaux,
 Faindant grant marchandise
 Estre en ung Vaisseau frec,
 Prindrent par vaillantise
 La Ville de Dordrec.

Puis ouys chose amere
 Plus fiere que devant,
 Au ventre de sa mere
 Brayre ung petit enfant,
 Et au Quesnoy le Conte
 Tant hault plaindre & gemir,
 Que la mere, à bref compte,
 En laissa le dormir.

J'ay veu deux ou trois Isles
 Trouvées en mon temps,
 De chucades fertiles,
 Et dont les habitans
 Sont d'estranges manieres
 Saulvaiges & velus;
 D'or & d'argent mynieres
 Voit-on en ces pallus.

Par mystere fort riche,
 Où Dieu presta les mains,
 Veiz l'Archeduc d'Autriche
 Esleu Roy des Romains,
 A Aix en Allemaigne
 Dignement couronné,
 Son pere l'accompaigne
 Richement atourné.

J'ay veu une Rommaine,
 Dame de grant renom,
 Fille humble, & fort humaine
 Du Senateur Zenon;
 Sept cens ans enterrée
 Fut sans corruption,
 Au peuple fut monstree
 Par admiration.

J'ay veu Frere Nicole
 Ung Suisse devot,
 D'abstinence l'escolle,
 Fort bien tenant son vot,
 Vingt ans vivre en ce monde,
 Sans manger peu ne point;
 Dieu en sa gloire munde
 Luy doit viande à point.

J'ay veu vif sans fantosme
 Ung jeune moyfne avoir
 Membre de femme & d'homme,
 Et enfant concepvoir,
 Par luy seul en luy-mesmes
 Engendrer, enfanter,
 Comme font aultres femmes,
 Sans outiliz emprunter.

De fort dure fortune
 Veiz Bourgoignons servir,
 Esperans de Bethune
 Les formaiges ravir;
 En lieu de fins formaiges
 Trouverent faulx baratz,
 Gueldres y eut dommaiges,
 Nassö & Lassaras.

J'ay veu par mutinaige,
 Bruges mettre les mains
 Au digne personaige
 Roy sacré des Rommains;
 Ses Chevalliers, ses Nobles.
 Son mignon fort fringant,
 Pis loger qu'en vignobles,
 Emprisonnez à Gand.

Les moutons detenterent
 En son parc le berger ,
 Les chiens qui le garderent
 Sont constrainctz d'eslonger ;
 Le berger prist figure
 D'aigneaulx , mais ses brebis
 Dont il avoit la cure
 Devindrent loups rabis.

Bruges mist à torture
 Chevalliers & Barons ,
 Sans raison & droicure ,
 Comme on feroit larrons ;
 Par gent rude & meschante ,
 Fut lors sur le marché
 D'une espée trenchante
 Maint noble despeché.

Pourquoy l'Imperialle
 Majesté acourut ,
 Qui son filz la royalle
 Dignité secourut ;
 La noble Germanie
 Tellement huttina ,
 Que Flandres fut pugnie ;
 Et Bruges en saigna.

J'ay veu à bas descendre
 Ung fort jeune elephant ,
 Coulouré comme cendre ,
 Aspre , & fort remouvant ;
 De sa grande narine
 Fort bien s'esbanoya ,
 Et puis sur la marine
 Meschamment se noya.

J'ay veü parmy ung voire
 François & Bourgoignons
 Ensemble à Cambray boire ,
 Comme bons compagnons ;
 Puis aux champs hors la Ville
 L'ung sur l'aultre charger ,
 Pour mettre en prison ville ,
 Ou en mortel danger.

J'ay veu haulte Princeſſe
 D'Yorch de grant renom ,
 De Bourgoigne Duchefſe ,
 Marguerite avoit nom ,
 Perdre par dures glaves
 Ses freres , ſon mary ,
 Ses nepveux , l'ung esclaves ;
 L'aultre eſtaint & pery.

A Romme ung de Viterbe ;
 Pour ducatz amaffer ,
 Sçeut d'eau & de viſte herbe
 Plusieurs bulles caſſer ,
 Faire ſeconde lettre ,
 Où la premiere fu ;
 Mieulx que tiſon en l'eſtre ;
 En fut bruſlé en feu.

Quant Flandres eut ſouffrance ;
 Je veiz ung chauſſeteur ,
 Maïſtre d'Hoſtel en France ,
 Eſlevé en hault heur ;
 Par luy maint copenolle
 Au monde fut forgé ,
 S'en eut col & canolle
 Du haſterel deſlogé.

J'ay

J'ay veu grant Vauderie
 En Arras pulluler,
 Gens pleins de rederie
 Par jugement brusler ;
 Trente ans puis ceste affaire,
 Parlement decreta
 Qu'à tort, sans raison faire,
 A mort on les traicta.

René Duc de Lorraine
 Eut deux femmes vivans,
 Mais de la premeraine
 Ne peult avoir enfans ;
 La seconde fut digne
 De lignie assembler,
 Qui en bref se fist Roïne
 De Cecille nommer.

J'ay veu Louvain, Nivelles,
 Brucelles, je m'en crois,
 Pour chose fort nouvelle
 Porter la droicte Croix ;
 Brucelles fut humille,
 Par mort qui l'aherdit,
 De gens trente six mille
 Pour ung an y perdit.

J'ay veu les bonnes Villes
 Achapter larronceaulx.
 Aux paysans servilles,
 Pour pendre aux arbresseaulx ;
 Trop estoit la derrée
 Venduë aux bons marchans,
 Pour estre delivrée
 Aux corbillons des champs.

J'ay veu louenge acquerre
 Au grant Roy des Rommains ;
 Aufriche reconquerre ,
 Et Honguerie en ses mains ;
 Vienne , Alberegalle ,
 Ont sentu les assaulx
 De Majesté regalle ,
 Et ses nobles vassaulx.

J'ay veu devotes vierges
 En dangereux perilz ,
 Vexées par les verges
 Des mauvais Esperis ,
 Droit au Quesnoy le Conte
 Advint ce grant malheur ;
 Piteux en est le compte ,
 Dieu doint qu'il soit meilleur.

J'ay veu Roy d'Angleterre
 Ung grant trésor cocillir ,
 Pour la Françoisé terre
 Conquerre & bataillir ;
 Il assiegea Boullaigne :
 Mais le grant Crevecueur
 Luy tourna bride & longne ;
 Sy luy changea le cueur.

J'ay veu filz d'Angleterre ;
 Richard d'Yorc nommé ;
 Que l'on disoit en terre
 Estainct & consommé ,
 Endurer grant souffrance ;
 Et par nobles exploitz ,
 Vivre en bonne esperance
 D'estre Roy des Angloys.

Allemaigne, Engleterre,
 Et Bourgoigne ont chargé
 Engins par mer & terre,
 L'Escluse ont assiégré;
 Ceulx qui le deffendirent,
 Soubstindrent vaillamment,
 Mais enfin se rendirent
 Par bon appoinctement.

J'ay veu ung Roy d'Espaigne,
 Pour la foy augmenter,
 Et luy & sa compaigne,
 Grenade conquetter;
 Sept ans y tint le siege,
 On y fist maint blocus,
 Et puis fut pris au piege,
 Roy & Mores vaincus.

Marguerite d'Austriche
 Veiz-je Royne nommer,
 Et du povre & du riche
 En France & plus amer,
 Que d'or une montaigne;
 Mais ce bruyt s'accoisa,
 Car l'Anne de Bretaigne
 Son amy espousa.

L'Anne qui fut pourjutte
 Pour le Roy des Romains
 Imperial Auguste,
 Ailleurs tendit ses mains;
 En Françoisse garite
 La Couronne porta,
 Et nostre Marguarite
 Bonne paix apporta.

Mais le chef de Vaillance
 Roy Maximilian,
 Espoufa Dame Blanche,
 Seur du Duc de Millan ;
 Royne fut couronnée
 En triumpant arroy,
 D'honneur environnée
 La receipt le bon Roy.

J'ay veu en hault estaige
 Des Cordes le Seigneur,
 Povre de son portaige,
 Mais puissant Gouverneur ;
 Il tint en sa demaine
 Des fleurs de Lis le neud :
 Puis le temps Charlemagne
 Homme si grant bruyt n'eut.

Les oyseaulx s'espanterent ;
 Son corps mis à l'estrain,
 Les fleuves en saulterent
 Hors de leur commun train,
 Les gros vens tant soufflerent ;
 Tant greffilla, & plut,
 Que vignes engellerent,
 Dont fort il nous desplut.

Et à Paris sur Seine
 Je veiz ung garnement,
 Blasmant, de foy mal saine ;
 Le Divin Sacrement ;
 Le saint Sang du Callice
 Vult pendre & pesteler,
 Se fut pour sa malice
 Condamnée à brusler.

Et au pont sainte Maxence
 Veirent plusieurs Marchans
 Feu de grant reluyfance
 Plouvoir avant les champs ,
 Par grandes grosses masses ,
 Le veirent descharger
 En ces regions basses ,
 Sans riens adommager.

Auprès de Vallenciennes
 Veiz ung jeune filz bon ,
 Qui les bras des mains saines
 Avoit noirs que charbon ;
 L'esperit de sa mere
 Morte l'avoit blessé ,
 S'en fut de peine amere
 Par son filz despeché.

J'ay veu & leu en Livres ;
 D'une pierre pesant
 Deux cens cinquante livres ;
 Montaignes traversant ;
 Du Ciel par ung tonnoire ,
 Comme il me fut compté ,
 Cheut ceste pierre noire
 En Ferret la Conté.

J'ay mis en retenuës ,
 Ce qui n'advient souvent ,
 Homme ravy aux nuës
 Par tourbillon de vent
 De Bruges en Zeelande ;
 Droit devant Ceriché ,
 En moins d'une heure grande
 Vif se trouva versé.

J'ay veu Charles Huytiesme
 Roy sacré des François,
 Pour cause legitime,
 Coeillir gens à son chois;
 Armes, lance, & heaulme
 Dedans Romme porter,
 Et d'ung train le Royaulme
 De Naples conquerer.

Princes qui l'appellerent
 En passant, beau Cousin,
 Rapassant luy baillerent
 A muser d'ung couffin;
 Venise tint passaige,
 Millan l'a combatu,
 Mais malgré leur visaige
 Retourna bien batu.

J'ay veu, ce qu'il me semble
 Ung monstre fort nouveau,
 Femmes tenans ensemble
 Par ung mesmes carneau,
 Qui deux corps, & deux ames,
 Et deux volentez ont;
 Non de loingtains Royaulmes,
 Mais d'Allemaigne sont.

J'ay veu venir en Roddes
 Le Grant Turc à garant,
 Son frere ung faulx Herodes
 Vouloit estre Turc Grant,
 Qui donna grant richesse
 A la Chrestienté,
 Pour le tenir sans cesse
 En grant captivité.

Roddes, quant je y regarde ;
 Après luy proufita ,
 Le Pape l'eut en garde ,
 Qui bien s'en acquita ;
 Depuis le Roy de France
 Pria de cuer humain
 L'avoir en garde franche ,
 Se mourut en sa main.

*Le Dictier que Vertjus presenta à Maistre
 Nicolle Ramberc.*



SEIGNEUR Nicolle à vous me rendz,
 Vers vous me trouve sur les rencz,
 L'ung suys de voz povres parens ,
 Foible d'argent, en grant peril,
 Pour aussi vray que saint Laurens
 Fust jadis rosty sur le gril.

Je suis Vert-jus, mais non vert jon
 Ploye au vent ainsy que ung verjon,
 Pour commencer ung haultberjon,
 Je ne trouve une povre maille,
 Trop souvent ma vie abregeon,
 Quant povreté me fiert & maille.

Je suis Vert-jus fort jus de laine,
 Fort jus d'avoir, fort jus d'alaine,
 Aussi vray que la Magdalaine,
 Qui fut trente ans en ung desert,
 Si ma bourse n'est d'argent pleine
 Je suis malheureux & desert.

Combien que je soye fort jus,

On congnoist le nom de Verjus
 Par de là les mons de Montjus,
 En Toscanne, & en Carcastonne;
 Rondeaulx s'y font, distez, & jus
 De ma venerable personne.

Point ne suis escouz d'ung patin,
 Point ne suis ung villain mastin,
 Je suis pour desjuner matin,
 Pour desclicquer vent en tous lieux,
 Et pour boire si grant tatin,
 Que les larmes viendront aux yeulx.

Vertjus est parent à verdure,
 A roisin bois, à vigne dure,
 A verdelet quant l'yver dure,
 A vincenet, à pisse aigret,
 A ripaube qui tout endure,
 Et à Messire Jehan Maigret.

Par miracle hault & divin,
 Le Soleil fait changer en vin
 Le vert jus, qui suis grant devin;
 Mais ains que je soye affulé
 De gloire, ung très mauvais congniin
 Me tiendra soubz le pied foulé.

J'ay fait voyages plus de dix,
 Où j'ay esté fort recrandis,
 Demy lieu oultre Paradis
 Je feiz trembler douze beffrois;
 Puis je revins fort estourdis
 Veoir à Coulongne les trois Roys.

Ung Seigneur estoit attachez,
 Si ne pouoit que le sachez,

De son vice estre despeschez ,
 Mais j'ay trouvoy tours & moyens
 De confesser tous ses pechez ,
 Sans reveler ung seul des miens.

Ne tint qu'à deux barreaux de fer ,
 Que je n'entray dedans enfer ,
 Pour les mauvais mordre & griffer ,
 Mais Burgibus me fist la mouë ;
 Sans congé prendre à Lucifer ,
 Je m'en revins vollant comme ouë.

Vertjus suys qui menfonges forge ,
 Qui ruë vent à pleine gorge ,
 Qui raige moulluë desgorge ,
 Qui sçay bourdes ratripeler ,
 Et qui faiz bled devenir orge ,
 Par fine force de souffler.

J'ay rapporté à mes chappeaulx
 Images vestus de juppeaulx,
 Dont j'ay veu les os & les peaulx ;
 Qui veult sçavoir de mes oracles ,
 Voyse visiter les tableaux ,
 Je y ay fait plusieurs beaulx miracles.

Par bien mentir suys vostre affin ,
 N'est si vertueux ne si fin ,
 Qui pour attendre aucune fin
 Ne bourde quant il est mestier ;
 Volentiers le vous dis , affin
 Que ne desprifez le mestier.

Il y a fraternité entre
 Vous & moy, nous venons d'ung ventre,
 D'ung sac , d'ung sang , d'ung cueur, d'ung centre,

Et vivons d'ung pain & d'ung vin ;
 C'est sainte Eglise où le Pape entre,
 Et fait le service Divin.

Se la terre est nostre grant mere ,
 Comme dit Virgille & Homere ,
 Je tiens que vous estes mon frere
 Maternel , il n'est rien si vray ;
 Faictes moy donc vostre confrere
 En la Prebende de Cambray.

Deux veaulx sommes de Boullenois ;
 Deux veaulx , & deux vieux antenois ,
 Je n'ay vaillant soixante noix ,
 Vous avez cent ducatz comptant ;
 Mais je tiens plus de saint Genois
 Que vous , c'est autant pour autant.

Se mes doitz , qui sont fort humains ;
 Sont prochains & près de voz mains ,
 Pourquoi ne sommes nous germain ;
 S'ilz sont fort bien jointz , il me semble
 Qu'il n'y a point demy poingt moins
 Que ne soyons freres ensemble.

Vous estes cousin au cousin
 Du cousin qui fist le couffin ,
 Et couffist le vellu couffin
 Dont je fus premier escoulx , sy
 Que parent estes au foursin
 Du sacquelet que Dieu couffy.

Nous deux sommes d'Adam & d'Eve ;
 Auffy sont tous ceux de Geneve ,
 D'ung estoc , d'ung jus , d'une seve ,
 D'ung couvertois , & d'ung hayon ;

Ne tient qu'au quartier d'une febve
Que vo cul ne soit mon tayon.

Je suis tanné d'estre Vicaire ,
Mieux aymeroye estre au Grant-Caire ,
Ou varlet d'ung Appoticaire ,
Ainsy que une foys je souppay ,
Ou ung Rabis de saint Acquire ;
Je ne puis avoir pis que j'ay.

Faiçtes mais bulles despescher
De bon droict, & sans point clocher,
Pour affuler ung grant clocher ,
Seryy serez d'ung raton chault
Le premier qu'on pourra pecher
En la riviere de l'Escault.

Ne vous doubtez, quant là viendra
Vertjus vous pensionnera ,
Cent ducatz vous assignera ,
Present Michault & Leporis ,
Sur les cornailles qu'on prendra
Sur la Tour du Louvre à Paris.

Vous aurez cent francz bien comptez
Sur les fumées des pastez ,
Des flans , & des gasteaulx gastez ,
Qui cuysent à Meaulx en Brie ,
Deux bruslez & deux eschauldez
Sur les tumbereaulx de Verberie.

La mer vient , & fait ses arretz
En mon vivier , en mes mareftz ,
On s'y moulle jusques aux guereftz,
Puis la Touffains jusques à Pasques ;
On pesche à ung bout les foretz ,

Et à l'autre les harencz cacques.

Et pour avoir enge nouvelle
De poulcins , une Damoyfelle
Me donna , par ung très bon zelle ;
Neuf ou dix oeufz ; mais bonne alleure ;
Je les mys en une payelle ,
Couver s'en feiz la vaulte au beurre.

Les pouvillons ont abatu
Ung hangart couvert de festu ,
Deux grasses vaches de vertu
Sont là qu'on lieve à la poullie ;
L'une donne le laiët batu ,
Et l'autre la crespine boullie.

Je n'ay que une povre Chapellë
En Cambray , où Dieu nous appelle ;
Puis que bonne amour nous cordelle
Ensemble , par vray parentaige ,
Donnez moy une prebendelle ,
Pour vivre , & avoir du potaige.

Comme vostre parent petit ,
Qui beneficium petit ,
Je prendray si grant appetit
De dire *Pater & Ave* ,
Que en gloire petit à petit
Monterez , si serez saulvé.

Le Testament de la Guerre, fait & composé par Maistre Jehan Molinet.



A Guerre suis en train de mort,
 Qui n'attendz qu'à passer le pas;
 Mais conscience me remort
 Tant fort, que j'en pers mon repas;
 Et pour cause que je n'ay pas
 Satisfait aux miens plainement,
 Il me fault avant mon trespas
 Faire mon petit Testament.

Je laisse à Dieu, s'il la veult prendre;
 Mon ame; mais si je reschappe,
 L'ennemy, pour grans maux apprendre,
 L'entretiendra dessoubz sa chappe;
 Viennent le Roy, viennent le Pape;
 Viennent heraulx, viennent messages;
 Qui la veult avoir, si la happe,
 J'en laisse faire les plus saiges.

Les Roys, les Princes, & les Ducz;
 Qui mon corps ont allimenté,
 Auront, se tous ne sont perdus,
 De mes biens une quantité;
 Ceulx qui pour droit & equité
 Ont requis mon bras adjutoire,
 Auront haulte prosperité,
 Louenge, triumphe, & victoire.

Mais je laisse aux pervers tyrans;
 Qui, par mauvaise intention,
 Sont les laboureurs detirans,
 Et leur font tribulation.

Honte , malheur , confusion ,
 Malladies , noïses , discors ,
 Et pleine diminution
 De biens , de membres , & de corps .

Je laisse aux Abbayes grandes
 Cloistres rompus , dortoirs gastez ,
 Greniers sans bled , troncz sans offrendes ,
 Celliers sans vins , fours sans passez ,
 Prelatz honteux , Moynes crottez ,
 Perte de biens & de bestaille ,
 Et pour redresser leurs costez
 Sur leur doz une grande taille .

Je laisse aux grosses bonnes Villes
 Chargées d'impositions ,
 Leurs Tours descouvertes & viles ,
 Leurs murs jus de fondations ,
 Bourgeois d'horribles pensions
 Tant fort attains & occupez ,
 Qui n'osent de leurs mansions
 Vuider , qu'ilz ne soyent happez .

Je laisse au povre plat pays ,
 Chasteaulx brisez , hostelz bruslez ,
 Terre en friche , gens esbahis ,
 Bergers batus & affolez ,
 Marchans meurdris & mutillez
 De grans cousteaulx & de corbetz ,
 Et corbeaulx crians à tous lez
 Famine dessus ces gibetz .

Je laisse aux vaillans champions ,
 Qui , fort bien tenans leur serment ,
 Leurs Princes , comme Scipions ,
 Ont servy bien & loyaulment ,

Grant renom qui ne fault ne ment ;
 Bien heurée prosperité ,
 Et quoy qui tarde longuement ,
 Honneur à perpetuité.

Je laisse aux jeunes estourdis
 En vieillesse peine & tourment ,
 Qui Bourgz & Chasteaulx plus de dix
 Ont acquis cauteleusement ,
 Piteux cris & gemissement ,
 Gouttes aux mains , bras decroisez ,
 Et avant leur deffinement ,
 Le danger d'estre racoursez.

Je laisse à ceulx qui mes querelles
 Ont detenu gaignant l'argent ,
 Fines gouges & macquerelles ,
 Pour les esplucher nettement ;
 Ne fault que ung mauvais garnement ;
 Qui oncques nulz biens ne pensa ,
 Pour luy donner son payement :
 Du Dyable vient , au Dyable va.

Je laisse à plusieurs Hostellains,
 Où mes gens ont esté logez ,
 Leurs coffres d'or de touche pleins ;
 Leurs membres fort adommagez ,
 En lieu de grans deniers forgez ,
 Ung petit sac plein de *Credos* ,
 Et plusieurs ventres engrossez
 Par faire la beste à deux dos.

Je laisse à ses grans cabasseurs ,
 Qui Gens-d'armes ont cabassez ;
 Leurs cretins & leurs cabasseurs ,
 Nous avons cabas bas assez ;

Mais quant mes pas feront passez ;
 Leurs cabas grans rabaisseront :
 Encores ne sont trespassez
 Ceulx qui bien les cabasseront.

Je laisse à mes houffepaillers ,
 Platte bourse & vuide bouteille ;
 Aux Paiges , gros poulx par milliers ;
 Aux gros varletz , fain aux entrailles ;
 Aux lasquais , fiebvres nompareilles ;
 Aux vieulx routiers , membres peris ;
 Et aux pillars , poingz & oreilles
 Attachez à ces piloris.

Armuriers & Brigandiniers ,
 Selliers , Fourbisseurs de cuirasses ;
 Qui gaigné ont plusieurs deniers ,
 En faisant harnois & poitrasses ;
 Plus honteux que vieilles lymasses
 Seront les palmes estenduës ,
 Et auront de leurs propres haches
 Leurs corps & les testes fenduës.

Je laisse au pillart espillé
 La pillade qui va pillant ,
 Tant q'ung pilleur l'aura pillé ,
 Plus gorrier & plus espillant :
 S'il est en pillart aggrapillant ,
 Il pillera sa pillerie ,
 Et l'aultre qui fut espillant
 Sera noyé en pillerie.

Je laisse au bourreau , s'il est près ,
 Ung cent de chauffes bigarrées
 De ceulx qui auront cy après
 Des corbeaulx pances desfirées ;
 Et aux hardeaux portans espées ,
 Comme terribles applicquans ,

De

De nuyct trois ou quatre cruppées ;
S'on les trouve par les clicquans.

Je laisse à tous mes aggripars
Saisines & possessions
De fourches , gibetz , happars,
Pour en faire leurs mansions ;
A ceulx qui compositions
Font aux gens , & plusieurs travaux ,
Les propres benedictions
Qu'on donne aux Marchans de chevaulx.

Je laisse aux vieulx souldars sans dens ,
Bien taillez d'estre mal soupez ,
Lesquelz par bien donner dedens ,
Ont plusieurs membres decoupez ;
Aucuns ont piedz & poingz griffez ,
Par approcher les horions ,
Et les aultres fort brelaffrez ,
Plaindans leurs grandes passions.

Je laisse aux joyeuses fillettes
Suyvans armées , fort enclines
De humer les oeufz de poulettes ;
Et de rostir grasses gellines ;
Puis que cy après seront dignes
De brimber en plusieurs quartiers ,
Je feray rendre leurs gourdines
Aux gargattes de ces monstiers.

Je laisse à ceulx qui sans raison
Ont ravy les biens de ce monde ,
Vrays heritiers de la maison
De l'ennemy ord & immunde :
Qui sus la pillade se fonde ,
Et veult d'aultruy l'argent despendre ,
Il se lance en bourbe profonde ;
Car enfin convient rendre ou pendre.

LE CALENDRIER:



CALENDRIER mis par petis vers
 Selon le temps dur & divers,
 Pource que bisextre eschiet,
 L'an en fera tout desbauchiet.

Les douze signes se desvoyent;
 Ce disent tous ceulx qui le voyent;
 La Pucelle regardera
 L'Amoureux qui mieulx luy plaira,
 Les deux Jumeaux que j'y adjouste,
 Seront dehors, se bayart jouste;
 Le Lyon se tiendra en muë,
 Se monnoye ne se remuë:
 Mais autres signes regneront
 Sur gens, & bestes, & seront
 Escorpions, & chauldes places;
 Les bons Thoreaulx dessus les Vaches,
 Les gras Moutons sur les Bouchers,
 Les Ballences sur les Gressiers,
 Les Crevisses sur gens de Guerre
 Le Capricorne sur la terre,
 Le Sagittaire sur les buttes,
 Et les piz secz sur bestes bruttes.

Les jours auront trop plus de nonnes
 Que d'Abbeſſes ne de Chanonnes,
 Et sy seront fort perilleux
 De noyer aux gens moucquilleux.

Bon fera saigner toutes gent
 Quant Barbiers n'auront point d'argent;
 Se Dimenche en ce lieu terrestre
 Fait la tarte, il changera l'aistre,
 Car les Moyſnes A B auront,

Et les Meufniers le D tiendront ;
 Du nombre d'or fera grant compte
 L'Usurier qui souvent le compte ,
 Mais il ne courra pas sur gens
 Qui povres sont , & indigens.

Se le Croissant monte en *Virgo* ;
 La belle sera plaine ; *ergo*
 Des nouveaulx temps aurons assez ;
 Mais que les vieulx soyent passez.

Nous aurons en chambres & loges
 Plus d'Orlogeux que d'orloges ,
 Quant les heures se deslyeront
 Les Escrivains les relyeront ,
 Et s'en retiendront les minuttes
 Les Clercz , se bonnes sont & justes.

Les cendres , se nous ratizons ,
 Aurons le jour des baptizons.

Nous aurons en nos quarante aynnes
 Vingtz Roys joustans à leurs quintaines.

Ceulx de Mortaigne jeusneront
 Sy fort, que plus ne mengeront ;
 Mais ceulx d'Arras , & de Callais
 Mengeront chairs , fourmaiges & laitcz.

Seulle une feste aurons o an ,
 Entre Noël , & saint Jehan
 Tousjours aurons les Innocens ,
 Se ce n'est par force de sens.

Roysons aurons sans fictions
 Ung peu devant l'Ascension ,

Et puis sera le behourdis,
 Qui sera lourd, & estourdis ;
 Mais les Roys desconfis, & matz
 Retourneront en leurs climatz.

Femmes tristes, & cueurs marris.
 Recorderont à leurs maris
 Ce Quaresme en leurs mansions,
 Les Laudes, & les Passions ;
 Et après leurs commandement,
 Leur feront sans amandement,
 Et contre leur volenté franche,
 Porter la haire & la souffrance :
 Pignereffes menant grant galles
 Auront aux mains cloches & galles,
 Par les ruës comme cliquettes,
 Yront sonnant leurs escalettes,
 Et puis donneront à leur Curé
 Bien à boire en hanap doré.

Nous aurons Pasques mengeant flans
 Aux Quaresmeaux se bledz sont grans ;
 D'huy en cent ans sans tromperie
 Toutes Pasques seront flouries.

Sainct Pol sera près de saint Pierre ;
 Se eulx deux sont mis en une pierre ;
 A Valenciennes s'il eschiet
 Le trouverez sur le marchiet.
 Nous aurons saint Aubert pour vray
 Devant nostre Dame en Chambray,
 Là Chandellier pourrez avoir
 Fort bas devant le pot lavoir.
 Après soupper les gros gourmans
 Ferant Feste des sept Dormans ;
 Sy feront ceulx de saint Laffart

Solennité de saint Panfart ,
 Les Croix , selon nos Evangilles ,
 Seront à l'envers de leurs pilles.
 Saint Cornille , & saint Mehaultz
 Se arbres sont grans ilz seront haultz ,
 Quant vostre cul retournerez
 La Feste saint Luc trouverez.
 Vierges feront de sainte Roze
 Plus feste que de saint Ambroise ;
 Mais les Seurs du grant Hospital
 Mettront en casse saint Vital.

Saint Christofle aurons grant & droit
 S'il y a place à la paroit ;
 Gensdarmes auront la coppie
 De saint Piat , & sainte Pie ,
 Mais à la fois auront aucune
 Mauvaise éclipse de pecune :
 Beuveurs , si leurs deniers sont cours ,
 Crieront saint Lienard à secours.

De sainte Anne de trois quartiers
 Feront feste les Parmentiers.


Mareschaulx tiendront mieulx la loy
 De saint Clou que de saint Eloy.
 Gens pesans , pour eulx allegier,
 Requerront souvent saint Leger.
 Tous sains aurons , quoy qu'on en die ,
 Quant tous serons sans maladie.


Les Vigilles auront des Ames
 Trois feuilles après les sept Pseaulmes ,
 Sainte Bride sera devant ,
 Saint George au cheval remouvant ;
 Saint Lion sera pour maint cas

Fort honoré des Advocatz ;
Qui feront feste plus halive
De saint Donas que de saint Yve.

Saint Martin aurons nous bien près
Du laid boiteux qui trote après ;
Saint Ferieul , sainte Pichine
Seront servis en la cuisine ;
Saint Anthoine au gris mantelet
Sera joignant le pourcellet ;
Et sainte Barbe rez à rez
Saint Pol l'Hermitte , s'il n'est rez ;
Mais quoy que l'ennemy soit fin
Benoist sera Dieu en la fin.


F I N.







The page contains extremely faint and illegible text, likely bleed-through from the reverse side of the document. The text is scattered across the page and is too light to be transcribed accurately.



Rebacked 1992



